

**NATIONAL ASSEMBLY OF
SEYCHELLES**

Wednesday 27th July, 2022

The Assembly met at 9am

National Anthem

Moment of Reflection

Mr Speaker is the Chair

MR SPEAKER

Mersi. Bonzour tou Manm Onorab. Bonzour nou zofisyé Lasanble ki prezant avek nou. Bonzour tou piblik, ki swiv nou byenveni pou nou travay ozordi. Nou annan en pti revizyon lo *Order Paper*. E nou annan *First Reading* en *Public Bill*. Madanm Clerk.

MADAM CLERK

Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout. nou *Bill* ki pe ganny prezante pou *First Reading* i :-

*Statute Law Revision
(Miscellaneous Amendments)
(No. 2) Bill, 2022.*

*This Act may be cited as
the Statute Law Revision
(Miscellaneous Amendments)
(No. 2) Act, 2022. Mersi Mr
Speaker.*

MR SPEAKER

Mersi Madanm Clerk. Bon nou travay ozordi i lo Mosyon, e nou komans avek en Mosyon prezante par Onorab Waven William. Onorab ou a poz ou Mosyon silvouple.

HON WAVEN WILLIAM

Mersi Mr Speaker bonzour tou dimoun ki a lekout. Mr Speaker Mosyon i lir *comme* swivan: -

Swivan sityasyon geopolitics mondyal vizavi transportasyon komodite e komers kot i ganny gouvernem e kontrole par volim *supply and demand*, Lasanble i demann Gouvernman pou etidye sityasyon, ek bi pou ankouraz an partenarya ek sekter prive en proze bato kargo nasyonal ouswa rezyonal pour Losean Endyen.

MR SPEAKER

Mersi Onorab. Mon a demann segonnman pou Mosyon avan ou prosede. Onorab Hoareau.

HON JOHN HOAREAU

Mersi Mr Speaker. Bonzour Mr Speaker. Mon annan loner pou segonn sa Mosyon e mon ti a demann ou si apre ki entervenan, in prezant son Mosyon, mon ti a kapab adres Mosyon, mersi.

MR SPEAKER

Mersi Onorab. Onorab William.
Ou a prezant ou Mosyon.

HON WAVEN WILLIAM

Mersi Mr Speaker. Mr Speaker mon pa pou kapab rat sa sans pou remersye Bondye Tou Pwisan pou son lagras e faver lo nou pei, pou fasilit sa Lakor sinyen resaman ant *Ukraine* e *La Russie* dirize par Sekreter Zeneral Nasyon-z-Ini, e leadership *La Turkie* pour ki *Ukraine* i kapab komans loperasyon eksportasyon manze.

Mr Speaker mon osi sers son gidans anver deliberasyon lo sa Mosyon, ki Manm a trous son merit pou siporte avek en lespri anbisye, ver devlopman soutenab Sesel pou konsolid son rezilyans.

Mr Speaker, sa lemonn ki Sesel i en sou distrik sa vilaz global pa rapor ek nou pozisyon zeografik e detase ek bann marse prensipal, nou pe vwar nou sityasyon koman en pi pe vin pli difisil ver devlopman soutenab, ki nou pe aspire.

Mr Speaker, Mosyon pe demande ki sa Lasamble e piblik an zeneral i analiz sityasyon, ki pei pe pas atraver. Sityasyon mondyal, e sa eleman soutenabilite, kot i konsern

sekirite alimanter ouswa souvrennte alimanter pei, dan en fason konpreansiv.

Levennman resan pandan sa de ou trwa lannen, i legzanp tipik e reel kot menm si kanpanny lentegrasyon kontinyel e devlopman teknolozi transportasyon e telekominikasyon in akoursi zistans,

Mr Speaker par lefe ki nou depan en gran parti lo enportasyon, Sesel pe sibir pou kontinyen sibir plis depans e retard dan, e kou komodite e transportasyon.

Deplizanpli Sesel pe e pou fer fas avek bokou defi, defi pou devlope koman en pei souveren, akoz pri ki i bezwen peye pour lenportasyon sa ki i bezwen. Mr Speaker pandemi COVID-19 e lager pe kout lemonn enkli Sesel ki napa otan resours.

Mr Speaker, pei pe sey rekipere. Menm si nou'n kas rikord *tourism arrival*, mid-term, prolongasyon pandemik *COVID*, lager e la en lot pandemik lavaryol pe azout lo lenpak Mr Speaker.

Mr Speaker nou zis priye e demann mizerikord lagras Bondye ki sa maladi lavaryol zako, pa ankor ralanti sa dinamiz bann diferan konponan faktor enfiyansyel devlopman ekonomik global. Si

nou analiz sa ban fakter swivan ki pe azout lo kou lavi tel parey. Pri karbiran, pri fre bato ki monte, pri komodite ki monte bezwen plis larzan pou fer vin komodite dan pei Mr Speaker.

Serten pei fourniser pou protez sekirite alimanter, zot pe rasyonn zot lakantite eksportasyon atraver kota. Pou asire ki zot pei i reste soutenab, e zot sekirite alimanter.

Pei pli devlope ki annan bokou pouvwar *d'achat* zot annan lavantaz i ganny priorite lo lenportasyon e letan ou pe koz volim e groser demann. La Lanmerik, *La Chine, L'Inde* parmi lezot, zot ki atir plis latansyon fourniser, Kargo e lakonpannyen bato kargo.

Mr Speaker, bann gran Por pe osi fer fas ek mank mendev, akoz *COVID*. Mank *container* vid, e konzesyon Por an term *stock pile container*. E bato ki bezwen fer laliny pou sarze, e desarz ozordi an fas ek lefe *COVID* e lager. I annan en kriz, menm si pour lemoman i pa alarman Mr Speaker.

Mr Speaker sityasyon i konmsa ozordi akoz *COVID* ek *lockdown* in anpes komers ant bann Leta. Travayer plizyer Por in malad in kontribye dan konzesyon e retar. Lager pe azout on doz konplikasyon, ki

fer Mr Speaker ki Sesel koman enn Pti Leta Zil bezwen komans get pli lwen, ki son bout nennen e *think outside the box*. An regardan plizyer opsyon par zis ki sa enn ki mon pe koz lo la. Me osi vwar lezot.

Mr Speaker Mosyon pe *focus* lo fitir, ki kapab vin pli enserten e demande ki pei atraver son partenarya publik ek sekter prive, pou evalye sityasyon *lockdown*, pou evalye sityasyon lokal e dan larezyon pou inisyen tel proze.

Mr Speaker Sesel i depan lo lakonpannyen etranze e bato kargo etranze pou tou son bann enportasyon. Dan moman difisil dan sa vilaz global, se bann Pti Leta Zil an deor kontinan ki sibir plis lenpak. Ouswa par natir son groser zot pa vin atiran.

Nou'n tande lo medya, konplent bann enportater lokal. E azan bann lakonpannyen bato kargo. Realite se swa napa *container*, napa bato pou pran nou *container* ki asize lo serten Por, ziska ler e kan lakonpannyen bato i pare pou ede, alor marsandiz Sesel bezwen reste lo Por ziska ler bann pti *feeder* bato i kapab pran, nou *container* e anmennen. Sityasyon nou Por Victoria pa kapab akomod bann *super*,

bato kargo Mr Speaker a ler aktyel.

Mr Speaker leksperyans global fenomenn klima bann differan pandemik e lenpak lager, ouswa bann konfli zeopolitik ozordi e lavenir, i kapab vin pli pir. Mosyon pe demande Mr Speaker, pe pran en pozisyon avangar.

Mosyon pe rod proaktivite. Mosyon pe demann preparasyon pou etablir kapasite rezilyans, pou *deal* ek okenn evantyalite, kot si bato kargo etranze pa kapab vin amenn nou marsandiz, nou bato lokal si nou annan, ouswa dan larezyon i a vin donn rekour Mr Speaker.

Si nou'n kapab fer *tanker*, e ozordi Seselwa i dan lapes semi endistriyel. Transportasyon kargo osi i en proze ki kapab ganny konsidere o nivo Nasional, ouswa o nivo larezyon Mr Speaker.

Mr Speaker Gouvernman koman fasilitater, bezwen ankouraz sekter prive pou etidye ganny bann lozistik pou pli tar pran en desizyon. Mr Speaker si en tel proze materyalize, i pou kabab realiz rev plizyer antreprenier ozordi ki pa oule pran risk pou lans dan proze donn valer azoute parmi lezot, senpleman akoz marse lokal tousel nepli konpetitiv,

nepli atiran - dan plizyer domenn in fini satire.

Si loportinite transportasyon an mer i garanti. Mon asire, ki pou sa *gateway* pou 'Made in Seychelles' brand fer son mark lo marse eksteryer. I pou osi kree loportinite pou antreprenier, ganny materyo brit e plis swa Mr Speaker.

Mr Speaker Lakor, Komisyon Losean Endyen, ki konpri *Maurice*, *Madagascar*, *Comoros*, *Sesel*, e *La Reunion* ki pa en Manm tro aktiv, ki annan en komers, ant sa bann pei ava ganny redinamize. Lenpak komers a sou rezyon a kree osi sa lenpak adisyonnel, atraver loportinite Lakor Komers Lib, Kontinan Lafrik ki Sesel i form parti.

Zis pou enformen an 2019, pandan ki Sesel ti annan pozisyon *la présidence COE*, ti annan en miting dirize par prezante par Minister Lagrikiltir, reprezentan tou bann zil, reprezentan *FAO*, reprezentan *IFAD* ti lans en programm ver souvrennte alimanter, kot son sant i baze *Madagascar*, proze ti apel-e *PRESENT*. Mr Antoine Marie Moustache, ti predir ki Sesel dan lavenir pa ti pou bezwen al lwen pou aste zonnyon, ouswa ponmdeter akoz *Maurice* e

Madagascar ti pou prodwi sifizan pou eksporte dan larezyon.

Sepandan ti rekonnet sa defi, transportasyon Mr Speaker. Mr Speaker, loportinite i la anba sa Lakor, anba konponan komers sirtou atraver lasistans ek Linyon Eropeen e Labank Devlopman Linyon Eropeen.

Labank Devlopman Afriken parmi lezot, i pare pou pret larzan Mr Speaker pou bann tel proze. Mr Speaker Prezidan pe ankouraz pep pou reve. Loportinite i la, i demann serten endividi fou parey bann pionye ki ti pe reve pou anvol-e, reve pou al lo lalin Mr Speaker.

Sesel pa premye Lafrik pou lans balon pli o serten pe reve annan nou prop satelit Mr Speaker. Prezidan pe ankouraz bann atlet pou dekros sa premye meday Olenpik. Mr Speaker, koman en Manm Parlman ki pe sivre globalman bann diferan lafors e lenflyians dan devlopman dinamik, e parfwa efreyan, soutenabilite lavi e Nasyon pou depan lo ki degré relevan e proaktiv, zom i ete fas ek realite sa devlopman dinamik otour li.

Mr Speaker, pou rod gidans son kreater pou azir ek pridans, lasazes pou mentenir sa kondisyon e lanvironnman

pou serten degré lespas, rezilyans.

Mr Speaker Mosyon pe demann Gouvernman pou etidyé sityasyon, e koman fasilite pou ankouraz proze devlopman nou prop bato kargo, ouswa dan larezyon Losean Endyen a lavenir. Nou annan en Lekol Maritim, ki kapab pouz nou zenn dan sa direksyon, olye zis dan *tanker*.

Mr Speaker, si Gouvernman Sesel ouswa sekter prive Seselwa zot mank kapasite pou fer li, Mosyon pe dir antre an partenarya ek pei zanmi pou fer li. I pou zener plis benefis e donn plizyer nou bann antreprenier plis lankourazman e konfyan, plis loportinite e pli gran marse pou eksplwate, pe ouver. Mon repeete en pli gran marse prezante atraver Lakor Kontinan Lafrik marse lib.

Mr Speaker letan loportinite i vini, pa dir mon a get pli tar. Annou bat sa fer letan i so. Annou pa esper en pli gro katastrof, ouswa fenomenn mondyal a plati nou ater, epi rode ki nou pou fer.

Mr Speaker ki Bondye i diriz nou, e ki nou osi kontinyen annan lafwa dan nou demars e rev pou agrandi nou rezilyans, pou reste soutenab, e relevan pour lavenir.

Mr Speaker mon pou aret la, e mon pou donn sans bann lezot Manm pou entervenir e mon pou demann zot pou regard sa Mosyon avek en lespri ouver, avek sityasyon nou pei e devlopman ki pe arive mondial. Mersi Mr Speaker.

MR SPEAKER

Mersi Onorab. Wi mon ava apel Onorab John Hoareau pour son lenthervansyon.

HON JOHN HOAREAU

Mersi Mr Speaker. Bonzour Mr Speaker, bonzour tou dimoun a lekout. Mr Speaker Mosyon ki devan nou, i en Mosyon tre enteresan. En Mosyon ki pe reponn en lapel kot loter Mosyon in realize poudir nou dan en problem. Nou dan en problem kot pli ale, marsandiz pe vin pli ser dan nou pei.

Akoz kou lenportasyon, ki baze lo *freight* li menm. E frekaman bato, ki frekant nou Por. Mr Speaker sa proze pe demann Gouvernman, pou vwar lo kote rezyonal ki lafors nou kapab mete lo kote rezyonal, pou fer ki nou kapab anmenn en proze kot nou kapab annan nou prop bato kargo ki deservi larezyon.

E larezyon ler nou pe koz larezyon nou pe koz *Maurice, Sesel, Madagascar, Comoros.*

Petet *La Reunion* i pa telman annan sa nesesite parske, li i en Departman *Francais*. E i ganny servi par en lakonpannyen *Francais*, son Por i ase devlope i bokou pli devlope ki nenport ki Por dan larezyon. E i ganny deservi par en lakonpannyen ki apel *CMA CGM* ki en gran lakonpannyen enternasyonal maritim pou bann zafer transportasyon kargo.

Me leres bann pei, nou vvar poudir i en problem reel ki nou pe fer fas avek. Akoz pli deplizanpli tou bann sekous ki pe arive dan lemonn - parey loter Mosyon in dir, sa sekous zeopolitik i fer ki manze, pri manze pe vin pli ser pour nou, pri lavi pe vin pli ser pour nou. Akoz lefe transportasyon.

Mr Speaker en keksoz nou bezwen demande. Eski i annan en *political will* pou fer sa kalite demars? Mon poudir wi akoz nou menm nou'n koz souvan lo korperasyon Sid-Sid, lo en korperasyon ki anglob bann pei sid larezyon. Nou pe koz osi, lo sa *African Continental Free Trade Area*, ki pa tro lontan nou ti siny, nou ti ratifye sa Lagreman dan nou Lasanble.

E sa dan li menm i montre poudir komers, ant bann pei Lafrik i a en nivo ki pa akseptab an se moman. I annan apepre 15.2poursan komers ki fer ant

bann pei sid Lafrik, Lanmerik i 47, Lazi i 61, Lerop i 67, e nou nou'n ganny vwar koman kontinan ki pa pe fer ase zefor pou relev lekonomi Lafrik li menm.

Dezyenmman, loter Mosyon in adres sa size koman en proze sekter prive osi i kapab met en zefor ladan. Ler nou get lafason, ki par egzanp ti ganny son bann *tankers*, nou kapab vwar en model *PPP* la. Kot *SEYPEC* li menm i ti fer en *subsidiary company*, ki ti anrezistre *Isle of Man*. E sa *subsidiary company*, ti pran en larzan avek *KFW* ki en labank *L'Allemagne*, kot zot ti pran en *loan B to B - Business to Business*. E la zot ti ganny sa a en to lentere ki abordab, mon kapab dir.

Akoz sa lakonpannyen, ti anrezistre Lerop. E ler ou anrezistre Lerop ou pran larzan avek bann labank dan Lerop, ou ganny a en to pli favorab, ki si ou ti pe rod en *international loan*. As opposed from en lot pei.

Mr Speaker sa proze i kapab en proze ki vyab. Me i kapab en proze osi ki kapab fer fas avek bokou problem. Alor i neseser pou nou vwar sa proze, dan en fason ase ouver parey loter Mosyon in demande e pli o profon. Nou bezwen demann nou lekor ki mannyer problem

in arive? Problem in vin ler *La Chine* ti ranmas tou son bann *container* dan lepok *COVID*. E ti annan en *shortage container* lo nivo mondyal. Ler in annan en *shortage container*, pri *container, freight* in sorti apepre \$2000 pou arriv ziska \$4000-\$4500.

La nou ti vwar par egzanp, mon ti koz avek en antreprenier Seselwa ki dir mwan - Be mon'n aste en *container* Sinwan en *container* 20 pye i pran 560bal siman ladan. Mon pey sa siman zis \$1000. Me pou fer desann sa siman Mahé, pour mwan kapab fer mon biznes avek pou fer mon konstriksyon, mon'n bezwen pey \$4500 e lanmenm la i montre zis ler ou *add* sa de pri ansanm ki en bal siman i tonm par la ki R150.

So i annan en nesesite reel pour sa kalite demars. Me ankor si nou pe demann nou lekor en kestyon, konbyen ki nou pe koz lo la pou fer sa kalite devlopman pou Sekter Prive. Dapre mon resers, ou pou bezwen si oule annan sa frekans e si oule annan ou bato modern. Ou pou bezwen annan ou apepre 50milyon pou apepre 2 bato.

So 25-30milyon en bato, nou pe koz *US dollars* la. E pour sekter prive, annan en bato koumsa ki son kapasite -

akoz konmela tou prodwi i met dan *container*, tou keksoz i ganny anbale dan *container*. In nepli bann lepok kot marsandiz i met an grennyen dan bato. So pour en bato apepre 3000 *container*, i pou kout ou apepre en \$50milyon, pou de bato *sorry*.

E sa se larzan ki lenvestiser i bezwen rode pou kapab antre dan en tel proze konmsa. Me nou bezwen gete osi, eski nou Por i en Por ki pe reponn bann bezwen modern ozordi? Nou vwar poudir, nou Por pe al redvelope, e pou annan en lenvestisman apepre €70milyon ki pou ganny mete dan Por, pour *rehabilitation* ek *extension*.

E sa *loan* osi ki Gouvernman Sesel i bezwen pran pou fer sa proze, i annan bann kondisyon, ki bann *lenders* i met devan. E bann kondisyon ki bann *lenders* i met devan, se ki ou bezwen *tender*, enternasyonalman pou bann *terminal operators*.

Vedir bann dimoun ki pou fer *handling* lo ou Por. E pour sa ler sa i arive, nou pa kapab garanti poudir *Land Marine* pou kapab ganny sa travay pou fer. Akoz si en *international tender*, i pou sa ki *bid* avek en proze pli byen, ki pou ganny sa *tender*.

E par kont mon en pe per, si sa i tonm dan lanmen etranze. I riske sa etranze ler i vin fer sa proze isi Sesel, i pe mazin pou *recoup* son larzan a en letan pli *short* posib. E i kapab dikte bann pri e pri i kapab menm pli monte. Alor i annan serten keksoz ki nou bezwen get ladan osi.

Mr Speaker, nou Por i bezwen annan li sa ki nou apel bann *onshore cranes*. Akoz ozordi avek bann bato modern ki annan, bann *containership* zot napa *crane* abor. Zot met zis *container*.

Alor zot deservi bann Por, ki annan ban *onshore cranes*. E si par egzamp ozordi bann problem ki nou pe fer fas avek se ki sa bann bato, ler zot sorti Lerop oubyen *Dubai* avek bann *container*, souvandfwa zot bezwen al depoz sa *Maurice*, akoz Sesel avek *Comore* i sel de pei dan larezyon ki napa sa bann *onshore cranes*. Alor modernizasyon nou Por i enportan.

So si zot al depoz sa *Maurice*, apre sa i kontra pou anmenn sa *container* isi, i bezwen ganny *sublet* avek bann pli pt i bato, bann pli bato pli ansyen ki annan *crane onboard* ki kapab retir sa bann *container*.

Alor Mr Speaker nou pe fer fas avek en defi ki nou Por i bezwen modernize. Si nou Por petet i modernize, petet pa pou annan sa gran nesesite pou kapab fer demars lo kote *cargo ships*. Me selman *still*, parey loter Mosyon in fer resorti nou pa konnen ki lot pandemik ki pou arive. Nou pa konnen ki lot problemm lemonn ki pou arive. Ki lot lager, ki pou fer ki sa nesesite i pou return koman en nesesite dan nou figir ki reel.

Mr Speaker ozordi zour bann Por parey *Dubai* parey *Salalah* kot laplipar nou bann *container* i *transshipment*, sorti swa Lerop, swa dan *Middle East*, i bann Por ki ase modern, ki ase fon premyerman, pou kapab anmenn sa bann groser bato. E osi i annan lespas pou sa bann bato i kapab mannevre.

Parey mon'n dir enn pti pe pli boner, nou'n fer bokou Lagreman avek pei Lafrik parey Kenya, parey *Botswana*.

Prezidan Faure ti fer bann Lagreman avek *Botswana* pou lavyann. Be *Botswana* i *landlock*, i kapab servi par kont *Port of Durban* - Sidafrlik. E pou fer sa demars si nou pou fer sa demars, parey mon ti pe dir avan nou pou bezwen nou de bato. Enn ki fer larout nor, e enn ki pou fer larout les ek sid kontinan.

So pou kapab annan sa frekaman, pou nou kapab ganny nou bann *container on time*. E pour nou kapab ganny sa kalite demars. Me par kont, Mr Speaker pou antre dan sa biznes *container transshipment*, oubyen *container carrying*, nou bezwen fer fas osi avek bann gro, gro zean parey *Maersk*, parey *Evergreen*, parey *CMA CGM* ki li i annan tou kontrol lo Por *La Reunion*.

Alors sa bann gro, gro biznes enternasyonal, pa souvandfwa ki zot pou donn ou sa lespas pou ou kapab *operate* avek de pti bato. Zot toultan fer sir ki zot pran *the bulk of the business*. E zot annan bann kondisyon ki par ler, menm si pou annan bato petet ou pa pou ganny cours.

Alor i enportan ki sa proze, si nou konsewar en proze koumsa i vin en proze rezyonal, kot nou kapab deservi par volim kargo bann lezot pei. Akoz Sesel li menm sa ki nou, nou pran i pa ase pou *run* sa bann *containership*.

Alor si nou deservi larezyon, petet *Comore*, *Maurice*, nou anmenn disik Lerop, nou anmenn son bann lezot prodwi. Nou anmenn nou ton *Maurice*. Nou anmenn nou bann lezot prodwi, agrikol ki nou eksporte.

E an desandan, nou kapab pran bann lezot *container* ki annan bann provizyon pour nou, swa pou al dan en pe dan kote *Malaysia* osi dan *east*. Parey mon dir e osi Sidafrik dan Por of *Durban* kot i annan, Por ki pli modern dan *southern hemisphere*. Kot nou kapab pran bann kargo e vin avek Sesel.

Mr Speaker, pou mwan fini mon le dir fodre pa zanmen nou fer sa fot *parey Sri Lanka*, in fer avek *Port of Hambantota*.

Kot Sri Lanka, ti pran en *loan* avek *La Chine* \$1.7bilyon e pli tar sa Por avek problem *COVID*. I ti pe bezwen, i pa ti pe i ti pe faid alor *Sri Lanka* pa ti kapab re-pey *La Chine*. E i ti bezwen *surround* son souvrennte, i ti bezwen donn 15mil ektar later *La Chine* an konpansasyon pour sa, pour li kapab pey son det.

E sa pou oule ki en fot ki Sri Lanka in fer ki nou zanmen nou tonm dan sa for pour nou *overburden* nou lekor avek bann gro, gro *loan* oubyen bann gro, gro proze ki apre nou bezwen vwar nou faid e nou pa kapab *run* en keksoz koumsa.

Alor i bezwen annan bann letid serye, e bann letid o profon ki Gouvernman i bezwen antre ladan. Akoz i annan en nesesite reel me nou bezwen osi avek

bann proze ki pa pou vin demen en *white elephant* pour nou. Mr Speaker avek sa mon le remersye ou.

MR SPEAKER

Mersi Onorab, mon a don laparol Onorab Michel Roucou.

HON MICHEL ROUCOU

Bonzour Mr Speaker. Mersi, bonzour tou mon bann koleg Onorab. Bonzour tou zabitan Mont Fleuri. Mr Speaker avek ou permisyon zis donn mwan en minit zis pour mwan senpatiz avek Ms Samia Lebon. Apre kot zot in pas dan en maler kot zot in perdi enn zot frer. Mon senpatiz avek zot osi avek lafanmir Nair ki sorti dan mon distrik.

Mr Speaker sa Mosyon anmennen par Onorab William, in donn sa loportinite nou Lasanble pou partisip enn pti pe dan en komers ou kapab dir, ki demen i pou ed nou ed nou pti pei pou li bouz enn pti pe pli devan.

Mr Speaker mon pa en dimoun finans, mon pa en dimoun ki en ekonomis. Me selman koman en Seselwa ek keksoz ki pe pase dan lemonn antye, e osi pe anmenn en lenpak lo nou pti pei Sesel i fer ou vreman konsernen. Mon'n ganny sans pou mwan koz

avek, avek detrwa dimoun ki zot deza dan bann biznes fer vini marsandiz, ouswa lezot prodwi ankor ki servi dan nou pei li menm li.

Dan mon koze avek zot Mr Speaker, zot in dir mwan poudir sa Mosyon i vreman enportan. Akoz sa pou ede demen pou fer, bese en pe pri lavi. Parey tanzantan nou tann diferan nou, lo tou lede kote latab koz lo la. E pe rod en fason pou amelyor enn pti pe, lavi nou sitwayen.

Dan dyalog Mr Speaker, mon'n ganny sans pour mwan aprann poudir dan lepase, STC li menm li in seye fer serten demars. Kot zot apros serten endividé, bann biznesmenn swa ki dan biznes bato li menm li.

Pour sey gete ki mannyer zot kapab sey rod en fason pour soulaz nou pep. Akoz parey nou konnen STC li menm li ki enport bokou keksoz de baz pour nou pep. E zot in bezwen vwar zot kot zot in kit dan semen. Akoz Mr Speaker? Akoz i kout sitan bokou, akoz i pou bezwen annan sa kantite marsandiz ki pe ganny enporte, pour sa dimoun kapab benefisyé li menm li.

Ki arrive se ki si demen, dizon vreman Gouvernman i deside pour li antre an *partner* avek serten biznesmenn dan

Sesel pour zot kapab envestir dan en bato, ki pou anmenn komodite Sesel, dan larezyon sa i pou benefisyé nou pei. I pou benefisyé li akoz parey sa ki mon'n aprann STC, pour li servi en *container* 40pye Mr Speaker pou fer desann komodite isi. I arriv li apepre \$6 ou \$7mil.

Sa ki mon'n ganny en konpran si demen vreman, Sesel li menm li i annan son prop bato. Kot pe fer desann marsandiz ki pe servi san menm *container* 40pye Mr Speaker, i pou desann a 20poursan, e sa pou anmenn en benefis, i pou anmenn en benefis lo kote pri lavi li menm li, en benefis pour pei, dan en fason ki plis Dolar i reste dan nou pei. E osi sa i pou anmenn biznes pou bann ki pe envestir ladan.

Mr Speaker, apre osi si vreman demen i arive. Gouvernman pe mazin avek sa grander lespri - akoz nou vwar ki pe pase dan lemonn ozordi, avek bokou ki'n ganny dir avek bann Onorab ki'n koz avan mwan. Avek legzanp ki'n pase se ki, bann problemm sanniter ki leve, lager li menm li ki pe arive parey *Ukraine*. Kot nou a kapab vwar se ki, Gouvernman in bezwen, i pou bezwen met en bon tim.

En bon tim asize, fer *analysis*, gete ki demen Gouvernman li menm li, i pa vvar li kot i pe perdi. Nou'n vvar dan lepase bokou lenvestisman. Kot nou vvar apre poudir sa bann lenvestisman dan plas pei benefisyé, pei li menm li i vvar li kot i bezwen donnent pour kapab kit sa bann lenvestisman bouze.

Zis en legzanp parey nou *airline Air Seychelles* ozordi. Ki mon vreman apresye ki ozordi - nou pe vvar en pe laklerte. Mon swete poudir sa i a kapab al enn pti pe dan en fason, pozitiv.

Dezyenmman nou annan nou bann tanker osi tou ki dan larezyon pe fer bann cours. Mon swete ki sa pe anmenn benefis pour pei. E osi si nou kapab envestir dan bato kargo. Selman nou bezwen parey mon'n dir o komansman fer sir poudir i annan *analysis* ki sa demen, i pa pou kout pei pli ser. E ki demen i pa pou vin en fardo lo nou Mr Speaker.

Be selman bann panse koumsa, mon ti a swete petet i ti'n komans bokou pli boner. Mon pa konnen akoz i pa'n arive Mr Speaker. Be selman parey Onorab William ek Onorab Hoareau in dir dan *zot speech*, se ki nou pa konnen demen, ki kapab arive dan

bann pei ki nou, nou pe depan lo la.

E sa i en *wake-up call* pour nou Sesel koman enn pti pei. Wi ozordi Mr Speaker avek *leadership* ki nou annan, ozordi nou vvar se ki Sesel parey nou'n ganny dir se ki touris, nou pe ariv lo en lot nivo ankor, ki sa pe met nou lo en lot rikord. Be selman demen avek bann keksoz ki pe arive dan bann pei, nou pa konnen demen egzakteman kote ki pou annan ankor en lot keksoz mondyal, ki sa pou afekte nou.

Avan ki nou ti vvar tou keksoz lo televizyon e nou Sesel nou ti reste enn pti pe eparnye ek tousala. Be la konmela, i pe ariv devan nou laport. E mwan mon panse poudir Seselwa, nou en Nasyon vreman entelizan. Parey in ganny dir, nou annan nou bann zenn ki pe aprann pou travay lo bann *tankers* ki nou annan.

E nou osi nou bezwen pe mazin pli a profon. I mannyer demen pei pour kapab antre dan bann lezot envestisman, ki sa demen i pa pou kout nou ser. E mwan mon panse Mr Speaker ki si demen vreman, parey in ganny dir se ki nou antre annakor avek ankor bann lezot pei, pou nou kapab ganny en bato ki pou fer sa bann - anmenn nou bann, pou enport

nou bann marsandiz, lo kote rezyonal ki sa i pou benefisye pei.

Kot la nou bezwen, nou menm nou lager antoure koman bann pti zil, bann Pti Leta Zil, kot nou pa tro vwar nou demen kot bann pei zot osi ler zot pou vwar zot dan en difikilte, zot pou vwar zot pe frenm bann laport. Parey nou'n ganny dir *La Chine* ti anmas son bann *container*. Nou, nou pa anvi vwar nou dan en sityasyon koumsa.

Apre osi isi Sesel, nou annan bokou bann biznesmenn. Vini vin devan, donn sa lanmen, akoz Sesel i pa zis pour Gouvernman, i pou nou tou. Parey i abitye dir nou tou nou lo menm bato. Si i arive demen nou dan problem, e i pa zis Gouvernman ki pou dan problem. E nou, nou bezwen pe ed nou pei pou nou kapab rod en solisyon. En solisyon ki demen, nou kapab bouz pli devan.

Mr Speaker ler nou pe koz lo bato pou enportasyon marsandiz. E osi petet nou kapab mazin bato ton tou. Ki mannyer sa pou ede pei li menm li.

Akoz nou pa pou kapab toultan vwar nou kot nou pe depan lo bann pli gran pei. Ki apre demen zot menm zot, zot

vwar zot dan en lot sityasyon. Akoz zis parey la nou pe get *Ukraine*. *Ukraine* i annan en bon pe keksoz ki sorti koz zot ki vin Sesel, ki avek sa lager ki annan ozordi, bokou pe pei pe vwar li dan difikilte. Akoz i pa pe ganny sertern marsandiz akoz i sorti laba.

Bokou pei i bezwen vwar li kot nou pe rod lezot fason, lezot fason ki mannyer zot kapab pou ede pou zot kapab bouz devan. E nou Sesel, nou osi nou bezwen pe mazin dan sa, dan le fitir koumsa menm.

Mr Speaker mwan mon osi mon vreman apresye, akoz mon santi mwan, mon vreman privilezye. Akoz mon dan en pei kot Bondye i beni nou. E i kit son lanmen lo nou, e nou toultan annan sa group dimoun ki la, ki toultan pe donn lanmen priye ki nou pei i reste dan en fason, enn pti pe beni li menm li.

Me selman an menm tan parey loter Mosyon in dir, se ki nou, nou bezwen an menm tan i bann dyalog ki nou bezwen komans antre ek nou bann pei zanmi. Bann pei dan larezyon ki mannyer nou pou kapab vwar en pti pe. Ki mannyer, nou kapab envestir dan bann keksoz ki demen dan lefitir.

I pa pou zis benefisye nou lo kote lekonomi. Be i osi lo kote

popilasyon, nou popilasyon ki nou deservi bokou bann keksoz. E osi petet, demen Mr Speaker i pou ede avek nou pei ki an risk avek bokou bann keksoz naturel.

Parey nou delwil koko, bann keksoz koumsa. La nou pe koz lo kote, kannel pou nou revwar pou ede osi tou kot pei pa perdi. Mwan Mr Speaker mon pou donn mwan siper sa Mosyon.

E mon swete ki bann ki dan sa domenn finans, lenvestisman, ki sa i en Mosyon ki zot pran li vreman serye. Akoz nou osi tou bann Manm Lasanble, nou vreman enterese. Nou vreman annan konsern lo kote ki pe arive dan bann larestan pei. Mr Speaker pou mwan fini la, mon ava dir se ki mwan mon pou donn mon siper sa Mosyon. Mersi.

MR SPEAKER

Mersi Onorab. Laparol prezanz pou Onorab Sandy Arissol.

HON SANDY ARISSOL

Mersi Mr Speaker. bonzour Mr Speaker, bonzour tou Manm Onorab e bonzour tou dimoun ki a lekout. Mr Speaker, dernyen parol ki - preski dernyen parol ki Onorab Roucou in dir se Sesel i en pti pei beni. Letan nou pe koze

ozordi la, Dolar avek Ero detrwa zour pase, zot ti pe preski atrap lanmen kanmarad.

Parske an term Roupi pou aste, Dolar avek Ero ki ti annan en gran konparezon, dan lepase. Nou'n ganny dir par Minis Tourizm yer dan sanmenm Lasanble Nasyonal, poudir nou'n preski kas rikord lakantite touris ki pe antre dan nou pei konpare ek lannen pase.

E Desamn nou pou fer bokou pli byen. Letan nou pe asize nou pe koze la. Mazorite nou bann Seselwa in vaksinen, preski nou tou sa ki i ti anvi, in pran son katriyenm doz, an relasyon avek COVID-19, pour asire ki nou ganny sa proteksyon neseser ki nou bezwen, an relasyon avek sa bann kriz ki pe pase de lemonn.

Nou, nou ganny konsidere koman enn pti pei, bann Pti Leta Zil, ki egziste. E souvandfwa, nou koman bann Pti Leta Zil parey in ganny eksplike par plizyer mon bann koleg Manm Onorab ki'n koz avan mwan, nou depan lo sa pli gro map ki nou vvar laba deor.

E souvandfwa letan nou al bann konferans aletranze, ou koz lo pei Sesel, bann ki la zot souvandfwa demann ou sa kestyon, Sesel kote i sitye li, swa i fer referans eski zot pre

avek *Maurice*, eski zot menm i pre avek *Madagascar*.

Parske Sesel i ankor sa pti pei, dan Losean Endyen ki en pe lwen avek sa lemonn global, ki nou tou nou vwar, ki nou tou nou tann koz lo la, ki nou tou nou aprann letan nou ankor pe lekol.

Mr Speaker letan mon'n koz lo tou sa bann keksoz dan nou pei ki pe arive, ki pozitiv, me Onorab William in anmennen en Mosyon, pou demann Gouvernman pou al bokou pli lwen ankor - bokou pli lwen pou nou komans mazin annan nou prop bato kargo. Ki pou kapab ed nou dan bann moman difisil. E osi dan bann moman ki pa neseserman difisil.

E i pe mazin osi rezyonal. I enportan pou nou mazin bann danze ki nou koman bann pti pei zil, nou fer fas avek. Ozordi sekirite alimanter, i en size ki ganny diskite dan preski tou bann *forum* enternasyonal. E sirtou pour nou, koman bann pti Pei Leta Zil, trafik imen ozordi i en size ki pe reganny koz lo la.

Konpare avek trafik imen, ki ti en size, ki ti en topik so, plizyer lannen pase me ozordi trafik imen i rekomans vin en size lo latab, parski i konsern lemonn antye. E nou koman en

pti pei, enn Pti Leta Zil nou pa kapab inyor sa.

Nou annan osi sa ki nou apel sanzman klima - sanzman klima ozordi pe fer plizyer lefe Sesel, dan plizyer rezyon, dan plizyer distrik. E nou'n vwar tou resaman lo rezo sosyal bann adversite ki sanzman klima pe anmennen. Nou'n vwar lo Por Praslin lefe ki anmennen. Nou'n vwar dan distrik Glacis kot Onorab Regina Esparon North East Point. Nou'n vwar Au Cap, nou'n vwar Beau Vallon e tousala i rezulta sanzman klima ki nou koman en pti pei, nou pe fer fas avek.

E nou koman enn pti pei nou pe fer fas avek plizyer defi. E Onorab William in mansyonn lager *Ukraine*, in mansyonn osi lavaryol zako ki soudennman WHO in komans met lo latab. Nou ti pe dir anvi ki *COVID* i *relax* enn pti pe, nou a kapab fer en bon Nwel sa lannen. E en bon Lannen sa lannen, apre 2an ki nou'n reste anndan.

Me WHO in met en lot size lo latab. San bliy *Ukraine* avek *La Russie* ki zot, zot pe fer en lot kalite lavaryol anler laba. Me selman sa ki enportan pou note, letan Eropeen, zot, zot lager Lafrik nou, nou ganny afekte. Bann Pti Leta Zil, nou, nou ganny afekte.

Me par kont letan nou Lafrik nou lager ek kanmarad. Eropeen zot, zot debout zot get nou. Sa osi i enportan pour nou mazin lo la, reflesir lo la letan nou pe koz lo Mosyon Onorab William ki pe demann nou, pou entrodwir en nouveau eleman si en bato kargo ki pou ed nou zisteman dan tou sa bann fleo, ki nou pe koz lo la, ozordi.

E anmenn li lo nivo rezyon rezyonal, pou nou kapab benefisyé koman bann pti pei. Me i enportan pour nou koman en Lasanble, mazin bann lasosyasyon ki nou, nou asosye avek par egzamp *IPU*, *PAP*, *SADC*, pour ki sa bann konversasyon ki nou fer dan nou Lasanble Nasyonal, i osi arriv lo sa bann nivo enternasyonal, an relasyon avek sekirite alimanter, an relasyon ek sanzman klima. An relasyon avek lezot keksoz ki afekte nou, koman enn pti pei zil parey Sesel.

E sirtou sekirite alimanter ki konsern nou. E alor letan Onorab William in anmenn sa Mosyon, pou demann Gouvernman pou al pli lwen, mwan mon pou siporte parske i annan en rol enportan an sa ki konsern manze. Parske souvandfwa letan nou tann koz lo manze. I reflekte lo kou lavi lo pri ki sakenn de nou, nou aste

nou komodite. I reste en size lo latab.

E ozordi mon apresye, ki Gouvernman in pran linisyativ pour li soulaz enn pti pe bann ki ganny bokou, pli mwens. E la bann mezir, bann lanrezistreman in komanse mon krwar depi sa semenn advert in komans mete lo radyo. Lo televizyon, pou ou kapab anmenn sa lanrezistreman anmenn sa bann dokiman.

E fer tou keksoz kler pou ou ganny sa lasistans ki ou bezwen. Swa pou elektrisite, en rediksyon dan kou elektrisite, swa pou ou ganny sa logmantasyon R500 e bann trwazyenm-az zot osi zot a benefisyé.

Gouvernman li dan tou sa mannevre ki pei pe mannevre, in vwar li neseser pour li kapab soulaz bann ki ganny bokou pli mwens. E yer atraver sa Mr Speaker letan nou pe koz lo kou lavi, i annan en Prozedlwa ki'n vin devan Lasanble Nasyonal, kot Gouvernman pe komans vwar bann landrwa dan nou pei kot i annan bokou, bann ki pe ganny bokou. Me ki pe travay mwens.

Nou'n ganny dir yer poudir sa i av en fason pour nou koupe, pou nou kapab annan en *savings* pou Gouvernman li analize, pour li analize pour li

gete ki i pou fer avek. Kote ava anvoy-e, e mon demann Gouvernman pou kontinyen fer sa travay.

Desann ankor rode, get kote nou kapab koupe pou nou zisteman kapab annan sa *savings*, pour nou soulaz bann ki ganny bokou pli mwens. E bann ki pli vilnerab dan lasosyete.

Letan mon lo kou lavi Mr Speaker an relasyon avek sa kargo, bato kargo ki Onorab William pe pou Gouvernman, pou vin ladan, pou soulaz nou dimoun an relasyon ek pri, Onorab John Hoareau in fer en pwen enportan - se fasilité modern pour nou Por.

E mon kontan pwen ki Onorab John Hoareau in fer resorti. Parske ozordi Por, bato ki anmenn nou kargo, avek bann kalite bato ki anmenn nou kargo, sa osi i ede dan pour redwir pou ogmant kou komodite ki antre dan nou pei.

Parey Onorab Hoareau in koz lo la, se letan ou koman sa biznesmenn ou'n aste ou komodite ou'n fer ou kargo, depandan Sengapour, *Malaysie* e letan pour li vin Sesel, i pou bezwen al asize lo plizyer bann Por.

Letan ou'n pey en pri pou kargo, pou ou *container* dan sa pei, i desann dan en lot pei, par

egzanz Onorab Hoareau in donn legzanz Maurice, i bezwen asiz lo Por Maurice e pou en mwan - ou *container* i bezwen ganny peye pour 1 mwan lapenn i pe asize lo Por Maurice, ziskan ler i ganny sa bato ki annan sa pti *crane* pour li kapab desann avek Sesel.

Parske Sesel nou fasilité se en bato ki annan *crane*, pour li kapab tir sa *container*, met ater pour ou ki'n aste ou prodwi depi Sengapour depi *Malaysie*, pandan 3 mwan, 4 mwan pase pou anmenn li Sesel.

E ler in pran sa larzan pou vin Sesel, i annan en lot kou ki atase ek ou *container*. Ler ou *container* pe ganny tire, pe met lo Por Mahé i annan en lot kou ki atase avek. Ler i ganny tire lo Por pou met dan *pick-up* pou vin dan ou magazen. I annan en lot kou ki atase avek.

E ozordi sa kou i sanmenm sa ki nou tou dan Lasanble Nasional nou koz lo la. Alor Mr Speaker, mon krwar Mosyon ki Onorab William pe anmennen, an relasyon ek en bato kargo, i ava ed nou, dan sa demars pour ede avek pri lavi dan nou pei. Parske pa blyie nou, nou depan lo gro pei, nou pa fer tou keksoz Sesel nou bezwen depan lo zot.

E ler laba i dir ek nou ki *fuel* i R2, nou, nou pa kapab dir

li ah fer *fuel* vin R1.50! Non nou pa kapab, i annan bann negosyasyon ki nou'n tann Minis koz lo la yer i annan kantite bann Lakor Bilateral, ki Onorab Richard Labrosse ti demande.

E tousala mon asire firamezir Gouvernman i ava pe bouze, nou ava pe rode ansanm avek bann pei rezyonal enternasyonal, bann lorganizasyon ki nou atase avek, ki mannyer pou nou koman bann Pti Leta Zil kapab vin ansanm pou nou siport kanmarad premyerman. E pour nou kapab soulaz nou pei nou osi an relasyon avek bann demars ki nou pe fer.

E Onorab William in lans en lapel, pour ki Sekter Prive e mon a osi lans en lapel avek Gouvernman. Pou zwenn sekter prive, vin ansanm, pour ki letan sekter prive i vin devan zot pa vvar bann lobstak ki la dan zot semen ki pou anpes zot fer sa demars.

Me letan Gouvernman ek sekter prive in a size, zot a kapab tal kart lo latab, pou vvar ki mannyer tou lede zot kapab travay ansanm pour ki pei avek tou son dimoun i ava benefisyé atraver sa demars ki Onorab William pe demande, atraver sa Mosyon ki ava bon pou pei.

E si i bon pou pei i pou bezwen bon pou son zabitan. E an menm tan i ava ed nou lo nivo rezyon ki asire ki nou komodite premyerman ava vin a ler, ki nou komodite premyerman i ava vin a ler, ki nou komodite i ava vin en pe pli meyer marse, e ki nou pti Seselwa i ava benefisyé avek sa bann tranzaksyon.

Parske ozordi parey nou tou nou konnen, deor lo trotwar i en pri, anndan dan magazen i en pri. Ler ou ase *wholesale* i en pri, e tousala i fer lavi vin en pe difisil.

E ek sa detrwa mo Mr Speaker mon ti a kontan pou mwan felisit Onorab William pour sa Mosyon. E mon ti a demann tou lezot Manm pou donn en sipor e parske sa i konsern nou pei e parey mon'n dir si i bon pou nou pei, i bon pou tou son zabitan, e i bon pour mwan osi. E avek sa detrwa parol Onorab William, mon pou siport ou Mosyon, e mon pou donn ou *full* sipor. Mersi bokou Mr Speaker.

MR SPEAKER

Mersi. Laparol i aprezan pou Onorab Aglae.

HON EGBERT AGLAE

Mersi Mr Speaker. Bonzour tou Manm Onorab e tou dimoun a

lekout. Espesyalman bann zabitan Port Glaud. Mr Speaker Mosyon ki devan nou pe demann Gouvernman pou kapab met an plas. Ouswa pou donn sipor, pour kapab kree en fason, komers lo transportasyon. Sirtou atraver delo pou kapab anmenn nou marsandiz isi Sesel.

Mr Speaker mon ti a kontan petet met en keksoz o kler avek mon lantervansyon lo sa Mosyon. Parey i enportan pour nou, tir politik kot i konsern sa Mosyon e demann ki pe ganny fer pour Mosyon.

Akoz pour mwan Mr Speaker, en lapel parey si nou kapab fer materyalize, i pou dan en benefis ekonomik sirtou pour nou rezyon. Me selman, sa ki enportan se ki model ki nou bezwen vin avek. E taler mon pou tous enn de, legzanp. Pour komanse mon krwar i enportan ki nou get nou koman en rezyon, sirtou sa senk pei ki dan larezyon - *Maurice, Madagascar Comoros, Maldives* menm si *La Reunion* li anba dominasyon Franse.

Me selman i enportan ki nou regard li osi. E kot i konsern the *volume of trade* ki egziste dan larezyon an term popilasyon. E ler mon'n fer mon resers met se sa senk pei ansanm Mr Speaker, nou

annan nou en popilasyon environ 30milyon dimoun, ki vedir en *economies of scale* apepre 30milyon ki nou kapab asimile. E antre e pran loportinite ki egziste.

Me selman pour antre pour egziste, ou kapab fer sa realite vini i pa en keksoz ki fasil. I bezwen annan bonn volonte sirtou avek bann *heads of state*. E la mon pou tous en pwen enportan kot i konsern, nou rol Sesel o nivo SADC.

E nou form parti sa *African Free Trade Area*, e ladan i annan sa ki nou apel sa SADC *Regional Integration*. Ki enkli sa bout komers ki enportan, ki mannyer nou koman bann pei larezyon, nou kapab fasilit komers antre nou sa rezyon. E mon santi poudir napa ase ki pe ganny fer, lo nivo Losean Endyen li menm dan nou rezyon.

Tou keksoz i vin santre o nivo kontinan ki a en pwen mon konpran akoz i fasil pour zot fer *trade*. Akoz zot napa gran *trade barriers* konpare ek nou ki bezwen sot losean. Tandis ki lo kontinan i annan zis bann *cross border* ki bezwen ganny fer. E pour mwan Mr Speaker, nou bezwen tonm dakor lo ki kalite fey derout ki nou pou bezwen pran.

Akoz mannyer Mosyon in ganny klase, mon pa pe vwar en lakonpannyen sorti Sesel lo li menm, fer en kalite lenvestisman dan sa magnitud. E ki i pou ganny sipor tou pei larezyon, an term ekonomik. Sa fey derout i bezwen komans par bann Gouvernman, bann *head of state*. Diskisyon i bezwen ganny fer.

E la kot mon pe dir sa lentegrasyon rezyonal i antre ladan. Kote diskisyon i bezwen komanse, Gouvernman Sesel parey ti pe ganny fer avek *tourism* en lepok. Ler ex-Minister St Ange ti la, kot ti vin ek sa konsep *Ile Vanille tourism*.

Si in marse, si i pa'n marse mon pa'n tro konnen. Me selman ti pou en konsep entegral ki ti pou gouvern sa nou bann zil Losean Endyen, kot i konsern domenn touristik.

Be nou kapab vin ek en model en pe *similar*, kot bann diskisyon Bilateral. E apre i a tonm lo nivo miltilateral akoz ler nou pe get rezyon, nou pa kapab mazin zis sa 5 pei li menm li.

Nou pou annan nou bann pei lo kontinan parey Kenya, *Tanzania, Mozambique* nou pou annan Sidafrik ki bordaz avek Losean Endyen. Mon krwar ki enportan ki zot osi zot bezwen kapab antre, dan sa formil,

pour nou kapab ganny en marse. Bon, ki mannyer petet mon santi i kapab ganny fer fas a sa bann zean. Akoz ozordi, sa bann *shipping liners*, zot en bann gran zean e zot kontrol e zot pe monopoliz *the shipping cargo* lendistri.

E i difisil pour ou koman en pti akter pou ou zis antre e vin *compete* avek zot akoz, ou mwayen ouswa ou kapasite koman en pti lakonpannyen, si ou pe al ou tousel, ou riske fel. E se sa kot mon pe dir la, sa konversasyon ant nou bann pei rezyonal, e nou bann pei ki *border* kontinan avek nou i bezwen annan bann Lakor ki nou bezwen diskite de la.

Tonm dakor ki fason nou pou fer li, ki bann *inputs* ki nou pou bezwen, e ki kalite metod transportasyon. Kalite sa ban *vessels* ki nou pou bezwen fas a bann defi ki serten pei ek zot Por zot annan ozordi parey Sesel ki li i napa en Por, ki nou annan sa bann *crane* enportan pou kapab tir sa bann marsandiz, fas avek sa bann bato modern ki egziste, ki zot pa bezwen. Sa bann *crane* abor zot bato.

So sa i bann diskisyon ki nou bezwen fer. E osi ki mannyer lenvestisman i kapab vini pour kapab moderniz ki nou, nou pe al dan sa direksyon

ozordi. Pour nou kapab moderniz nou Por pou fer li vin pli azour avek kalite servis ki sa bann *shipment* pe donn nou ozordi.

So Mr Speaker de la si bann kozri i *fruitful* nou tonm dakor lo en peryod lenvestisman ki tou pei dabor i bezwen mete. Akoz dizon ozordi fas a sa bann lensertitud ki nou annan dan lemonn global, bann mankman materyo de baz ki annan, ki pe koze osi bokou retar pour nou kapab arriv pou ganny nou bann *shipment* a ler.

E tanzantan kot nou pe vwar pe annan bann mankman. La ozordi ti annan mankman siman, en pe letan pase. La nou pe ganny problem, avek ponmdeter. Tousala i baze lo bann *availability of delivery*. E sa i enn bann faktor ek bann *challenges* ki lendistri, *shipment* i fer fas avek *ok*. I annan en kantite konpleksite dan sa biznes.

I pa en zafer parey ou pe pran en bato ou pe al lapes ou pe retournen, ou pe depoz ou pwason ater sa. I difisil sa, i annan konpleksite ki atase avek. E ler enn bann konpleksite sete akse avek marse, ki fer ki si ou annan bann *breakdown* dan *supply chain*, definitivman ou pou

annan bann *late shipment* ki pou arive pa pou arriv a ler.

E osi problem, parey Onorab atraver ou Mr Speaker Onorab John Hoareau in *encapsulate* sa byen, se sa bann mankman *container* ki ti pe egziste en pe letan pase, ki fer ki pri pou ou pey en *container* li menm li, pou aste, i ti preski double by 50poursan son pri.

E sa ki fer ki avek sa bann retar ki fer ki ou ganny ou en pli o *freight rates*. E sa i pa bon pou biznes, i pa bon pou lendistri, i pa bon pou lekonomi, i pa bon pour konsonmater, e i pa bon pou pei an zeneral. E tou pei i konpran, sa sirtou dan larezyon, anvi ki nou, nou bezwen depan lo sa.

Nou annan *issue fuel* ki'n monte osi ki'n definitivman i annan en lenpak lo sa lendistri li menm. E bokou pei, i annan bann sanzman ki zot fer avek zot bann *port dues and fees*, debarkasyon. Tousala i annan son bann lenpak ki vin avek.

E en domenn ankor ki'n en pe agrave, en pe letan pase se *the security of the route itself*. Nou'n fer fas ek piratri. Ozordi bokou bato pe vwar zot bezwen azout sekirite adisyonnel pou zot kapab fer zot bann larout. E osi i anmenn en kou adisyonnel tousala. Lanvironnman kot nivo lanmer petet, bann fason

kondisyon lanmer sirtou dan larezyon osi, i poz en danze. E i koz retar.

E tousala Mr Speaker i bann defi ki si nou pe mazin ekspoz nou koman en pei, en lakonpannyen ki pou ale i bezwen komans bann diskisyon lo la.

Lot pwen Mr Speaker petet ki nou bezwen koz avek se, ozordi nou annan bann *shipping agencies* ki baze ater Sesel. Ki fasilit bann tranzaksyon atraver sa bann lakonpannyen. Nou annan par egzanp *Mahé Shipping*, nou annan *Land Marine*, nou annan *Port Victoria Shipping Services*. So i bon enportan pour nou kapab ganny en pe zot gard avi osi, atraver sa Mosyon.

E Mosyon pa kapab fini la li. I bezwen annan diskisyon ki bezwen al ver zot, pour get en pe fezabilite, lo ki fason nou kapab pozisyonn en papye ater, pour nou kapab dir be lala Gouvernman.

Akoz Gouvernman i pa en eksper ladan li. Zot ki konn sa biznes, mannyer i *operate*. Zot ki konn bann kontrent. E zot ki konn bann *good side of the business* li menm. So baze lo sa zot a met en pozisyon ater. E la nou a dir Gouvernman i ava petet ekout zot. E la nou ava kapab pran sa, e anmenn li lo

en nivo rezyonal kot in neseser. Pour kapab *at least* komans en pa.

E Mr Speaker, nou Sesel mon krwar i enportan avek sa demars ki nou pe fer pou amelyor sa Por ki nou deza annan. E lenvestisman ki ava ganny mete li menm li, i bezwen en lenvestisman ki pou kapab anmenn nou di-si, ankor dan 50an. Akoz nou pa tro konnen e ki mannyer, sa lemonn biznes sirtou transbordman kargo pour ete a sa moman letan, ankor dan 20an, dan 25an, 50an.

I enportan pou met nou azour avek fasilite ki nou kapab a en pwen, ki okenn lenpak, ouswa okenn reazisteman mondyal nou, nou'n konnen nou'n pare. E nou kapab resevwar.

E an terminan Mr Speaker, en pwen kle ki mon krwar nou bezwen sezi, se ler nou, nou bann pei nou pe zwenn, nou pe koze e diskite, nou bezwen tonm dakor lo kalite marse, e osi kreasyon en *hub* ki enportan dan larezyon. E Sesel i tro ptipiti pou nou kapab vin en *hub*, pour fer bann debarkman ek transbordman.

Me nou kapab get en pei, ki annan ase lespas. En pei parey *Maurice* li menm, *Madagascar* li menm, kot i ava

vin sa *hub* kot bann pli gro bato petet i kapab vini, vwala zot met sa bann kargo la. E lezot bann lezot pti *carrier* ki nou pe mazin lo la, ki nou, nou kapab annan. Petet nou ava annan de ouswa trwa dan larezyon ki pe fer sa kalite transbordman. Sa bann kalite –

E zot ava kapab al laba e a sa pwen pour zot kapab pran nou bann karg pou anmenn Sesel. E osi i ava vin en sekirite, pour nou an ka si demen, i arriv okenn sityasyon konfli mondyal, politikman, lager dan en rezyon, kot nou pa pe kapab ganny akse.

Me nou konnen poudir be nou annan serten stokaz, kot nou *hub* laba ki kapab ganny redistribye avek nou koman en pei larezyon. Me selman tousala i vin avek serten volonte politik mon poudir. Pour nou kapab tonm dakor.

Akoz mon konnen poudir serten pei i annan defayans parey *Madagascar* i annan son prop defayans ekonomik. So lekel ouswa ki mannyer nou pou ed kanmarad la? Pour nou kapab vin koman en mayon, pour nou kapab fer sa Mosyon i le demande?

E pour mwan Mr Speaker, mon santi poudir Mosyon li menm li i pou adres en size ki, bokou Seselwa pe soufer isi dan

biznes, ki depan lo lenportasyon. Me selman nou bezwen bouz en pe pli devan. Akoz mwan pour mwan, Gouvernman tousel i pa pou kapab achieve sa ki sa Mosyon pe demande.

Be i bezwen annan ban partner rezyonal, lo nivo SADC osi pour nou kapab pouss sa e fer sa arive. Avek sa Mr Speaker, mon swet tou de bon pour sa Mosyon. Mersi.

MR SPEAKER

Mersi. Mersi Onorab, mon a prezan pas laparol Onorab Georges.

HON BERNARD GEORGES

Mersi Mr Speaker. Bonzour Mr Speaker. Bonzour tou bann Manm Onorab e tou dimoun ki pe swiv nou.

Mr Speaker, bokou in ganny dir lo sa Mosyon. Mon pa bezwen repet tou sa ki'n resorti bomaten. Sa pa pou anmenn nou okenn par.

Me mon krwar ki i, mon merite adres enn de size ki de-koul dan sa Mosyon. Akoz mon vwar en kantite merit dan sa Mosyon. I arriv a en moman approprie kot nou'n aprann atraver *COVID* ki mannyer nou lyen avek larestan lemonn i enportan.

E kot nou pe vwar la avek kriz ant Larisi avek Ikrenn ki mannyer nou sekirite alimanter, nou sekirite prodwi eksetera i osi enportan. E mon krwar lesion ki nou'n pran avek gard *Air Seychelles* koman en lyen avek lemonn pandan letan *COVID*, i menm lesion ki nou bezwen aprann la ozordi avek sa bann boulversman dan lemonn, ki pe menas nou sekirite prodwi ki nou bezwen dan nou pei.

E mon vwar sa Mosyon parey mon dir i vin en moman apropriye. E son demann i en demann apropriye. Sa ki mon vwar dan sa Mosyon se ki loter Mosyon e nou Lasamble si nou pas sa Mosyon, e mon espere ki nou pas sa Mosyon, nou pe demann avek Gouvernman pou fer sa ki bokou bann Manm bomaten in demande ki Gouvernman i fer, e sa se pou etidye sa sityasyon, avek en bi.

E sa bi se pou ankouraz en partenarya kot Sekter Prive pou annan son mo son parti prenon, pou fer ki nou annan en sistem kot nou pa bezwen depann zis lo bann bato kargo tradisyonnal. Akoz sa 2 rezon prensipal ki'n ganny sorti.

Premyerman kou transportasyon pe kontinyelman ogmante. E sa i fer ki sa konsonmater se li ki pe

pey sa bann kou. E nou bezwen fer tou sa ki nou kapab pou redwir lenpak sa bann kou ki pe monte.

E dezyenmman ki pri transportasyon ek pri komodite pou kontinyelman monte akoz nou size nou tro ptipti pou nou fer en lenpak avek bann *shipping lines*.

E donk zot pou sarz nou sa ki zot anvi sarz nou. Akoz kou deplasman pou anmenn en pti kantite prodwi i telman o. E mon vwar Mr Speaker, ki byento nou pou bezwen koman en Nasyon, pas dan en letid tre aprofondi, pou vwar ki mannyer nou bezwen e nou devret annan nou prop bato kargo pou gard sa *link* avek lemonn eksteryer.

E pou fer sir ki si lezot pa anvi fer li, nou, nou annan en posibilite pou anmenn prodwir dan nou pei. E mon krwar sa ki nou pli gran desizyon. Se eski nou devret *go eat alone* e fer donk fer en bato kargo pou nou? Oubyen si nou devret fer li lo en baz rezyonal?

Mr Speaker, mon pou dir tre kler, byen komansman ki mwan mon pa vwar sa bann Lakor rezyonal marse. Lepase in montre nou. Onorab ki'n koz avan mwan in mansyonn *Ile Vanille*. Ki retonbe annefe ki nou'n gannyen avek *Ile Vanille*? Apard en zoli slogan. Mon pa

vwar. La resaman avek Kenya. Nou'n osi antann sa parol ki toultan nou'n ganny dir. Si nou *join forces* dan tourism bann touris i ava kapab al fer en *two center holiday*.

Zot ava al en safari *Kenya*. E apre zot ava vin isi pou al lo lans. Zoli parol Mr Speaker. E en bon lide. En bon lespri. Me an realite mon pa vwar sa bann keksoz pe marse. Bann dimoun ki pou al en safari pou al en safari. Bann dimoun ki pou vin lo lans, pou vin lo lans.

Tre pe dimoun pou *combine* en *two center holiday* akoz i telman ser. E i telman difisil pou met an mars. E se pou sa rezon ki nou pe koz lo la depi zour ki *Kenya Airways* i vin Sesel. E nou *still* pa'n kapab fer li lo en lesel ki nou ti ava kontan.

Mr Speaker, nou annan Komisyon Losean Endyen. E ler Sekreter Zeneral Komisyon Losean Endyen ti visit nou Lasamble dan ou *meeting room*, nou ti rankontre avek li e n ou ti dir li. Napa vizibilite Komisyon Losean Endyen. Apard Zwe Des Iles, nou pa vwar gran keksoz.

E pourtan zot pe fer en kantite keksoz. Me nou pa konsyan koman en pei ki Komisyon Losean Endyen pe fer

en keksoz lo nivo rezyonal, pou fer larezyon bouze. Plito mon vwar ki serten zil i benefisy. E mon krwar nou devret enn fwa pour tou dir ki sa bann Lakor Rezyonal i enportan. E nou bezwen annan zot. Akoz linyon i fer lafors.

Me nou pa devret tonm dan pyez pou krwar ki zot pou marse dan nou faver. Akoz sa ki nou pe rode la se nou faver. Se nou pei ki bezwen sirmont sa bann defi transportasyon. Ek sa bann kou ek nou sekirite alimanter e ot.

E donk Mr Speaker, mwan mon plito krwar ki nou devret ekart lespri. Me sa pa, Mosyon pa pe demann nou pran en desizyon. Mosyon pe demann Gouvernman angaz li pou ariv a en solisyon.

Mwan mon plito krwar ki nou solisyon, i ava pou envestir dan en bato kargo pou nou pei. Ki ava kapab li al rod son bann komodite ler i manke isi e la.

E mon dir sa, mon dir sa Mr Speaker, akoz in annan plizyer lesey dan lepase pou fer en bato kargo rezyonal.

Mr Gilly kot Gondwana ti'n koman enn *Seychelles Fishing Line*, ki ti sipoze kas sa monopol Maersk ek bann lezot gran laliny. Ki'n arrive? in fermen. *Aquarius Shipping* - nou *Aquarius Shipping* isi Sesel,

mon fek ganny rapel bomaten ti'n fer en laliny ki ti apel *Mare Austral* ki ti pou fer egzakteman sa ki nou pe koz lo la. Pou deservi la rezyon. Ki'n ariv ozordi? I pa'n kapab tenir le kou.

Pourtan, pourtan e i pa'n tenir le kou, prensipalman akoz bann enportater pa'n siport li. Akoz enportater zot annan zot lyen avek bann gran lakonpannyen. E zot pa'n anvi siport en lakonpanni rezyonal. E se la kot problem i ete, akoz sa balans ki Onorab Aglae in koz lo la. Se en balans ki nou bezwen kontinyelman okouran.

Akoz le moman ki nou pou fer nou pti bato nasyonal oubyen rezyonal, e ki nou pou pran en pe biznes avek bann gran laliny. Ki zot pou arrive? Zot pou fer monte zot pri oubyen zot pou aret vini. Alor nou bezwen annan en balans ant gard sa pti git ki nou annan akoz i enportan.

Me osi annan sekirite pou si zot, zot pa vini. Oubyen si bann pri i mont tro o - tel parey nou pti *Air Seychelles* i fer, nou ava annan sa sekirite la.

E mon krwar se la kot Gouvernman pou bezwen fer sa balans. Me mon krwar ki, e mon konvenki ki sa lide i enn ki kapab marse. E mon dir sa akoz mon konnen ki dan

Gouvernman deza sirtou lo kote Minister Finans ki byen konsernen avek bann pri ki pe monte.

Mon konnen ki deza zot pe mazin, zot o komansman sa refleksyon. E mon konnen ki zot e fer sa refleksyon. E depi byen lontan ti annan lide pa fer en bato kargo, me plito fer en avyon kargo. Aste en avyon segonn men. En avyon, pa en avyon jet, me en avyon avek lelis.

Ki ti ava kapab anmenn nou pwason. Pran komodite *Madagascar*. Anmenn isi Sesel. Al *Kenya*, la ki nou pe koz avek *Kenya*. Me kekfwa avek pri karbiran ozordi, nou pa devret regard dan en avyon kargo. Me nou devret regard plito lo en pti bato kargo nasyonal, ki a kapab al dan sa bann pei otour nou rezyon. Anmenn nou prodwi e retourne avek bann prodwi ki sa bann pei i prodwir.

E se dan sa loptik Mr Speaker, ki mon krwar ki nou bezwen siport sa linisyativ sa Mosyon ki Onorab William in anmennen.

Akoz se en moman refleksyon pou nou. Set en moman kot nou bezwen ankouraz Gouvernman dan son demars ki i pe fer pou li kapab met an plas sa ki nou ti ava swete gannyen.

Mr Speaker, nou en pei brav. Avek en bann dimoun ki pare pou pran risk. E nou'n vwar par lepase ki bann keksoz ki zanmen nou ti'n mazinen ti pou arive, in arive isi dan nou pei.

Air Seychelles li menm ti en desizyon brav ki ti ganny pran en moman kot ti annan problemm avek koneksyon. E ozordi, 40an pli tar. Sa laliny aeryen i *still* la. Sete en desizyon ki i bezwen ganny pran e ki ti ganny pran.

Cat Cocos par egzanp. Lekel ki ti mazinen ki ler *Air Seychelles* ti annan plito monopol lo deservi Praslin, La Digue, *sorry* Praslin, Mahe. Lekel ki ti mazinen ki en *ferry* grander *Cat Cocos* ti pou ase biznes? E pourtan se en keksoz ki sekter prive in fer, ki tre rantab. E ki anmenn en servis fantastik pou nou popilasyon.

Donk nou en pep rezilyan. Nou en pep brav. Ler i pou'n ler pou pran bann desizyon parey nou pe ganny demande pou siport Gouvernman pou pran ozordi, *we will stand up. We will face the challenge* Mr Speaker. E nou ava kapab fer li. Alor avek sa de mo mon ti ava kontan aport mon sipor pou sa Mosyon Onorab William.

E swete ki Gouvernman i pran li *onboard* e i met li an

aplikasyon pou komans sa letid osito ki posib. Mersi Mr Speaker.

MR SPEAKER

Mersi Onorab Georges. Nou ava pas lo entervansyon Onorab Porice.

HON DOYACE PORICE

Mersi Mr Speaker. Bonzour Mr Speaker e tou bann Manm Onorab. E tou dimoun ki a lekout.

Mr Speaker, sa Mosyon anmennen par Onorab William in arriv dan en bon moman. Kot Gouvernman pe sey aranz nou pri lavi e atraver sa demann dan sa Mosyon, i pou aranz plis nou pri lavi.

Kot nou tou nou konnen ki Sesel lamazorite nou komodite nou enporte. E atraver en bato kargo lo nivo Nasional ou rezyonal pou ede siport nou depans. E redwir nou pri lo bann komodite.

Parey nou konnen osi ki lager aletranze pe fer ki tou pei pe ganny afekte. E Sesel nou pei osi pa'n ganny eparnye. I osi annan pri karbiran ki pe osi fer ki nou pri lavi i monte atraver transportasyon lo tou nivo.

Mon santi Mr Speaker, ki Sesel in kapab envestir lo 5 *tankers*. E pour kwa pa ki nou kapab envestir lo en bato

kargo? Nou annan bokou Sekter Prive ki kapab antre an partenarya avek Gouvernman. pou ede anmenn sa benefis pou nou pti pei Sesel.

Nou konnen ki pa tro fasil. Me i pa osi sitan difisil pou antre dan en tel proze parey. Kot pou ede tir sa bann difikilte ki nou pei pe pas ladan. Nou en Gouvernman ki pe rod tou fason pou amelyor lavi nou sitwayen. E pe esey abes nou pri lavi. Me Gouvernman i bezwen get ankor pli lwen.

Mr Speaker, sa ki Mosyon pe rode. I pou ed osi nou bann pti biznes. Ki pe debourye. Kot zot osi zot ava benefisy, atraver transportasyon. E la kot zot ava kapab fer zot pri marsandiz vin en pti pe pli ba. Ler biznes i benefisy nou pei e nou pep osi i kapab benefisy lo zot kou lavi.

Mr Speaker, Gouvernman i bezwen osi vey byen bann biznes ki nou envestir ladan. Nou bezwen fer en bon letid lo la. Get dan son bon kote e osi move kote. Gouvernman i bezwen fer letid lo bokou keksoz. E anmenn sekter prive pou antre e siport li, pou arive *achieve* sa ki pli bon pou nou pti pei Sesel.

Wi, touris i antre bokou. E nou pe kas rikord. Nou benefisy dan en lot fason. Me

nou bezwen fer sa touris osi kontribye plis dan nou pei atraver nou bann keksoz lokal, kot i ava aste. E anmenn plis larzan pou siport nou pei. Mon pou felisit Onorab William pou sa Mosyon vreman valab.

Avek sa de mo, mon pou pare pou siport sa Mosyon. E demann Gouvernman pou pran sa o serye pou benefis nou pti pei Sesel. Mersi.

MR SPEAKER

Mersi. Nou ava pran poz la. E nou ava kontinyen lo deba. Nou ava rezwenn 11er parey *schedule*. Mersi.

(BREAK)

MR SPEAKER

Mersi. Mon ava prezan apel Onorab Cosgrow pou son lantervansyon.

HON WALLACE COSGROW

Mersi Mr Speaker. Bonzour Mr Speaker. Bonzour tou Manm Onorab. Bonzour tou dimoun a lekout.

Mr Speaker, mon pou entervenir lo sa Mosyon bomaten. Akoz mon santi i en Mosyon ki merit serten latansyon. E serten, petet serten en pe mon pwennvi lo sa size. Mosyon bomaten Mr Speaker pe demande ki

Gouvernman i etidye posibilite pou etabli en laliny bato kargo, pou nou Sesel, ouswa e laliny pou rezyon Losean Endyen.

Mon sipoze Mr Speaker, sa nide i enn ki'n vin devan an rezulta en sityasyon global ozordi. Kot kou transportasyon mondyal i enn ki tre elve.

E pe menas bann pti lekonomi parey Sesel. Annefe i en realite ki pa zis bann pti pei parey Sesel ki pe fer fas avek. Bokou bann gran pei osi zot pe war, zot pe war li vreman difisil pou zot kapab fer fas avek sa pri tre elve dan kou transportasyon. Sirtou bann kou transportasyon atraver bato.

Mr Speaker, kwa ki'n kre sa sityasyon? Mon krwar i enpotan ki nou demann nou lekor sa kestyion. Kwa ki'n kre sa sityasyon? I osi en analiz Mr Speaker ki bokou pli konplike petet ki bokou nou i kapab konpran. Akoz Lendistri Transportasyon i par natir enn ki tre konplike. E kontrole par bann lakonpannyen zean. Bann gro lakonpannyen.

Tel koman *Maersk*. I annan detrwa lakonpannyen osi ki'n ganny nonmen bomaten. Mon pa pou al ladan. Me enn bann keksoz ki nou konnen. I se ki i annan o mwen 2 fakter ki tre kler. Ler mon dir

2 fakter ki tre kler mon *mean* 2 fakter ki ozordi ki petet nou war lo en nivo mondyal pe afekte kou transportasyon. E bann pri elve ki nou pe war dan bann kou *container*.

Premye Mr Speaker, i kler ki pandemik *COVID-19* ki'n afekte lemonn antye. In kontribye, i enn sa bann fakter. Sa pandemik li menm in anmenn bokou boulvers dan komers mondyal, kot sa sistenm komers ki nou konnen e abitye avek. I pa zis, i pa en sistenm zis e parfe.

E in vin pli enzis sirtou pou bann pri pei parey Sesel pandan bann letan *COVID-19*. Bann pli gran prodikter lemonn parey La Sin. Zot bann lendistri in preski dir *at a standstill*. E zot pa'n preski dir prodwir, parey zot ti abitye prodwir bann lannen avan pandemik.

Alors Mr Speaker, enn bann prensip fondamantal ekonomik - sa ki nou dir *demand and supply*. Ki bokou i koz lo la, fondamantal e senp. I dir ki ler napa demann. *Supply* i ganny restrikte. E sa i annan en lefe lo pri.

A mon avi Mr Speaker sa i egzakteman ki'n arive pandan sa letan pandemik. Kot tou pei ti swa dan *lockdown*. Ouswa pe fonksyon lo en *minimum*.

Dezyenm faktor ki lezot Manm osi in osi koz lo la, e ki bokou dimoun i koz lo la ozordi, se lager *Ukraine*. Ki pe kre en kantite lensertitud atraver lemonn. E pe osi sa ki nou dir *disrupt* en kantite komers dan serten komodite tre enportan. Parey petrol, dible e osi delwil.

Mr Speaker, mon komans koumsa, akoz mon santi i enportan ki nou konpran rezon pli evidan akoz ki nou pe eksperyans sa bann pri elve ozordi dan kou transportasyon.

Alors eski sa sityasyon ki nou pe eksperyanse ozordi. E tou sa lensertitud i enn ki tanporer? Ouswa i en ki pou persiste? Sa kestyon i enportan Mr Speaker.

Akoz i enportan pou nou konsidere. Akoz okenn desizyon ki Gouvernman i pran dan sa laliny, an sa ki konsern sa Mosyon ki devan nou, i pou bezwen fer sir i balans posibilite e vyabilite lonterm en tel *venture*.

Parske Mr Speaker lenvestisman dan sa domenn i pou enn ki tre elve. Par dabor bann Manm in mansyonnen. Onorab Hoareau boner in donn detrwa pri par egzanp pri bato kou bato, pou kapab fer sa bann lenvestisman. E nou pa anvi war nou dan en sityasyon

kot sa nide i perdi son lisilite a longer di tan.

Ki mon pe sey dir Mr Speaker, se ki nou pa reakte a en sityasyon ki wi, i en difikilte ozordi. Me nou pa reakte en sityasyon ki petet a lonterm i kapab aziste son lekor. Nou pa kapab antre dan sa lendistri atraver parey sa ki Angle i dir Mr Speaker, en *knee jerk reaction*.

Si nou pou antre dan sa lendistri i bezwen en lendistri ki vyab. Nou bezwen asize analize. E konpran par egzanp la kantite volim komers, *trade* ant Sesel e larestan lemonn. E osi komers ant la rezyon ek Sesel. E la rezyon avek larestan lemonn. Nou bezwen osi mazin lo konsonpsyon e similarite komers dan la rezyon.

Sa ki Sesel i *consume* par egzanp, i pa neseserman parey sa ki *Madagascar* i *consume*. Sa ki *Maurice* i *consume* ouswa sa ki *Comore* i *consume*.

La nou pe tir en pti pe *La Reunion* ladan. Akoz in ganny dir boner poudir i annan son prop fason laliny ki deservi li.

Mr Speaker en lot keksoz ki mon anvi petet met devan. Konmsi mon met devan tou sa ki pe ekout nou, se en konversasyon ki mon'n deza gannyen en pe letan pase an se

ki konsern nou volim *trade* sorti Sesel.

Sa ki mon'n ganny met en konpran se ki nou ankor pe benefisyé avek bann laliny bato ki vin Sesel. Sirtou sa bann gro laliny bato. Akoz volim *container* ki zot kapab tire. Osi tire lo Por. E sa i prensipalman - i prensipalman atraver volim eksport ki *IOT* i fer.

So *IOT* i en, sa ki nou apel en gran *player* dan nou lekonomi - wi. Me osi an term volim *trade* ki nou fer avek larestan lemonn. Bokou, well mazorite kargo *IOT* i destinasyon Lerop. E mazorite - E i annan osi kargo ki *IOT* i enporte. Si mon memwar i servi mwan byen, kot zot enport serten komodite sirtou pwason dan bann pei ki sorti dan pei Atlantik, ki sorti dan lanmer Atlantik.

E sa *IOT* i fer li konstaman. Sa eksport avek sa *import*. So preznan nou bezwen asize mazinen, eski en laliny Sesel - Bato Sesel ouswa en laliny bato rezyonal, eski i pou dan nou lavantaz ozordi or dan *medium term* pou nou eksploré? An vi ki letan nou get nou *trade* ki nou, nou pe fer avek larestan lemonn, eski sa laliny bato ki nou anvi kree.

Or ki nou pe mazin kree i pou deservi nou pei, nou

biznes, nou lekonomi, dan en fason ki rantab e vo lapenn?

E osi pa bezwen blyie Mr Speaker, ki si dizon demen bomaten nou retir sa mazorite volim ki nou pe eksport, ouswa ki nou pe enporte dan lanmen - e sa mon krwar sa kestyón in ganny zwe en pti pe avek par Onorab Georges - dan lanmen sa bann gran lakonpannyen par egzanp *Maersk*.

Eski i pou vyab pou zot demen anmenn marsandiz Sesel ouswa tir marsandiz Sesel? Eski i pa pou fer ki zot pri i vin pli elve? Or eski i pa pou fer ki zot disparet net dan nou rezyon Sesel? Akoz deza nou volim i pti git pou zot. Eski i pa pou fer ki zot petet zot pa operate Sesel?

Mon pa pe dir i pou le ka. Me selman i bann analiz ki nou bezwen fer. E dan plas ki nou benefisyé, nou war nou dan en sityasyon kot nou vin pli dezavantaze? So nou bezwen kalkil tousala, avan ki nou petet pran en desizyon ver fer en laliny bato ki pou deservi Sesel ouswa Losean Endyen.

En lot keksoz petet ki nou osi nou bezwen mazin lo la, Mr Speaker. Se lentere endividiyel sak pei pou annan en lavolonte, pou annan en partenarya ant kanmarad. Sa osi in ganny koz en pti pe lo la. Me nou bezwen

realize. Lentere Sesel avek lentere Moris dan komers. Ouswa *Madagascar*, i pa neseserman alinyen.

So eski ler nou pa pe aliny parey an term komers, *trade*. Ouswa dizon par egzanp mazorite nou, nou bann komodite ki nou pe konsonmen nou pe enporte. I pe sorti dan en parti lemonn.

Moris pe sorti dan en lot parti lemonn. *Madagascar* en lot. An vi nou bann differan, mon pa pou dir *cultural ties*. Me selman nou bann *ties* ki nou'n annan dan lepase. *Historical ties*. Eski petet sa i pa pou fer li vin en difikilte?

Mon pa pe dir i enposib. Me selman sa osi i bann keksoz ki nou bezwen analize. E i bezwen annan lavolonte politik. Lavolonte partenarya antre nou avek sa bann lezot pei. An dizan sa Mr Speaker, mon krwar ki poudir sa kestyon - Sa kestyon annefe i en kestyon ki'n deza lo latab pou en bon pe letan.

I en kestyon ki Gouvernman avan osi in asize in zwe avek, in mazinen. Me mon krwar son konpleksite. Lafason ki mannyer nou *achieve* sa. In fer ki bann petet diskisyon swa i ankor *ongoing*. Ouswa diskisyon i enn ki pa'n arriv le en nivo ki petet ozordi nou tou nou ti ava voudre.

Me selman in en kestyon ki'n toulstan la. In en kestyon ki'n toulstan osi ganny poze par nou pep, an vi ki bokou fwa bann dimoun dan bann pozisyon responsab in touzour met sa bann nide devan.

E i en keksoz, i en diskisyon ki'n toulstan ganny fer. Menm parey diskisyon ki'n ganny fer avek transportasyon petrol. Ozordi bokou fwa in ganny dir ki poudir akoz nou pa servi nou laflot *tanker* ammenn petrol Sesel?

E petet sa model ki nou le servi pou kargo. Me nou war ki poudir malgre nou annan laflot *tanker*. I pa neseserman vyab pou menm nou *tanker* vin Sesel ouswa la rezyon. Zot pe *operate* dan bann lezot landrwa kot volim. Kot biznes i bokou plis. Pou fer li vin en biznes vyab.

So, mon santi Mr Speaker ki sa i en diskisyon ki parey mon'n dir i tre konplike. I en diskisyon ki nesesit bann dimoun, bann eksper dan sa domenn.

Petet osi avek led bann lorganizasyon mondyal. Lorganizasyon maritim ki annan bann eksper dan sa domenn, pou donn nou en koudmen si vreman nou anvi al dan sa laliny.

Me si nou pran sa laliny. Si nou pran sa laliny. I bezwen

en keksoz ki byen kalkile. E en keksoz ki pa apre 3 a 4an. Kot nou war pri stabilize onivo mondyal.

E ki prezan sa *venture* ki nou nou'n fer, i vin en *venture* ki pa vyab. E i vin en *venture* kot swa nou bezwen abandonn li swa nou bezwen rakoursi li.

E prezan nou'n fer nou en *commitment*, lezot laliny swa vin pli ser swa i abandonn nou. Apre nou war nou dan en sityasyon kot nou pri i vin bokou pli difisil dan le fitir.

So Mr Speaker, mwan mon anvi ki nou apros sa avek bokou kosyon. E mon anvi ki *whatever desizyon* ki nou pran, ki Sesel i pran, i bezwen pran li tre enformen pou benefis Sesel e pep Seselwa.

So avek sa de mon Mr Speaker mon pou aret la e mon ava ekout lezot deba lo Mosyon. Mersi.

MR SPEAKER

Mersi Onorab. Bon mon ava donn laparol Onorab Wavel Woodcock.

HON WAVEL WOODCOCK

Mersi Mr Speaker. Mr Speaker, mon pou komans mon entrevansyon par premyerman pou felisit nou Gouvernman pou bann bon desizyon, ki zot in pran ki i ozordi nou'n arive

kas rikord 2021. Pou lakantite touris ki ti ariv. Ki'n ariv dan nou pei.

Annefe an 2021 ti annan 177 mil 504 viziter ki ti debark lo later Sesel. E lannen presedan 2020 ti annan selman 114 mil met li 115 mil viziter.

E mon pou osi felisit Lepep Seselwa pou zot rezilyans pou ki ozordi nou'n arive *achieve* sa. E par lagras Bondye si tou keksoz i al byen nou kontinyen ganny *arrivals*, sirtou la ki nou'n antre dan *peak season*. Ki nou ava kapab arriv *at least* 300 e menm sot 300 ekek mil viziter lo nou later Sesel.

Mr Speaker, baze lo lenformasyon ki'n ganny kolekte. Annefe resers e travay ki bann *economist* enkli Labank Santral in fer, baze lo sa bann lenformasyon ki zot kolekte e bann *analysis*.

Ki sa bann ekonomis in fer. I montre ki le rezon akoz ki menm si nou Roupi in *appreciate* ozordi - sorti R22 par Dolar pou vin R14 par Dolar ozordi.

Annefe ozordi menm *Euro* i preski menm kantite avek Dolar. I pa'n fer gran diferans dan kou komodite lo marse lokal Sesel.

Sa parey enn de Manm in fer resorti se akoz 2 fakter

prensipal. Enn, komodite globalman in ogmante. Enkli materyo brit. Bann *raw materials* ki nou servi pou fer plizyer bann prodwir. Bann *products* ki nou bezwen.

E sa osi i akoz plizyer rezon. E pou plizyer rezon. Parey enn de entervenan in tous en pti pe lo la - *scarcity* serten materyo debaz. Sirtou parey mon'n dir ki ganny servi dan prodiksyon plizyer bann komodite.

La mon pe koz bann materyo parey delwil, parey *grains*. Nou tou si nou pe swiv nouvel enternasyonal nou pou war parey nou'n war Larisi in sezi plizyer bann kargo, *grains*.

E *Ukraine* pa pe kapab prodwir sa kantite *grains*. E enport lakantite *grains* parey i ti'n fer dan lepase. Sa i enkli *wheat*. E plizyer bann lezot materyo brit - bann prodwir.

Bann komodite enportan ki lemonn i bezwen Mr Speaker. E osi nou konnen byen dan bann lannen ki'n pase *issue* avek prodiksyon delwil. Barik delwil ti'n monte, ti'n kas rikord bann pri lepase. Menm la si i annan serten stabilite dan kou barik delwil. Me selman nou konnen poudir sa i *volatile*, i kapab sanze nenport ler.

I *fluctuate*. Ozordi i ba demen i kapab mont ankor. E

nou'n osi war *scarcity* bann gas parey *LNG*. Zisteman lensidan ki ti arive pa bokou letan pase kot Larisi ti ferm tiyo. E nou war ki problem i kapab kree pou enn de pei Lerop parey Lalmanny.

E dezyenmman en lot keksoz fakter ki pe fer ki komodite Sesel. Bann komodite Sesel i kontinyen monte, se akoz kou *freight, shipping container* ki'n kontinyelman ogmante. E parey nou konnen Sesel nou enport preski tou keksoz.

Nou depan lo lenportasyon pou tou nou bann *needs alimanter*. E *container, freights rates* in ogmante par plis ki 150 poursan ozordi Mr Speaker, E rezon akoz ki sa in ogmante Mr Speaker, i kler tou bann statistik, tou bann *economist* i eksplik sa byen.

Si nou, nou pe swiv bann, sa ki pe arive aletranze osi Sesel. Nou pe ekout nou bann *economist*. Menm Labank Santral pe eksplike. Nou tou nou konnen poudir enn bann rezon prensipal akoz *container* in ogmante se akoz pandan Pandemik *COVID-19* ti annan konsesyon *containers* lo bann Por.

Bann *containers* pa ti bouze parey avan. E osi akoz *shortage containers* pandan

letan COVID. E ki'n arive bann Por pa ti'n pare pou sa *speedy recovery post-COVID*. Apre ki kantite ka COVID in kontinyelman desann. Lekonomi mondyal in tant *recover at en pace* ase vitman. Ki osi ede pou kre serten sa konzesyon e retar dan *delivery plizer bann containers*.

E par lefe ki COVID ti'n tape partou dan lemonn Mr Speaker, *Inventory* ti'n koupe pandan letan COVID. *Inventory plizer bann lakonpannyen, lamazorite bann lakonpannyen* ti'n redwir *inventory* ki zot ti bezwen. Menm stokaz bann lakonpannyen tousala ti'n redwir.

E la ozordi ki lemonn pe refer, tou lakonpannyen pe *rebuild zot business. Stockpiling* in ogmante. Tou lakonpannyen pe refer, pe ogmant zot *inventory* pe *order plis keksoz. Plis goods*.

E ki fer ki i annan bokou plis demann pou *containers*. Alors sa i fer ki i annan en logmantasyon lo pri pou *containers*. Akoz i annan plis *demand ki supply*.

E sanmenm sa ki ou war ozordi ki kou *container* in ogmante, in double, menm pres triple. Akoz sa bann faktor ki mon fek mansyonnen. En lot faktor ankor ki in ganny fer

resorti se plizer bann lakonpannyen, bann bato kargo pa tro le vin direk Sesel akoz *volume containers*.

Akoz lakantite kargo marsandiz ki nou fer vini - Sesel i en pti pei, i pa parey *volume* ki bann lezot pei i enporte. Alor ki fer ki zot prefere *divert* dan bann lezot pei. Akoz Sesel i pa neseserman as *profitable* parey bann lezot pei ki enport marsandiz.

Ki bezwen plis *containers* ki bokou pli profitab pou zot. E sa i en faktor ki ennler in fer ki enn ler nou ganny retar avek *containers* ki antre dan pei, ki'n annan retar pou arriv Sesel ki osi ennler i met retar avek serten bann komodite ki nou gannyen lo marse.

Mr Speaker, mon bezwen fer resorti osi parey enn ou de Manm in mansyonnen - mon krwar Onorab Gorges osi in tous en pe lo la. Si mon pa tronpe Onorab Aglae osi in koz lo la.

Zot in fer resorti ki Sesel zot nou'n siny plizer Lagreman. E en Lagreman enportan ki nou'n sinyen - Annefe ler nou ti lo Parlman Lafrik, mwan en Manm ki lo Komite pou *trade* lo Parlman Lafrik. Sa size *ACFTA Agreement* ti monte. *African Continental Free Trade Area*.

E Mr Speaker, an plis ki petet get dan posibilite pou nou annan nou prop bato kargo, nou kapab osi fer lezot keksoz i pou ed nou koup lo lenportasyon. Par egzanp si nou fer plis *trade* avek bann pei la rezyon.

E ankor enn fwa i annan enn de Manm ki'n mansyonn sa. Akoz bann pli pre - ler mon pe koz bann pei dan la rezyon mon pe koz bann pei dan Losean Endyen.

E bann pei lo Kontinan Lafrik. En pe pli pres avek nou. La mon pe koz lo bann pei dan Sid Lafrik e osi dan Les Lafrik ki nou'n form par plizyer Lagreman ansanm. E menm bann Lagreman Bilateral. Ler nou pe enport keksoz pli pre avek nou, i pou fer ki sa *shipping cost* pou redwir. I pou mwens ki ler nou pe enport keksoz sorti dan bann lezot pei.

Me par kont menm si mon pe dir sa, mon konn en pti pe defayans ki nou annan osi lo nivo Lafrik. Annefe enn bann defayans ki lo nivo Lafrik se bokou bann prodwi sorti lo nivo Lafrik petet i pa lo standar. Zot pa pe prodwi sa bann kalite parey ki standar i demande lo standar enternasyonal.

E ozordi nou annan, nou'n siny bann Lagreman *Biosecurity*. So nou bezwen fer

sir kwa ki nou enport dan nou pei. Me par kont, i en pti pe sagrinan ki bokou nou bann pei zanmi, bann pei dan la rezyon dan Lafrik pe ganny eksplwate par bann pli gro pei parey Lasin ek menm Lenn. E lezot bann pei Lerop, ki fer ki petet zot napa sa kapasite pou prodwir sa bann keksoz lo en standar ki nou bezwen.

E sa i kre en sertern problemm pou nou. Kot petet nou reste en difikilte pou nou ganny sa bann keksoz, ki nou ti kapab gannyen. Zot annan sa bann keksoz lo bann, zot prodwir i plizyer bann keksoz, bann parey mon pe get *La Tanzanie* par egzanp.

Lanmenm la o bor nou. Tou le lannen i annan en *fair zot* fer kot zot vann bann diferan bann prodwir agrikol. Mon krwar an si mon pa tronpe an Out ki zot fer sa. E ou war prodiksyon nivo Lafrik i vreman, vreman o.

Me petet *challenge* pou zot enport zot bann keksoz. I annan sa *issue packaging*. I annan sa *issue eksportasyon*. Konmsi petet nou si nou kapab get dan posibilite antre dan en Lagreman, ek bann pei Lafrik zot menm.

Parey en Manm in fer sorti ki dan Lafrik nou pa *trade* ase avek kanmarad. *In fact*, ozordi

Lafrik i enn bann pei ki annan plis bann, ki prodwir plis *raw materials*. Plizyer bann prodwir, bann komodite ki nou bezwen. Mon pe koz ou ki nou konsonmen osi, legim, fri, lavyann isi laba.

La mon mazin parey *Madagascar* o bor nou. *Madagascar*, sa ki *Madagascar* i prodwi enkrwayab. Me selman petet son *packaging* i en *issue*. Kalite ler pou enport li i pa lo sa standar, sa kalite ki zot kapab *package* li. Pou kapab enport dan bann pei.

Me petet bann pei dan la rezyon. Nou kapab get dan posibilite menm Sesel. *I dont know*, akoz ki en Seselwa ozordi pa kapab al envesti dan sa bann pei. Ouver lizin. En fason pou *package* sa bann *product* pou enport Sesel. Pa neseserman zis Sesel, me enport osi dan bann lezot pei la rezyon.

Konmsi Lafrik nou bezwen get pli lwen. Nou pa kapab toultan kontinyen les bann lezot pei - bann lezot pei Lerop ouswa Azyatik, vin dan nou pei eksplwat nou bann keksoz.

Zot ler zot pou pran nou keksoz, zot pou *package* li byen zot. Fantastik. Zot pou pran nou dyanman, zot pou pran nou legim, zot pou pran ou lavyann. Zot pou fer met son

prezervasyon. *Package* li byen dan en fason, lo en standar. Lo en nivo enternasyonal.

Ki zot pou kapab enport sa bann keksoz. Be nou, nou pa pe fer sa. Nou pa pe envestir dan bann pei Lafrik. E petet sa en keksoz ki, sanmenm sa mon pe dir.

Siny Lagreman i fantastik li. ACFTA i en *wonderful Agreement*. IAC nou ti diskit lo la, ti vin devan nou Lasanble, nou ti ratifye.

Me lenplimantasyon lo nivo Lafrik, sa i enn bann defayans ki nou annan. Ki'n mon krwar *going forward* nou bezwen komans met lanfaz lo nou bann keksoz ki nou prodwir rezyon Lafrik.

Ki nou kapab enport bann keksoz pli pre avek nou. Ki nou bezwen al enport keksoz sorti dan bann pei bokou pli lwen. Lasin, Lazi ouswa bann pei Lerop, ki kout nou bokou, bokou pli ser.

En lot keksoz ankor ki enn, de Manm in koz lo la, se pou get dan posibilite antre dan partenarya ek bann pei zanmi.

Bann pei zanmi, dan la rezyon. E petet Moris i en pei ki'n monte. E lezot pei petet parey mon dir dan rezyon Sid, Les Lafrik osi. kot nou kapab *build* nou prop - Ouswa *purchase* nou prop bato kargo,

kot nou kapab fer parey mon'n dir, bann larout la rezyon, pou enport nou bann, eksport nou bann komodite ki nou bezwen.

Sa Mosyon osi pe demande ki petet nou kapab konsider donn finansman. Ankouraz sekter prive pou antre ladan.

Mon krwar Onorab Georges in koz lo *Gondwana* lontan. Me ti annan bann bato ki nou ti annan ladan ki ti fer sereten sa bann larout. Me selman petet ti napa sa volonte Gouvernman dan le pase pou envestir ladan. Pou ankouraz sa.

Mwan mon pa pe dir annan al envestir dan en gro bato kargo parey sa enn ki ti blok *Suez Canal - Evergreen*.

Me petet nou kapab annan en konmsi en standar en nivo en groser ki pou pli soutenab pou nou. Ki pou pli *cost efficient* pou nou. E Mr Speaker nou bezwen komans ptipti. Nou pa kapab dir pa fer. Nou pa kapab toultan negativ. Nou dir be sa i enposib sa.

Ou konnen annou pran legzangp Mr Speaker - mon pa bezwen al lwen. Annou get Sesel menm. Mahe, Praslin enportasyon bann kargo. Lontan ti annan bann bato vwalye. I mean Pralinwaz.

Lontan nou ti annan pralinwaz ki ti fer larout Mahe/ Praslin.

Praslin/ La Digue, Mahe/ La Digue. Me ozordi zot in evolye. Ozordi zot annan bann bato kargo pli avanse.

Ozordi nou annan lespar. E zis annou pran kont osi bann bato pasaze. Mannyer ti ete lontan? Ti bann bato vwalye. Ozordi nou annan *Cat Rose*, nou annan *Cat Cocos* avek bann bato ki pran *around 200 ekek* pasaze.

Nou pa ti lo sa nivo avan. Nou'n evolye. Akoz nou'n envesti. Ti annan finansman available. Ti annan lankourazman. Lavolonte Gouvernman. E sa osi petet i en keksoz ki nou bezwen gete, si nou pou ankouraz bann envestiser lokal pou antre ladan.

Si fodre antre dan, parey ozordi nou kontan koz lo *PPP - Public Private Partnership* avek bann biznes dan sekter prive.

Or parey mon'n dir antre dan en bann partenarya avek bann lezot pei la rezyon pou annan bann bato ki fer sa bann larout. Petet sa i bann keksoz ki nou Gouvernman i merit konsidere. Fer zot resers. Zot bann analiz. Si i pou vyab ouswa non. Me osi en keksoz enportan se sa Mosyon i pa la

zis akoz nou pe dir lo kote koup kou.

Me selman nou pe mazin ou sekirite alimanter osi. *You never know* ki i kapab arive demen. Nou pa konn sityasyon ekonomik lemonn mannyer i ete. Si sa bann bato i deside pou dir nou Sesel i pa vyab. I pa profitab pou zot vin anmenn *container* Sesel.

Alor nou petet nou annan en *backup plan*. Nou annan en *safety net*. En fason ki nou kapab asire ki nou ganny bann komodite esansyel. Nou annan sekirite alimanter. E sanmenm sa rezon ki Mr Speaker mon santi poudir i annan serten merit sa Mosyon ki nou pa kapab zis *dismiss* li.

Mwan mon krwar i en bon Mosyon. E annefe mon santi poudir Gouvernman i bezwen ekout sa Mosyon. Fer zot bann resers, zot bann analiz. E petet i kapab en keksoz ki kapab anmenn plizyer benefis pou nou pei. Avek sa de mo Mr Speaker, mon pou siport sa Mosyon. E mon dir ou mersi.

MR SPEAKER

Byen Mersi Onorab. E prezan laparol i pou Onorab Loze.

HON JOHAN LOZE

Mersi Mr Speaker. Mr Speaker mon ti ava kontan reasir loter

Mosyon ki napa personn ki negativ anver, vizavi Mosyon. E napa personn ki pe dir pa fer. Sa ki bann Manm pe fer lo tou lede kote. Se balans nide dan pake ki kapab ede pou nou pran en desizyon.

An dizan sa mon pou repran lo en bout kot Onorab koleg ki'n koz avan mwan in kite. *Economic recovery post-COVID*. Onorab in dir nou *accurately enough* ki lekonomi in *bounce back* bokou pli vit ki ti pe ganny espekte.

Be i annan en bout ki Onorab pa'n antre ladan. E se la kot problemm in kree. E se la kot in arriv nen.

In annan en *fast than predicted recovery*. But in annan en *very uneven economic recovery*. E se sa *uneven economic recovery* ki'n kre sa *backlog* dan *seaborn trade*. E letan ou get *seaborn trade* li menm. I annan 2 fason zot gard zot itinerer. Enn i annan bann ki *stick to a fixed itinerary*. Parey bis. I al lo tel pwen, tel zour, tel dat, tel ler. I ale i al lo son lot stop.

E pou nou sa ki konsern nou la se *container ships* zot *operate* koumsa zot. Zot *operate* avek en *fixed itinerary*. Bann lezot ki plito *roving* sa i en pri pe bann *dry bulk* avek *tankers*. Zot, zot annan plis fleksibilite

dan zot itinerer. Be *container ships* an mazer parti zot *stick* avek en *itinerary*. E se sa ki fer ki kre sa problem ki'n leve pli boner dan deba.

Kot bann Manm i dir be ou *container* avan i vin Sesel i annan drwa sorti Lenn i desann *Dubai*. I ganny poz ater. I ganny anmase *Dubai* i al Sengapour i ganny poz ater. I vatevyen *until* i ariv kot ou.

e se sa ki pe kre sa sityasyon ki ozordi ou vvar bann komersan Sesel i bezwen *de dès maintenant* pe *order* zot bann komisyon nwel. Sanson pou annan en problem, akoz *shipping*. Be Mr Speaker, mon pou al en moman lo paz lo site web *Indian Ocean Rim Association, IORA*.

Lo son premye paz i annan en kestyon enteresan ki i dir ou. ‘As the third largest ocean woven together by trade routes, commands control of major sea lanes carrying half of the world’s container ships, one third of the world’s bulk cargo traffic and two thirds of the world’s oil shipments. The Indian Ocean remains one of the important lifeline of international trade and transport.’

E sa se volim trafik ki pe vatevyen dan nou losean. Pe

transborde a gos e a drwat. Be i la li.

E nou Sesel nou dan problem nou. Nou dan problem *container*. Be letan ou get sif ki *Indian Ocean Rim* pe dir ou i annan en *massive* trafik - en *massive* volim.

Now, Onorab Waven William in tous lo en keksoz enportan. E i annan en keksoz mon pou dir zot la. Mon konn Onorab William lontan mwan. Sa en vye konversasyon sa. E Onorab William in deza fer sa konversasyon avek mwan depi letan Katriyem Lasanble.

Lontan i lo son - *he has been thinking about this a long time. So, mon konpran akoz i anmenn sa. Mon konpran son senserite. Mon konnen ler Onorab William i anmenn sa. Mon konnen sa li sa. Sa pou li sa. Akoz lontan i pe zwe ek sa in one form or another. I pe poz kestyon. I pe rode akoz.*

*Now, lefe i reste ki *seaborne cargo*, en *container ship* i perdi larzan ler i *steam empty*. And having said that lanmwatye *container ships* an se moman lo lanmer pe *steam empty*.*

So menm si mon'n dir sa i en fe ki egziste. E Sesel nou problem nou, sel kargo ki nou pe eksporte, i se sa ki Onorab Wallace Cosgrow i tous lo la pli boner *IOT*. *IOT* i nou major

exporter lo zil. E enn bann sel rezon ki nou ankor ganny kargo pe vin kot nou, set akoz zot kapab *steam away* avek serten leksportasyon IOT.

Letan nou pou anmenn nou prop laliny bato, i pou vin fas avek sa difikilte *of steaming empty* ankor. I pou anmenn *container* isi. I pou met ater sorti *Dubai*. I pou bezwen re desann Sidafrlik ouswa al *Bombay* pran anmennen. Be i pou al *empty*. Ki vedir i pou fer profi zis lo lanmwatye son larout.

Sak fwa i vin Sesel i vin plen, i fer larzan. Apre i pey son *steaming cost* son *fuel* pou li desann pou al sers kargo ankor. *Now, having said that*, mon pa pe balans delo fre lo Mosyon. Mon pe zis eksplor nide. Ki mon ti ava kontan met devan zot e met devan Onorab loter Mosyon, si zot met devan Gouvernman ki nou kaptir en pe sa *massive volume of seaborn trade* ki annan dan nou losean otour nou.

Avek en Por ekipe pou desarz kargo. E en *container park*. En *container farm* ki kapab *meet* en bon volim *container* ater. Enn pou *dry containers*. Lot pou *refer containers*, akoz ou bezwen zot egalman. Ou pou bezwen ou en *reefer container park* osi. Pou

refrigerated containers. Ki nou ava nobou kapab tir en pe sa bann volim.

Zot ava vini zot, parey zot fer *Dubai*. Parey zot fer Sidafrlik. Zot ava vini vitman poz zot *container* ater, pran sa ki annan lezot pou zot pran, pran al avek. E nou bato osi ki pou nou, atraver bann diferan *shipping companies* lokal e enternasyonal. I osi i ava ganny en volim dan sa bann *containers* ki isi ater dan nou *container park*.

Pou li osi letan i *steam away from our shores*. I pa *steam empty*. I ava annan en keksoz. Atraver bann Lagreman ki li i ava annan. I ava pran en pe sa bann *container* ki'n ganny met ater par *Maersk* sa bann gro laliny. Atraver bann Lagreman ki ava annan. Li osi i ava sarz li. i ava desann Sidafrlik, i ava *Dubai*, i ava al *Bombay*. *Wherever* i pe ale.

Mon pe met sa nide devan zot zisteman pou sey *solve* enn bann *hurdles* ki reel, ki Onorab Cosgrow in komans koz lo la, ki pou ede aranz en pe sa sityasyon. Pou aport sa solisyon ki Onorab Waven William pe serse.

Be sa i pou vin en doub benefis pou nou li. Annan en *container park*, annan en *proper reefer park* ater isi. I pou deza

pe atrakte e pli gran volim trafik. Ki nou ava nobou benefisyen en pe dan *bulk of traffic*. Sa i pa'n *negate* annan nou prop bato. *Far be it from that.* Annan nou prop bato i menm largiman ki nou'n annan avek *Air Seychelles all along as a lifeline*.

I pa'n *negate* annan ou *lifeline*. Selman ou ava annan plis volim. Sa bann *numbers* ki mon'n nonmen la in la *for years*. E in annan bann moman kot lekonomi mondal ti pe ronfle dan bann 2019 tousala, lekonomi ti fantastik.

Be, menm pandan letan ki lekonomi lemonn ti a son *peak* - ti lo son *apex* - Sesel nou ti *still* annan nou en problem nou. Nou pa'n zanmen, zanmen kapab etablir e sistem *just in time shipping*, ki kre en problem direk pou nou konsonmater.

Letan ou pa kapab annan ou en *Just-In-Time-Shipping* - dizon avek enn ou *closest port of calls* ki swa Sidafrlik, ki swa Kenya, bann lakonpannyen ki dil dan lavyann, nou pran lavyann koman en legzant. *Wholesale*, zot pa kapab *order* zot, si zot konnen zot pe servi en tonn pou en mwan, zot pa kapab pe *order* zot zis en tonn ouswa order zot en tonn edmi.

Akoz zot konnen dan en mwan *give or take* en semenn zot pou annan en *just in time delivery* ki pou arive pou *replenish* zot stock. Zot pe bezwen *order* zot en 2 mwan, en 3 mwan zis 2, 3 tonn akoz zot pa kapab fonksyon lo *minimum stock*.

Ler zot pe fer sa preznan zot pe bezwen bril kouran servi en ta elektrisite pou refrizerasyon. E sa gro *bill* elektrisite ki zot pe gannyen, lemoman ki Zot pe met *on* sa bann *container* refrizerasyon la, i pe kontribye pou ogmant kou lavyann dan pei.

E nou pa'n zanmen kapab annan nou en *Just-In-Time-Shipping lane*, *shipping line delivery system* ler *shipping* ti bon. *Shipping* ti byen, *trade* ti pe ronfle. I ti annan tou sa bann gro *numbers* la ki mon dir zot taler. So petet avek nou prop bato i ava nobou permet nou annan en *Just-In-Time-Shipping*.

Ki la i ava anmenn en rediksyon direk dan kou konsonmasyon, dan kou lavi pou nou bann konsonmater. Akoz mon'n tann bokou boner pe dir nou pou fer sa pou redwir kou lavi. Be nou pa'n tann bokou lesplikasyon lo ki mannyer i arive.

Sa i enn bann posibilite kot i kapab vini. Kot i kapab arive. E dan sa konsonmasyon protein ki nou annan ki nou konsonm en pe bokou protein ozordi.

Petet i ava bes son pri ankor en pe - *a little further*. Ki a anmenn en soulazman pou nou pep. Be selman osi i annan bann diferan *views* parmi nou ozordi dan lasal, kot i annan nou ki pe favor en model kot nou pou Gouvernman pou etabli bann lyen korporasyon rezyonal.

Bann lyen korporasyon avek bann pei dan losean Endyen - *Indian Ocean Rim*, e i annan nou pa pe tro an faver sa. Pe dir sa bann keksoz pa marse. Mwan mon krwar petet nou fer le de. I pa pou kas nou lebra sey fer le de.

Nou aste nou bato nou pa rod en bato rezyonal. Nou aste nou bato. Be nou pou *still* bezwen annan bann lyen e rapor avek bann lezot pei la rezyon. Nou pou bezwen annan bann lyen e rapor avek bann *shipping agencies* ki baze dan la rezyon. Pou nou nobou *trade on an even footing all be it on a smallest scale and on a regional level*.

Be kot Onorab Georges i annan rezon li, se ki sa bann *reginal bodies* la, Napa enn zot

ki enterese ek okenn sa bann keksoz li. So sa i pou bezwen en azanda Sesel ki ganny pouse lo en nivo rezyonal. E i pa en keksoz enposib sa.

Akoz Sesel ler ti komans avek son zistwar *Blue Economy*, in komans li trankilman li. Ozordi partou kot ou pase kanmarad pe pran pe tay avek pe dir ou pou li. Kot ou pase dan lemonn *Blue Economy is the flavor of the month*. Nou tou nou pe etablis. Nou tou ki'n komanse, nou tou ki sanpyon.

So, mon sipoze si nou pran sa model Lekonomi Ble ki nou, nou kapab komans nou keksoz isi trankil. E pouse ki i annan en konsansis e en adopsyon rezyonal e enternasyonal lo sa ki nou, nou anvi vvar arive. Pou nou benefis ankor.

Ankor si ou pou al lo website *IORA Mr Speaker - Indian Ocean Rim Association*, ler ou pou get son bann *short term goals*. I dir ou li, *conduct capacity building on reducing trade barriers. Corporate to promote SMEs*.

Establish online IORA trade sepa kisia. Establish an investment guide. Son medium term i pe dir ou revitalize IORA's private sector arm.

Corporate zot promotes financial services. Long term makes business travel easier.

E lamazorite sa bann *regional body* zot koumsa zot. zot plito koz dan bann keksoz ki *theoretical*. E zot pa pe al dan sa lapratik ki nou, nou anvi. E la nou pou bezwen konvenk nou Gouvernman pou batonn zot. pou trenn zot dan sa direksyon ki nou, nou anvi. Akoz nou, nou bezwen sa benefis pratik ki Onorab William pe serse. Nou pa bezwen zis sa bann keksoz teorik la ki zot, zot pe koz lo la.

So i pou annan en travay ki pou bezwen lekspertiz pou sers solisyon pou sey *achieve* sa ki nou pe serse ozordi. E Mosyon letan mon pe get li i senp. Mon pa krwar ki Onorab William in anvi konplik lavi personn, par vin avek en Mosyon ki *bloated* avek tousord kalite keksoz.

Si ou pou get li lo son sirlfas i pou fasil pou ou petet *discard* sa Mosyon. Dir be bon, i pa pou fasil sa. I pa pou en keksoz fasil. Kou bato, kou mentenans bato. Kou ki ou pou al peye pou bann servis otour sa bato. Son bann lozistik pou *run* sa biznes li menm.

Parske si ou get biznes *tanker*, SEYPEC pa asiz la pou *rent* biznes *tanker* li. SEYPEC pa pe *manage* tenk la Por

Victoria li. SEYPEC in pran tenk in met dan lanmen lakonpannyen Lalmanny pou *manage* lozistik tenk. En lakonpannyen ki sa i son *core business*.

Napa personn la anvil SEYPEC pe boukte pou tenk al tel landrwa pran gas tir gas pran petrol. Pa pe arive sa. Be letan ou get li koumsa. Vre i get enposib, get enposib, pou nou *actually achieve* sa ki nou anvi serse ozordi.

Be selman parey mon'n dir, nou bezwen *either we have the political will or we don't*. Si nou deside fer nou fer. Be la kestyon i vini eski zot pou al koz avek zot Gouvernman? Eski zot Gouvernman pou ekout zot?

Si zot pe zis met en Mosyon la dan Lasanble pou met en Mosyon, *then fine*. Be si zot pou aktyelman ale asize koz avek zot Gouvernman, pou donn nesans sa keksoz. Bravo. Bravo. *But then* zot pou bezwen *work out* son kote pratik. Again, mon dir zot SEYPEC pa *manage tanker* from Por Victoria li.

I annan en lakonpannyen ki spesyalize dan sa biznes ki annan *years of experience* dan sa biznes. Ki pe *manage tanker*. So pou bezwen *figure out* ki mannyer pou fer tousala. Mersi Mr Speaker.

MR SPEAKER

Mersi Onorab. Avez sa mon ava pas laparol Onorab William pou fer son repons e konklizyon lo deba.

HON WAVEN WILLIAM

Mersi Mr Speaker. Mr Speaker o debi mon ti ava kontan senserman remersi tou bann Manm ki'n pran letan pou koz lo sa Mosyon. Ki'n anmenn en serten degre refleksyon Mr Speaker. Ki mon war li vreman enteresan. Enteresan pou nou Lasable.

E mon ava dir ki koman en Lasable, nou osi nou en brans gouvernans ki pa travay an izolasyon. Me dan en serten sans parey Prezidan Kenya ti dir nou, ki nou bezwen travay ansanm pou lentere Nasional.

Mr Speaker, letan mon ti pe anmenn sa Mosyon mon ti rekonnet konpleksite ki i annan. Me selman dan lavi ou bezwen komans serten par. Pou ou kapab anmenn sa progre. Parey tou atraver lemonn staz devlopman ki nou ete ozordi ,nou'n komans en landrwa pou nou arriv kelke par.

Mr Speaker, legzanp senp se letan ti annan sanzman Gouvernman, sityasyon ekonomik ki nou ti ladan. E mon pou dir bravo nou bann

Dirizan pou bann desizyon saz, pridan, e brav ki zot ti pran.

Ki ozordi Mr Speaker, nou sityasyon ekonomik in amelyore. E avek faver e lagras Bondye si keksoz i mars byen nou pou kontinyen fer sa progre ki swe nou tou Mr Speaker.

Mr Speaker, Mosyon pe demann Gouvernman pou etidye sityasyon. Mosyon pa pe dir Gouvernman ale, taye, fer, annan bann bato kargo. Mosyon pe dir Gouvernman etidye, e pou ankouraz dan sa partenarya sekter piblik, Gouvernman, prive.

E an menm tan Mosyon pe al an deor Sesel pe dir be regarde nou pa kapab, nou rekonnet ki nou pa pe viv an izolasyon. E konpleksite sa size pou demande osi ki nou regard la rezyon otour nou.

Mr Speaker, parey mon dir se ki mon vreman apresye bann sizesyon, bann nide, bann konversasyon pour e kont lo sa Mosyon. E mwan mon ava dir ki wi, definitivman sa *political will* premyerman i primordyal e enportan.

Mr Speaker, sa *political will* i pou bezwen fonde lo nou realite ozordi koman en pti pei ki pe aspire pou annan en devlopman soutenab. E osi pou amelyor nou rezilyans pou lavenir.

Mr Speaker, Mosyon pe demande osi ki nou pa reste zis dan nou izolasyon. Me nou regard ki pe arive dan la rezyon e dan lemnoff. Bann fakter ki pe enfliyans bann tandans, bann dinamik, devlopman global. Ki annan en lenpak Mr Speaker direk e endirek lo nou pti pei.

Mr Speaker, pou bann ki'n fer resers, bann lenformasyon ki'n sorti. Ki zot in donnen, i bann lenformasyon ki reel, i enteresan. E in ganny fer par bann eksper Mr Speaker.

Mr Speaker, Sesel in siny, in form parti en bon pe bann Lagreman Miltilateral, Rezyonal, Bilateral.

Mr Speaker, e parey en Manm in dir, Sesel pou bezwen pou son azanda. Sesel pou bezwen *lobby* bann pei zanmi pou li avans son azanda.

Mr Speaker, size sa Mosyon Sesel pa pou kapab al lo li tousel, ki anmenn mon pou sit en legzant Mr Speaker. Mon rapel letan Sesel ti pe negosye Lakor Partenarya Ekonomik avek Linyon Eropeen ki enkli bann pei Lafrik, Karaib avek Pasifik, Sesel avek Maurice, Madagascar avek en lot pei Lafrik, ti pran en pozisyon Mr Speaker, apar avek *the main blok* pou zot negosye en Lakor Enterim ki ti dan lentere.

E i pran konsiderasyon sityasyon bann Pti Leta Zil. Mr Speaker, Sesel ti reisi kapab fer li dan sa pti group ki ti *break away from the main group*.

So Mr Speaker, ozordi Gouvernman oparavan sa Gouvernman pa ankouraz Seselwa, bann pti antreprenier, *medium* avek *large* pou zot expand. Ouswa pran bann nouveau lentere pou kapab devlope e kre larises pei Mr Speaker.

Nou annan en ta bann zenn dan lekol ki pe aspire, ki pe etidye, ki anvi pran en pozisyon kle dan lasosyete Mr Speaker.

Mr Speaker, letan mon regard Manifesto Gouvernman di zour, nou Gouvernman, e bann keksoz ki i anvi *achieve* Mr Speaker. Par egzanp enn se lev reveni e standar lavi Mr Speaker. *Shape a better country. Build a strong society. Invest in our youth.*

Open opportunities for Seychellois Mr Speaker. Me en Gouvernman i bezwen proaktiv e reazir. E mon santi poudir Gouvernman aktyel i son lentansyon Mr Speaker.

Mr Speaker, loportinite ki pe ofer nou la se enn dan nou sou rezyon COI. Ki en bon pe letan i pa'n vreman parey in ganny dir vizib. Mr Speaker, la i

kre en lokazyon parey Onorab Georges in dir. Sekreter Zeneral *COI* ti vin vwar nou.

E mon kontan ki nou pe kapab re dinamiz Lasosyasyon Parlmanter. Petet sa lasosyasyon osi o pre Komisyon *COI* i ava pouse Mr Speaker, pou sa bann tel size ganny aborde e ganny avans pli devan.

Mr Speaker, si nou kapab fer sa, nou pou kapab annan en lenpak osi lo nivo *EU, PAP* e pouse ki sa bann tel azanda i ganny vin en realite.

Mr Speaker, napa naryen ki enposib. *Where there is a will Mr Speaker, there is a way.* E avek Bondye sipor Bondye son gidans napa naryen ki enposib.

Mr Speaker, mon pa pou vin en *pesimist* - en optimis Mr Speaker. Akoz mon santi ki si i annan lavolonte, lavolonte pa zis lo kote Sesel.

Lavolonte dan la rezyon. Lavolonte lo kontinan Lafrik, sa Lagremant Komers Kontinan Lafrik Mr Speaker, i pe ouver en laport pou loportinite.

Mr Speaker, loportinite kot dan lepase petet bokou bann antreprenier pa'n a anvi pran bann ris. Akoz parey mon'n mansyonnen pli boner, nou vwar poudir dan pei li menm li, i annan limitasyon.

Me la sa baryer limitasyon pe ganny, pe al kase Mr

Speaker. In komans ganny kase. Kot posibilite pou al lo en pli gran Marse pou kapab ekspoz zot bann prodwir pe arrive.

Mr Speaker pa zis sa. Materyo brit. Dan lepase nou bann antreprenier petet ti ape vwar sa en gro problem Mr Speaker.

Me letan i annan sa loportinite. Ou'n kre sa modalite transportasyon, E mon pou dakor avek bann serten pwen ki Onorab Loze in met devan Mr Speaker. Kot nou pou kapab, si nou kapab met sa proze an mars, benefisyé an gran kantite.

Mr Speaker, alor mon pe demande pou ki Gouvernman koman fasilitater, i bezwen komans avek Gouvernman koman fasilitater pou komans angaz avek sekter prive.

E yer dan sesyon Lasanble Mr Speaker, swivan kestyon Onorab Roucou lo bann Lakor.

In enteresan pou ekout Minis pou Zafer Etranzer e Tourism - Onorab Labrosse eskize - atraver son kestyon, nou'n aprann bokou keksoz vizavi bann Lakor ki'n ganny sinyen. E enn toulstan ou tandé pou dir i annan serten difikilte lo langazman avek sekter prive.

Ki fason nou angaz sekter prive pou pran loportinite Mr Speaker. Mr Speaker, be nou bezwen mazinen poudir pou sekter prive angaze e pran sa risk, sa kondisyon, sa lanvironnman favorab i bezwen ganny kree. E sa Mosyon i enn parmi bann kondisyon. E ki mon santi poudir zot ava vwar li koman sa laport ouver, loportinite, akoz i pou annan sa lesanz ant bann diferan parti dan sa laliny komers si nou annan nou bann prop transportasyon, swa lokal swa la rezyon.

E i bon note Mr Speaker, ki lontan Nordver ti al sers disik Kenya. I annan plizyer bato ki'n fer li. E mon santi poudir nu bezwen vwar kwa ki ti pe ganny fer oparavan. Ki bann febles, e amelyor lo la.

An menm tan al dan La Rezyon pou osi vwar ki fason sa partenarya ki pa zis pou dan benefis Sesel, ava benefis bann pei lo Les Kontinan Lafrik dan la rezyon.

Mr Speaker, avek sa 2 mo. Mon krwar poudir letan nou pe regard osi sa laspe sekirite alimanter Mr Speaker. Sekirite alimanter nou pa pou kapab get li zis lo nivo nasyonal. Akoz nou napa siperfisi ase. Nou napa kapasite ase.

Me nou bezwen regard bann lezot konponan. Ki pou agrandi sa rezilyans pou nou kapab sofgard sa souvrennte alimanter.

Mr Speaker, avek sa de mo mon oule senserman remersi tou bann Manm ki'n kontribye. E mon ava demande ki tou bann akter konsernen la deor ki pe ekout sa deba. Nou, nou pa bann eksper Mr Speaker. Nou demande ki zot pran sa Mosyon o serye. E nou koman en Lasanble dan bann diferan *forum* kot nou pou ale aletranze, nou pou pouse, pou serten keksoz arive, ki ankor pou donn zot sa sipor. Pou kapab dan lavenir ler i posib pou met en tel proze an mars. Mersi.

MR SPEAKER

Mersi Onorab. Avek sa mon ava apel bann Manm pou vot lo Mosyon ki mon sipoze zot annan byen antet, in ganny repete souvan dan deba.

Manm ki an faver lev lanmen silvouple? Manm ki kont lev lanmen.

Mersi Madanm Clerk. Lo Mosyon propoze par Onorab William, 28 Manm in vot pour, zero Manm kont, e 3 in *abstain*.

Alor mon annan plezir dir ki Mosyon Onorab William in aprouve par Lasanble.

Byen mon krwar nou ava
aret la pou bomaten. E nou ava
kontinyen apre midi 2er avek
lot Mosyon. Onorab Georges ki
pwen?

HON BERNARD GEORGES

Mersi Mr, Mr Chair, mon ti anvi
etandonnen ki nou annan
detrwa minit ganny ou
permisyon anba ou Lotorite
zeneral anba *Order* 101, pou
mwan fer en pwen klarifikasyon
pou benefis Lasanble. Napa
naryen kontroversyel ladan.
Mersi.

MR SPEAKER

Bon be mon ava don ou laparol
Onorab Georges.

HON BERNARD GEORGES

Mesi Mr Speaker. Mon ti anvi
retourn en pti kou lo - pou
benefis Lasanble lo sa sityasyon
ki ti preokip nou yer lo
amendment to amendment dan
en *Bill*.

E mon krwar i ava dan
lentere Lasanble, si mon ti
kapab dir de mo. Nou ti pe rode
yer eski en *Bill*, eski en
amannman i kapab ganny
amande san notis 72 erdtan.

E nou ti *conclude* ki wi ki
sa i kapab. E pandan sa
diskisyon Onorab Ernesta,
Onorab Paul Ernesta ti aport a
nou latansyon *Order* 47 ki *allow*

en *amendment to an
amendment*.

E mon ti dir ki sa ti annan
pou fer avek Mosyon. Me annefe
mon anvi rekonnnet ozordi ki
Onorab Ernesta ti annan rezon,
akoz en pwen ki nou tou, nou'n
manke.

Se dan *Order* 73 (3) nou
Standing Orders, i tre kler. I dir
ki dan en amannman *to a Bill*
Orders 45, 46, and 47 will apply.

Alor ou kapab fer en
*amendment to an amendment to
the floor of the House*,
egzakteman parey ou kapab fer
li pou en Mosyon.

Mon ti anvi zis fer sa pwen
Mr Speaker pou benefis nou
Lasanble. Mon remersye ou pou
letan ki ou'n donn mwan.
Mersi.

MR SPEAKER

Mersi. Nou ava gard sa antet
pou laprosenn fwa. Bon nou
ava pran poz la e nou ava
rezwenn 2er. Mersi.

(BREAK)

MR DEPUTY SPEAKER

Bonn apre midi tou Manm
Onorab. Tou bann manm *staff*
e manm piblik a lekout travay
Lasanble pou sa Merkredi.

Nou pou kontinyen avek
nou sesyon travay. Prosen *item*

lo nou *Order Paper* se Mosyon prezante par Manm Elekte pou Distrik Anse Royale Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi Mr Speaker. Tou mon bann koleg Manm Onorab. E tou dimoun ki a lekout.

Mr Speaker mon Mosyon i lir *comme swivan*: -

Lasanble i demann Gouvernman pou imedyatman adres sa sityasyon pye dibwa danzere lo propriyete Gouvernman, ki pe poz menas a lavi e propriyete prive dan bann kominate lo Mahe, Praslin e La Digue. Mersi Mr Speaker.

MR DEPUTY SPEAKER

Mersi Onorab. Nou ava segonn Mosyon ava ki nou pas lo largiman. Onorab Aglae.

HON EGBERT AGLAE

Bonn apre midi Mr Speaker. mon segonn Mosyon. Mersi.

MR DEPUTY SPEAKER

Mersi. Alor Onorab Lemiel nou ava envit ou pou prezant ou Mosyon.

HON SYLVANNE LEMIEL

Mersi ankor enn fwa Mr Speaker. Mr Speaker, rezon ki

mon pe anmenn sa Mosyon ozordi se akoz sa sityasyon konsernan pye dibwa danzere lo bann propriyete Gouvernman.

E osi lo propriyete prive e abandonnen, pe anmenn gran konsern pou mwan dan mon distrik. E mon plis ki sir ki bann lezot MNAs ki'n ganny elekte dan tou lezot distrik pe osi fer fas avek sa menm kalite problemm.

Sa Mosyon i vin dan en fason irzan. La ki vandswet in antre. E bokou distrik pa pe ganny eparnye avek konplent sorti kot bann endividé dan nou kominate, ki war zot pe fer fas avek sa problemm pye dibwa danzere. Ki pe koz menas e risk pou zot lavi ensi ki zot propriyete.

Ler mon pe koz lo propriyete, sa i enkli zot lakaz, zot transpor. Bann lezot lenfrastruktir ki ganny trouve lo zot propriyete prive en endividé.

Mr Speaker, tou dernyerman Distrik Anse Royale in fer fas avek detrwa ka. Kot gro pye dibwa in sorti lo later Gouvernman e tonm atraver semen.

E andomaz propriyete prive serten endividé. Sa i enkli zot miray. Zot lakaz, transpor. E dan serten ka semen li menm in ganny andomaze.

Dam lamazorite sa bann ka. Se SLTA ki'n pran sa responsabilite pou koupe. E fer retir bann debri ki'n tonm atraver semen. E ariv lo propriyete prive en endividé. Kestyon ki mon oule demande se, ki arive avek apropriye ki ganny andomaze espesyalman si zot napa en lasirans?

Isi Sesel nou annan Departman Lanvironnman ki atraver mon resers in fer mon konpran ki son rol prensipal se pou donn permi. E osi regulariz sa zafer pye dibwa dan lanvironnman. Seksyon Lafore ki tonm anba divizyon ki responsab pou biodiversite, konservasyon e pou amenazman, i responsab pou formil bann Polisi. Donn permi e asire ki bann Lalwa i ganny enplimante.

Asire ki lafore i ganny zere dan en fason soutenab. Asire ki bann resours lafore ki ganny regularize. I pe ganny servi dan en fason soutenab. I osi asiste dan prevansyon deteksyon. E prosekisyon bann aktivite ilegal. E sa i enkli bann vol ki pase dan lafore.

Mr Speaker, sa i responsabilite e osi travay ki Seksyon Lafore dan Departman Lanvironnman i sipoze pe fer. Pran Departman Later dan Minister Later e Lakaz. Laba

zot vann later *landbank*. Me zot pa responsab pou koup okenn pye dibwa danzere ki lo sa bann later. Menm si i annan ki poz en menas pou propriyete en lot dimoun dan sa kominote.

Mon annan bokou ka kot later *landbank* in ganny vann. I annan plis ki 7an, son propriyeter pa ankor devlope. Pye Albizya in ariv se pa ki groser e grander. I annan ki pe andomaz semen kot koltar pe leve. E rasin Albizya pe marse anba later.

Menm si propriyeter i ganny kontakte, zot pa enterese pou vin koupe. Menm si i poz gro menas pou bokou lakaz dan kominote. Mon ti met serten ka kot PS Later. Me i ti fer mwan konpran ki sa bann dimoun in fini aste zot later. E i pa pou kapab fer naryen dan sa bann ka.

I annan lezot Seselwa e osi etranze ki zot later i prive. Zot pa'n aste avek *landbank*. E zot osi pli gro problem ank. Zot later i trouve dan bann diferan *zone* dan diferan kominote e distrik. E sa kantite pye Albizya, pye Sed e lezot kalite ank. pe vreman poz en menas dan tou kominote kot zot ete.

Dan sa bann ka osi, ou seye rod propriyeter. Swa atraver zot Manm fanmir. Oubyen Avoka. Oubyen zot

annan en reprezantan isi Sesel. Me personn pa responsab pou koup sa bann pye dibwa danzere.

In ganny met dan mon latansyon par Departman Lanvironnman, ki napa Lalwa ki fors okenn dimoun pou koup en pye dibwa lo son later. Menm si i pe poz en menas. Dan serten bann ka Mr Speaker, si sa endividé ki pe ganny menase, i mont lo sa propriyete sa endividé ki swadizan *nowhere to be found*, me i koup sa pye dibwa danzere, En pti moman ou pou konn son met.

Ou war sa dimoun li menm in arive pou regarde ki pe pase lo sa propriyete. E menm sa dimoun ki'n koup sa pye dibwa. I pou ganny war li devan Lakour akoz sa aksyon ki in fer. I annan divizyon ki responsab pou risk e dezas. Ki li son rol se *advice*. Savedir i koman en *advisory body*.

I pa fer mitigasyon. E i pou napa naryen pou fer avek okenn problem pye dibwa danzere, ki swa lo propriyete Gouvernman oubyen sa ki prive. Gouvernman Lokal osi. Mon konnen lontan menm avan 2020 ti pe koup pye dibwa danzere. Sirtou lo propriyete prive zot ti pe fer sa.

Kot sa bann pye dibwa ti pe poz menaz. E kot sa endividé,

mon dir kot sa endividé ti napa mwayen pou peye.

Me ozordi, tousala in sanze. Akoz Gouvernman Lokal ozordi i dir okenn endividé ki annan pye dibwa danzere lo son propriyete ki poz menas a en lot propriyeter. Oubyen poz menas a ou menm ou sa endividé, ou bezwen fer ou prop demars pou ou koupe.

Mr Speaker, zot ava mazinen ki semenn pase mon ti anmenn en Kestyon Irzan dan menm laliny avek mon Mosyon. Ki Minis Joubert pa ti kapab vin reponn, akoz i ti annan en lot komitman dan vizit Prezidan Kenyatta.

I enportan pou mon enform tou manm piblik e Manm isi dan Lasanble, ki Minis in donn mwan en larepons an ekrir.

Kot an gro in fer resorti ki i pa sipoze responsabilite son Minister pou koup pye dibwa, an vi ki li menm i pe donn permi. Menm si i pe deza fer li. en tel prosedir i pa korek legalman in fer mwan konpran. E la son Minister pe travay ansanm avek lezot bann partner pou esey ganny en solisyon pou sa problem.

In osi fer resorti ki dan bokou lenstans problem letan later prive i ganny abandonnen. E napa met, napa en provizyon

legal pou war ki fason kapab adres sa problem.

Ler mon pou retourn lo size mon Mosyon Mr Speaker, ou kapab remarke ki napa vreman en Minister oubyen Departman, ki vreman pe pran sa responsabilite konsernan sa size koup pye dibwa danzere lo propriyete Leta.

E napa vreman en Lalwa, oubyen *enforcement body* ki kapab persyad en endivid pou koup pye dibwa danzere lo son propriyete, akoz i koz menas pou en lot.

Se dan sa lespri ki mon anmenn sa Mosyon ozordi devan nou Lasanble, pou nou kapab debat en pe lo sa size. E esey anmenn serten rekomandasyon e propozisyon ki nou kapab met devan Gouvernman, pou ki ansanm nou kapab anmenn en solisyon pou sa problem ki vreman alarman dan nou bann distrik partou lo Mahe, Praslin e La Digue.

Mon remersye ou Mr Speaker.

MR DEPUTY SPEAKER

Mersi Onorab. E mon prezimen Onorab Aglae ki ti segonn Mosyon i le pran laparol. *Please go ahead.*

HON EGBERT AGLAE

Mersi Mr Speaker. Bonn apre midi tou Manm e tou dimoun ki a lekout. Mr Speaker Mosyon ki devan nou i en Mosyon ki *straightforward* e sa ki pe ekout nou i konpran ki nou pe sey koz lo la.

Mr Speaker bann leksperyans lepase in anmenn nou dan en direksyon ki ozordi nou war ki fason fer, ki nou pe dil avek bann sityasyon kot i annan bann pye dibwa danzere e menm ki tonbe, i komans vin en difikilte an term lekel ki pou pran responsabilite. Me Lalwa i kler li, e me selman i annan serten mankman kot i konsern lo kote Gouvernman, akoz Lalwa i touzour viz ver propriyete prive.

Mon dir sa Mr Speaker akoz nou menm nou, ki ti amann Sivil Kod. E dan Sivil Kod Lartik 671 e 672 i fer kler ki mannyer ou dil avek bann pye dibwa ki dan proksimitate avek bann balizaz lezot bann ki pe okipe.

E 671 i dir ou koumsa, "No person shall have trees, shrubs or bushes closer to the boundary line of a neighboring properties, than 2meters from the plantation of height of which exceeds 2 meters or half."

E i fer referans osi ki i dir ou ki en *neighbor* i kapab *may demand that trees or bushes*

planted less than a distance in ganny mete dan sa 671 i ganny tire par sa endividé ki posed sa propriete.

Ki fer ki i dir ou pou dir mwan koman en *tenant* en propriete, si madanm *x* mon war poudir i annan en pye dibwa ki an menas mon propriete, mwan mon kapab demann li pou li koup son pye dibwa ouswa *trim* son, *whoever* kalite pye dibwa ki i annan.

Me par kont, napa mansyon ki ganny fer lo kote Leta li menm li. Mon pa konnen si dan *Planning Act* i annan, me selman mon pa pe war dan *Civil Code* petet taler Mr atraver ou, Mr Georges comme *l'homme de loi* i kapab gid nou.

Me selman mon pa pe vvar sa, ki fer ki prezant lo kote Gouvernman difisil pou al pran e aksyon si ou endividé ki'n sibir en domaz atraver en pye dibwa ki'n tonm lo ou propriete, ouswa ki dan ou pe pase koman en motoris osi i annan serten domaz ki ganny koze par sa bann pye dibwa li menm. So vwala, la mon war i annan en pti anbigite ki ou bezwen adrese e eklersi.

E mon pou retourn lo pratik lepase Mr Speaker, akoz dan lepase ti annan 3 Lazans ki ti koup pye dibwa isi dan pei, *ok* ti annan *Local Government* li

menm li ki atraver son Bidze si nou ti war distrik ti idantifye bann pye dibwa ki menasan, nou ti fer en prosedir pou kapab ganny, dil ek sa pye dibwa e retir sa danze ki i pe koze.

Lot eleman se Departman, se *SLTA*, se li i ti dil ek bann pye dibwa ki plizoumwen lo kote larout piblik ki swa larout primer ou segonder, e si la pye dibwa i tonbe se *SLTA* li i antre atraver son bann kontrakter ki li i annan pou kapab met sityasyon anba kontrol, *ok*?

Apre nou ti annan Minister Lanvironnman ki mon rapel ti annan *The Environmental Trust Fund*, ki ti annan larzan ki ti ganny mete vot, met a disponib pou bann pye dibwa ki bann demann i ganny fer atraver piblik, ouswa atraver Ladministrasyon Distrik, pou kapab tir sa bann pye dibwa ki pe koz bann danze avek bann propriete.

So la mon krwar keksoz ti - nou ti kapab annan bann solisyon ouswa bann laport kot ou ale pou kapab *tackle* bann size parey ki nou pe diskite la ozordi. Me ozordi sityasyon i diferan. Mon dir i diferan akoz sa bann diferan lenstans sirtou dan mon distrik Port Glaud ki en distrik ki annan en kantite laverdir, en kantite pye dibwa.

E souvandfwa ou pe ganny bann problemm kot pye dibwa pe tonbe, e si i tonm lo semen i en pti pe pli fasil akoz ou kapab koz ek *SLTA* zot anvoye. Me tan ki i tonm lo lezot propriyete ki i napa naryen pou fer ek semen, e la ou komans vir an ron ou komans demande lekel ki pou fer, lot i dir ou lot i dir ou lot.

Ki fer ki vin en problemm. E en lot antite ki mon krwar ou pou bezwen tous lo la, se dan bann letan *emergency* parfwa ou sanse, ou kapab ganny *SFRSA* ki antre ki li osi i vin donn en sipor, sirtou dan bann lannwit ouswa granmaten, kot ou pa pe ganny kontrakter parfwa li i antre i vin degaz lasasen, koupe sirtou si i annan bann movetan, *ok?* E sa nou apresye.

Me sa ki mon war ozordi se ki mon krwar nou bezwen reetablir en striktir formel, en striktir ki kler lo ki fason nou partaz responsabilite pou nou kapab *take* sa bann *challenge* pye dibwa enn fwa pour tou. Akoz *MNAs* ek *DA* se sa 2 *focal point* ki ganny *call* ler i annan bann tel lensidan parey.

E pou nou i en gro *challenge* ler ou pa konnen egzakteman lekel ki pou fer, ler ou *call* en Lazans i dir ou li i napa, i pa pe kapab i nepli son

responsabilite ouswa lot i dir ou lot.

E se sa ki mwan mon krwar ki nou bezwen re etablir en striktir - pa neseserman parey i ti ete avan. Akoz Minister Finans li i ti dir a en pwen ki zot pe nepli donn larzan pou pran responsabilite pou koup pye dibwa, e se *the ownership of* sa dimoun, sa propriyeter ki pou koup pye dibwa.

Me la size devan nou se kot i konsern Gouvernman li menm li, se son propriyete, son later ki pou li lekel ki pou dil avek? Lekel ki pou responsab? I pa kapab poz sa responsabilite lo Ladministrasyon Distrik, akoz nou napa resours pou fer sa. E ler ou koz ek *DA* i dir nou napa, i koz ek *Local Government* i dir napa.

So nou, nou bezwen la koman en Lasamble, akoz i afekte sirtou nou ki annan distrik ki mannyer nou tir en pe sa bann presyon ki pe tonm lo nou, pou zot kapab osi *delegate* e met bann sityasyon anba kontrol. En lot pwen ki mon anvi mansyonnen, se rol *DRDM* ozordi ki'n sanze, *DRDM* dan lepase se pou li kapab *mitigation and disaster*.

E dan *mitigation* se ou idantife bann landrwa ki later Gouvernman sirtou, e menm

pou prive ki zot war i annan bann danze. I ti kapab pye dibwa i ti kapab ros. I ti kapab en semen petet ouswa en pon, tousala ti annan en striktir.

E *DRDM* li mwan mon rapel Mr Speaker, akoz mwan mon'n grandi dan en rezyon ki ti annan pa mal pye dibwa danzere sirtou Albizya, kot nou ti komans en programm ki ti *DRDM* ki ti inisyé li menm li e nou ti idantifye, e tou le lannen ti annan en serten nonm baze lo Bidze ki ti ganny *allocate* atraver sa *Livestock Trust fund* pou kapab koup serten sa bann pye dibwa.

E sa mon krwar ti ale pou apepre 2 an e nou ti kapab met serten a bann gro pye Albizya ki danzere ki tonbe tou lazournen anba kontrol. E la tou keksoz in tonbe *DRDM* i nepli annan sa kalite rol kot i ti idantifye, met devan Legzekitiv e bann Departman zot sa ki pran son responsabilite i pran baze lo Bidze ki zot ti annan.

So nou'n arriv lo en pwen la dan en *junction* la kot nou bezwen vwar la fason striktir ki zot, zot anvi sa Gouvernman ozordi dizour i anvi adres sa size e ki mon krwar i enportan.

E pou mwan Mr Speaker enn bann konponan kle ki bezwen antre se letan nou pe

koz *the Planning Authority*, osi pou bann dimoun ki annan zot propriete Lalwa, i bezwen dan en fason ou e lot ouswa regilasyon, ouswa menm dan atraver serten Polisi, met serten responsabilite lo Gouvernman li menm li mon pou dir, e osi i ava met lo responsabilite lo piblik an zeneral.

Akoz? Nou bezwen kapab annan en fason fer ki i ava dir klerman ki si nou'n war poudir i annan en pye dibwa ki pe zoz en menas - sirtou le nou'n ariv dan bann moman movetan, i ava annan en landrwa direk en *focal point* ki nou zoz avek e la sa *focal point* li i a konnen, i a konn son bann ABCs poudir be sa i pou bezwen pas atraver tel Departman e tel Lazans pou kapab dil avek dan en dele letan rezonnab.

Akoz in annan fwa ki nou'n zoz lo *emergency* pye dibwa ki'n pran plis ki 3 semenn pou dil avek, e menm ler in tonbe osi, in pran letan pou dil avek. So nou pa kapab kontinyen avek sa kalite pratik ki nou bezwen kler lo la.

E pou Sesel koman en Pti Leta Zil ki nou annan en kantite laverdir en kantite pye dibwa sirtou dan sid was, ler nou konnen i ariv aswar sirtou ek movetan, petet i ava ed nou osi pou en pti pe trankilate, nou

konnen poudir be si i arive en problem e nou konnen lekel ki pou pran responsabilite. E nou, nou osi nou a zwe nou rol.

So dan en fason tou sa bann Lazans ki ava enkli *Local Government*, *SLTA*, Minister Lanvironnman, *MIHLT* ki laba enkli avek son *Planning* e osi ki rol sa *the new NDRM*, *DRDM* oubyen *NDRM*, i kapab zot osi se asiz ansanm pou diskite lo lafason ki nou pou kapab rezourd sa problem.

Byensir Minister Finans i bezwen *onboard* li osi, akoz se li ki pou kapab annan larzan ouswa met a dispozisyon resours finansyel, pou zot kapab enplimant sa bann sityasyon ki kapab deklanse e ki pou deklanse.

So pou fer zistis a sa Mosyon Mr Speaker, i enportan pou revwar en pe sa kad legal ki egziste ozordi, vwar ki mannyer ou kapab, akoz si i annan bann moman letan kot ou met ou ka devan ou ka pa pe ganny ekoute. So ki rekour ou annan dan en fason en pti pe pli aze dan plas al fer bann gran, gran kontour pou al devan Lakour pou al rod en parfwa ki problem pa pou rezourd. Ouswa sa endividli li i pa pe ekoute e la ou koman *involve Lapolis*, ou komans *involve*

bann ka devan Lakour ki petet i ava ganny *fine* apre.

So pou nou evit sa bann kalite sityasyon arive, annou met striktir an plas, annou vwar la fason meyer avek sa bann Departman ki mon'n site i kapab donn koudmen.

So avek sa Mr Speaker mon pou donn sipor sa Mosyon, akoz nou bezwen fer zistis nou distrik, zistis nou bann lensidan ki arive, e omwen osi zistis a bann ki vin bann viktим sityasyon kot propriete lezot i ganny afekte, e parfwa ni en konpansasyon ou pa gannyen akoz i annan bann ki'n sibir domaz avek zot transpor e i annan bann zot bann *fencing*, zot bann *boundary wall* in ganny afekte.

E i annan menm ki lakaz in kraze ozordi, ki ankor pe espere pou ganny en pti konpansasyon avek sa proprieter prive, ki parfwa li i oule zwe gro lebra e i annan menm bann etranze osi ki *culprit* ladan ki zot osi zot pa ni enterese.

So nou bezwen vwar fason ki mannyer nou adres sa. E mwan lo kote Gouvernman mon konnen poudir, e mon konvenki ki ler bann lensidan parey i arive, Gouvernman i pran son responsabilite atraver *Local*

Government NDRF Fund e osi parfwa atraver sistem ASP.

Me pou nou se prive ki mannyer nou adrese. San ki nou bezwen al fer batay legal al pey avoka ki parfwa le ou sorti i pa benefisyé ou dan naryen. So avek sa Mr Speaker mon siport sa Mosyon. Mersi.

MR DEPUTY SPEAKER

Mersi Onorab. Mon ava aprezan envit Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou koleg e en bonn apre midi spesyal pou tou dimoun dan Perseverance.

Mr Speaker i fer mwan en gran plezir pou mwan kapab ganny sa sans partaz mon kontribisyon atraver sa Mosyon, akoz dan Perseverance sa i en lager ki nou pe anmennen pou bokou letan. Mwan ek DA, mon krwar nou'n fer 4 vizit dan Perseverance konsernan pye dibwa.

Mr Speaker Mosyon anmennen par Onorab Lemiel, i en Mosyon tre valab e i vreman bezwen latansyon irzan. Ler mon dir latansyon irzan se ki ozordi nou bezwen pran kont ki avek sanzman klima, nou nepli kapab fye lo prediksyon letan.

Bomaten ou leve divan i normal, soley pe tape, tou keksoz i ok, dan lazournen i kapab zis sanze e bokou lezot keksoz i kapab arive.

Mosyon i dir ki Lasanble i demann Gouvernman pou imedyatman adres sa sityasyon pye dibwa danzere, lo propriete Gouvernman ki pe poz menas a lavi en propriete prive dan bann kominate lo Mahe, Praslin e La Digue.

Mr Speaker fodre ki nou osi pran kont ki i annan bokou propriete prive ki i annan bokou pye dibwa, ki ozordi zot osi zot pe koz danze a lavi e osi lo semen piblik.

Mr Speaker sa problem pye dibwa danzere in anvair Sesel antye, i osi enportan ki fodre pa ki nou get zis lo kote lanvironnman ek prezervasyon nou bann verdir, me nou bezwen osi pran kont ki lavi imen i osi enportan. Wi i annan bann pye dibwa ki'n pou s naturelman, me in osi annan serten pye dibwa ki'n ganny plante.

Mr Speaker pandan letan ki sa bann aktivite plant pye dibwa ti a pe ganny fer, petet nou ti pe zis mazin lo kote prezerv lanvironnman, prodwi loksizenn ek ler fre, ganny lonbraz, ganny son prodwi

nitrisyon e osi lenportans son dibwa li menm.

Me malgre tou son bann bon rezon ki nou'n vin avek i osi annan son kote danzere. Parey loter Mosyon in eksplike bokou bann pye dibwa ki'n ganny plante ouswa pouse lo li menm obor semen, ozordi pe koz bokou danze ek bokou lenkonvenyans.

Sa i enkli kot lavi en dimoun, andomaz en transpor, rasin i filtre anba semen e i kas semen, brans ou menm sa pye dibwa i tonm lo laliny elektrisite ouswa lo lezot laliny komunikasyon, kre trafik, sirtou letan en pye dibwa i tonm atraver semen piblik.

E la nou tou nou konnen ki pou arive, semen i fermen naturelman, si napa lezot larout alternativ, retar i pran plas, dimoun ki pe al travay i komans, e la panik, i komans kre panik.

Me sa ki osi pli grav ki nou bezwen pran kont se ki, si i arive ki dan en lanbilans ouswa *Fire Brigade* i bezwen fer sa semen pou en lot sityasyon *emergency* dan sa menm lenstans, semen li in bouse avek en pye dibwa ki pou arive?

Mr Speaker konmela i pa ni bezwen annan divan pou en brans pye dibwa desire, ouswa pou enn pye dibwa tonbe. Lapli

osi i zwe son rol, kot delo i pas anba bann rasin dibwa ki'n ganny ekspoze par lao later, e la a en serten letan sa pye dibwa i zis derasinen.

E la Mr Speaker nou tou, nou pou remarke ler nou fer sa semen, sa travay ki pe ganny fer kot depo *SPTC* mon pou dir mon vreman satisfe e mon pou felisit sa linisyativ. Mon pa konnen lekel ki'n deside si *SPTC* li menm si en kontrakter.

Me mon mazin byen ki an Oktob lannen pase mon ti war bann travayer bann drayver *SPTC*, zot ti a pe menm fer sa legzersis zot ti a pe koup dibwa obor semen. E mon pou dir zot felisitasyon pou sa.

Mr Speaker pou en bon pe letan mon pa ankor tann okenn legzersis koup pye dibwa ki poz danze pou piblik, ni atraver radyo, ni lo televizyon. Lontan tanzantan ti annan kot ou ti war bann dimoun pe pase e bann travayer *Forestry*, Lanvironnman pe pase pe regard bann pye dibwa ki danzere e ou ti war sa legzersis, be nou pa ankor tande pou en pe letan.

Eski nou pe zis esper ler ion tonm dan semen pou mou mobilize? Eski annan en Bidze pou fer sa travay? Mr Speaker annan osi serten later prive ki bord avek semen piblik, e zot

propriyeter i refize *Maintain* zot propriyete e koup bann pye dibwa ki poz danze pou piblik an zeneral.

Byensir si en lensidan i arive sirtou kot semen piblik i konsernen, Lazans konsernen pou napa swa, zot pou bezwen netway semen pou fasilit mouvman e sa i vin avek en kou.

E mon krwar ki sa propriyeter i devret pran son responsabilite li osi, Sesel i ptipti e komela i fasil pou nou konnen pour ki sa bann propriyete ki son met i devret pran zot responsabilite zot osi, pa zis fye lo Gouvernman.

Mr Speaker atraver sa Mosyon, alors mon pou demande ki Gouvernman i vin pli sever e fer li en Lalwa ki tou propriyeter prive ki zot later i bord obor semen e semen piblik, i oblize koup pye dibwa ki poz danze pou piblik, osi byen ki lavi nenport dimoun. Parey Mosyon i osi demande ki Gouvernman i adres sa sityasyon pye dibwa danzere lo propriyete Gouvernman, mon pou siport sa demann.

E lo non Lotorite Distrik Perseverance, mon pou fer sorti ki pou nou, ki nou pe fer demars pou bokou letan pour ki tou partner kle i zwenn ansanm, pou fer en travay lo

semen Ile Perseverance depi an kiton lekol *Independence School* ziska anndan dan Perseverance 1. Kot sa bann pye dibwa, sa bann pye sed in tro gran e parmi i annan in kourbe, i reste zis pou zot derasinen nenport ler.

Pou mwan sa pou vin en katastrof ki personn pa pou swete i arive. E alor mon pou sipliye, pour ki Lazans konsernen i bouze e i fer en keksoz avan ki sa bann pye sed i tonbe e i kre en maler.

Mr Speaker mon pou siport sa Mosyon anmennen par Onorab Lemiel, an esperan ki travay i a komanse konsernan sa size pye dibwa danzere o pli vit posib. Apre tou proverb i dir "*Prevention is better than cure.*" Mersi.

MR DEPUTY SPEAKER

Mersi Onorab. Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker. Bonn apre midi tou Manm e tou dimoun a lekout.

Mr Speaker sa Mosyon ki devan nou ozordi i enn bann Mosyon ki donn nou Lasanble, don nou Manm Lasanble en loportinite pou adres en size ki reel. I reel dan nou bann

kominote e ki pe afekte direkteman nou bann sitwayen, me ki zot pa pe neseserman war en solisyon dan tou bann lenstans ki zot rankontre ek sa bann problemm.

Mon osi anvi dir Mr Speaker, ki i en Mosyon anmennen par Manm Onorab lo nou kote Lasamble, ki nou kapab dir en Manm ki reste tou zour konekte avek bann size distrik e bann size Nasional. Alors mon krwar i en Mosyon ki annan merit debat lo la.

I annan en kantite lenstans dan bann distrik dan kominote, kot parey mon'n dir i annan bann sityasyon kot bann lezot dimoun i war zot, swa dan difikilte, ouswa zot war en sityasyon ki parfwa zot pa konnen kote pou ale, ki Lazans pou dil avek e apre kalamite i arive, apre i vin en sityasyon kot ou war keksoz Ankour e i vin pa zoli.

So Mr Speaker i enportan *however* ki nou note ki ozordi Sesel nou, nou'n ganny rekonnet e apresye atraver lemonn pou travay ekstra ki nou'n fer an relasyon avek proteksyon lanvironnman e nou bann biodiversite.

Annefe ozordi Sesel bokou in ganny fer dan domenn proteksyon lo bann lafore, kot ozordi nou'n ariv a en nivo

proteksyon nou bann lafore, 49pourasan preski 50pourasan nou lespas teres ki anba Lalwa mon pe dir. E osi nou annan apepre 80pourasan a nou lespas teres osi ki anba sa ki nou apel bann *forested area*.

Sa Mr Speaker i magnitud travay e lenportans ki nou'n mete koman en pei atraver proteksyon nou lafore, nou biodiversite e nou lanvironnman an zeneral.

E Mr Speaker ozordi sa zefor i pe ed nou soutenir prensipalman nou Lendistri Touris ki nou laverdir i en *unique selling point* dan en sans pou nou, ki atrakte touris e ki atrakte bann serser dimoun atraver lemonn pou vin Sesel.

E i osi soutenir en pti sekter lendistri forestyer kot bann dimoun ki koup dibwa e zot ganny zot lavi atraver louvraz koup dibwa. So i annan en nesesite pou nou *Maintain* sa travay ki nou'n fer anver proteksyon nou lafore, proteksyon nou bann dibwa.

E enn bann zouti Mr Speaker ki ed nou fer sa ki'n ed nou *over the years* fer sa, ki'n ed nou zer en pe nou bann lafore *Maintain* en pe nou biodiversite, e asire ki nou pa perdi serten lesspes ki petet zis Sesel andemik Sesel, se sa ki ou apel *Breadfruit and Other Trees Act*.

Mon krwar i en Lalwa ki date depi en bon pe letan si mon pa tronpe 1917, i en vye Lalwa, me selman sa Lalwa in ganny servi ozordi. Par egzanp si ou anvi koup en pye lagati, ouswa si ou anvi koup en pye fiyapen i annan serten permision ki ou bezwen rode pou ou kapab fer li.

So sa Lalwa in ed nou en pti pe protez en pe bann dibwa ki en pe rar, e in ed nou kit en pe sa *forest cover -sa greenery* parey nou tou nou war, parey nou tou nou kontan. Me Mr Speaker problemm ozordi ki Mosyon pe adrese, i pa neseserman sa. Nou tou nou dakor nou tou nou'n apresye e nou kontan zefor ki nou'n fer koman en pei pou *achieve* sa ki mon'n dir.

Me problemm ozordi pa sa, problemm i vreman relye avek bann pye dibwa ki dan bann landrwa publik lo bann later par egzanp Gouvernman oborsemen, Onorab Bastienne in fer referans avek bann pye dibwa *alongside* semen ki al Perseverance, i annan pye dibwa tout *along* sa ki nou apel semen i mont *from* Roche Caiman an montan, sa bann pye sed sirtou.

I annan bann pye dibwa dan bann semen par egzanp Morne Blanc. I annan en

kantite bann landrwa mon pa bezwen al partou, nou tou nou konnen i annan en kantite bann landrwa kot i annan bann pye dibwa ki poz en danze pour sekirite nou sitwayen. Pou sekirite lo zot bann *asset*, lakaz, transpor, menm sekirite nou bann lenfrastruktir. Par egzanp difil kouran, elektrisite par PUC.

E i osi annan problemm ki ozordi nou pe gete, i osi annan bann later prive ki swa i abandonnen, ouswa i napa devlopman pou le moman me ki pye dibwa i grandi nou konnen nou klima mannyer i ete.

I fer li fasil ki par egzanp pye Albizya ou kit li la ozordi dan detrwa lannen ou vini in vin en gro pye dibwa ki apre i poz danze pou swa sa *neighboring* later ki la, ouswa pour later publik. Ouswa ennler souvandfwa pou ou prop propriete, ou prop lakaz, ou prop transpor.

So sa mon krwar i *the main issue* ozordi ki'n fer Onorab anmenn sa Mosyon e ki fer ki nou debat lo la e ki Gouvernman ki nou kapab donn serten propozisyon Gouvernman pou petet, pou nou war en solisyon, pou Gouvernman li menm e osi pou bann proprieter prive ki dan sa difikilte.

Mr Speaker ler mon pe koz sa bout Gouvernman avan. Ozordi mon krwar i mank en pti pe en lapros kordinen parey Onorab Aglae in dir, an sa ki konsern dil ek bann *issues* pye dibwa. Par egzanp ti annan letan ki *SPTC* ti pe koupe.

PUC i koup en bout lo son bann laliny pou protez son lenfrastriktir. *SLTA* osi i koup en bout obor semen ki afekte e andomaz lenfrastriktir semen e apre i annan Minister Lanvironnman, Departman Lafore ki osi dil avek bann pye dibwa ki lo later Gouvernman.

Me souvandfwa sa bann Lazans, petet nou koman en Lasanble ozordi, nou devret petet pe anvoy en mesaz *strong* avek Gouvernman. Si nou santi ki sa i en konsern pou nou bann sitwayen, nou devret pe anvoy en mesaz for avek Gouvernman pou dir, be Gouvernman ozordi kantite nou bann sitwayen pe ganny difikilte avek problemm pye dibwa, sirtou bann ki pres avek zot bann lenfrastriktir zot bann *asset personnel*.

E Gouvernman petet i bezwen met en pe plis larzan, resours dan bann landrwa konsernen e petet idantife en landrwa konsernen ki dil avek tou sa bann zafer, ekip li avek resours, ekip li avek materyo

pou li kapab dil avek sa bann sityasyon.

Mon dir sa Mr Speaker akoz mon konnen, letan ki mwan mon ti kot Lanvironnman mon konnen ki poudir zot ganny en kantite *request*. par egzanp pou koup bann pye dibwa ki lo later Gouvernman e menm prive parfwa i vin kot zot.

Me Bidze dan en lannen e kou pou dil avek en pye dibwa i sitan o, ki Bidze dan en lannen parfwa i pa ase pou dil avek tou sa bann ka ki vin devan sa Lotorite, sirtou kot Lanvironnman mon pe dir.

E petet nou letan nou pe *scrutinize* Bidze Lanvironnman, ler i vini tre prosennman, nou devret met en lizye for lo la e dir a i en problemm pou nou sitwayen.

Eski nou kapab rod kot ou annan en pti pe larzan, tir isi, met li la anba sa vot, e fer ki lannen 2023 plis louvraz i a kapab ganny fer pou dil ek bann pye dibwa danzere obor semen, ki afekte lenfrastriktir propriete Gouvernman, me osi lenfrastriktir propriete prive.

Petet nou bezwen gete osi si i annan en nesesite pou restriktir lafason ki nou dil avek sa, eski nou kontinyen kit avek Seksyon lafore ki li son louvraz se protez Lafore, nou pe dir li

koup pye dibwa. Me selman son louvraz se protez lafore, ouswa eski nou donn li avek mwan mon ankor dir *DRDM*, kot li i devret annan en pli gran rol, annan en pli gran.

Konmsi war en pe pli lwen dil avek *disaster management*, idantifye bann pye dibwa ki en problemm ki kapab koz en dezas e don li en Bidze, fer li dil avek dan plas ki zis i kordinen, i ava kapab osi annan en bout lenplimantasyon, ki ava ed nou *solve* en problemm ki ozordi i reel dan nou kominote.

Prezan mon vin lo propriyete prive Mr Speaker. Sa osi i an konsern dan bokou ban distrik sirtou bann distrik kot i annan sa ki nou apel *dense population*, kot bann lakaz i obor kanmarad e kot en dimoun ni annan en pye dibwa lo son later, ki si i tonbe i riske tonm lo 3, 4 propriyete, *destroy* tou sa bann propriyete.

Parfwa vre nou dir be letan sa pye dibwa ti pe monte, ou pa ti kapab koup li pou anpes li ariv sa oter? Me in fini arive Mr Speaker, in fini arrive.

E souvandfwa sa bann dimoun li sa bann propriyeter, i annan dezir pou koupe sa bann pye dibwa. Zot annan dezir me selman zot napa Bidze. Zot napa finansman zot napa mwayeren pou zot kapab dil avek

sa bann sityasyon. E souvandfwa al lo serten bann propriyete i annan 1, 2, 3 bann dibwa ki menasan e si ou pou al koup tou i vin en pake fortin.

So petet nou devret koman en Lasanble nou devret mazinen, eski i annan en fason ki Gouvernman i kapab antre atraver *community development*, atraver Lotorite Distrik, rod en fason ki mannyer nou ed *or* nou asiste sa bann propriyete prive kot sa bann dimoun vreman i annan en dezir pou fer sa, pou koup sa pye dibwa me zot pa kapab *afford*. Zot pa kapab *afford*.

Mwan mon'n zwenn en kantite sa bann lenstans diran mon bann letan travay dan Gouvernman. Me osi mon bann lenstans travay ki mon'n fer dan bann distrik kot mon'n ale.

Ou ganny en kantite *request* e si ou kapab ed nou rod en landrwa tap en laport, pou nou ganny en pti larzan pou nou kapab koup pye dibwa. Akoz i pe afekte mon *neighbor*. Mon pe ganny problemm, mon neighbor me met mwan Ankour, mon anvi fer me mwan pa kapa, mon napa larzan. So, i en problemm reel parmi bann propriyete prive, me nou bezwen rod en fason ki mannyer nou ed nou sitwayen.

Apre i annan Mr Speaker bann propriyete prive ki zis dan labandon la, e personn pa pe pran ka avek. E la nou bezwen rod en fason ki mannyer nou fer sa propriyeter dil avek son bann *threat* ki lo son later.

E si mon pa tronpe, si mon pa tronpe i annan serten provizyon anba *Curatelle Act* - si mon pa tronpe koman *the Curator of Vacant Estate* i annan serten keksoz ki kapab antre, e fer pou dil avek sa bann propriyete ki vakan, ki nou pa pe war personn, ki nou pa pe konnen ki mannyer nou *relate* avek en sityasyon.

Dernyen size Mr Speaker ki mon oule koz lo la e sa osi i en problem, i pa neseserman en problem Gouvernman, i en problem par egzanp lo bann serten propriyete prive, kot ozordi nou konnen i annan en kantite pye albizya partou.

E i annan dimoun ki tant pou, akoz i ser pou koupe zot tant pou krose. Zot kros sa pye dibwa, zot dir les li i a tonm par pti brans, pti brans, pti brans apre finalman ma rod en dimoun i dir i a vini zis i a ronny sa gro tron i vin pli bon marse.

Be Mr Speaker sa osi i en problem dan bann landrwa. Akoz ek divan vandswet gro, gro divan, ennler let in fini tonm tou sa gro tron i tonbe, swa i

tonm lo propriyete prive, swa i tonm lo semen, i kraz loto, i kraz difil elektrik, e i vin en lot problem depans ankor swa pou Gouvernman swa pou sa dimoun prive. So sa osi nou bezwen rod en fason ki mannyer nou dil avek.

E petet Mr Speaker solisyon se ki nou revwar tou nou bann Lalwa ki dil avek sa bann zafer, armoniz zot tou ansanm fer ki sakenn i pran responsabilite.

E kot i annan nesesite pou donn lasistans ede, nou rod en fason dan en mekanizm ki mannyer nou donn zistans nou ede sirtou pou nou bann sitwayen ki pli vilnerab ki annan dezir, ki annan lanvi pour pran aksyon avek sa sityasyon me zot pa kapab.

Mr Speaker parey mon'n dir mon krwar sa i en bon i en Mosyon akoz i en problem i parey senp. I paret senp i paret en problem kekfwa nou kapab dir be nou pa ti devret pe dil avek. Me i en problem reel ki nou sitwayen pe *face* dan bann diferan distrik e i annan ki'n deza perdi propriyete, i annan ki'n deza perdi assets.

E nou koman en Lasanble responsab, nou bezwen kapab met bann solisyon, met bann propozisyon, ater pou ed sa pep la deor. Avek sa Mr Speaker

mon a dir ou mersi e mwan Onorab Lemiel mon donn ou tou sipor pou sa Mosyon e mon pou vot pour Mosyon. Mersi.

MR DEPUTY SPEAKER

Mersi Onorab. Prosennman lo lalis se Onorab Romain.

HON GEORGES ROMAIN

Mersi m Speaker. Bonn apre midi tou Manm koleg Onorab e tou dimoun a lekout. Mr Speaker mon pou don mon sipor pou sa Mosyon, akoz i enn ki afekte nou koman Manm Lasanble parey loter Mosyon in fer resorti.

Mr Speaker ler mon get dan mon distrik mon vwar ki sa problemm pe vin enn ki bezwen ganny adrese. Pran legzant dan enn nou sou distrik Angar kot i annan bokou gro pye dibwa tou dilon semen, kot nou'n vwar sa in vin en vre menas pou zabitan ki servi sa bann semen.

La Mr Speaker nou'n fer plizyer demann atraver distrik pou kapab koup sa bann pye dibwa. Me malerezman nou vwar nou bezwen *call Lazans* e ki personn pa oule pran sa responsabilite pou vin koup sa bann pye dibwa.

E la nou vwar nou bann zabitan zot menm ki bezwen rod lasistans pou kapab koup sa bann pye dibwa. Mr Speaker lo

nivo distrik i devret kler lekel Antite ki responsab pou koup pye dibwa dan landrwa piblik, ler i poz en menas. E sa enn Antite i devret annan en *mechanism* an plas ki fer li okouran ler i annan sa problemm e mon pa esper ariv problemm pou nou pran aksyon.

Mon lans en lapel pour ki nou kapab travay pli pre ansanm avek bann antite ki ofer sa bann kalite servis pou distrik ki keksoz ava kapab mars pli byen.

Mr Speaker la mon ti a kontan lans en lapel avek *DRDM* pou li kapab petet ganny sa manda pou kordin en *survey* dan tou distrik, pou regard tou bann pye dibwa ki poz en menas pou nou bann lakour e nou bann zabitan. Mon mazinen ki sa i ava fasilit sa prosedir pou kapab rezourd sa problemm, sa an ki nou dimoun pou bezwen tap plizyer laport pou kapab koup sa bann pye dibwa.

Mr Speaker mon pa pou long. Avan mon terminen mon oule osi fer lapel avek bann lakour prive, pou osi pran zot responsabilite pou fer menm legzersis dan zot prop lakour.

Si zot annan bann pye dibwa ki poz menas pou zot vwazen, annou pran kosyon

boner e nou pran nou responsabilite e koup sa bann pye dibwa. Annou evit problemm e annou rod solisyon boner. Mr Speaker mon pou donn mon sipor Onorab Lemiell. Mersi Mr Speaker.

MR DEPUTY SPEAKER

Mersi Onorab. Onorab Vidot.

HON AUDREY VIDOT

Mersi pou donn mwan laparol Mr Speaker. Tou dimoun ki a lekout zabitan Roche Caiman bonn apre midi. Mr Speaker mwan osi parey lezot Onorab Ki'n koz avan mwan mon pou aport mon sipor anver sa Mosyon.

1 enn akoz Roche Caiman i osi en distrik ki pa dan serten sa bann difikilte ki swa lo later Gouvernman ouswa lo later prive, ki koz en menas pa zis pou propriete, me osi pou bann endividé.

Me mon osi oule met lanfaz apard ki mon bann koleg ki'n dir ki i enportan pou reviz lo Lalwa ki wi mon pou dakor - reviz Lalwa ki mannyer nou war nou kapab aport serten sipor pou resours sa problem.

Me osi pou anvoy rekomandasyon lo bann striktir petet ki la ozordi, me petet pa pe fer sitan ase pou adres sa ban konsern.

Mon dir sa akoz Minis in fer kler poudir atraver repons ki in donn avek Onorab Lemiell an ekrir, pou dir ki propriete Gouvernman i ganny amenaze par Minister ki responsab pou Later ek Labita.

E par kont ki i annan serten Lazans ki zot osi zot annan responsabilite pou zot koup bann pye dibwa ki en danze e ki anba zot ladministrasyon.

Par egzanp in nonm PMC i enn, kot bann Housing estates, e petet kot Minister Lagrikiltir e osi Minister Ledikasyon. Mwan mon pou met lanfaz lo enn; - Roche Caiman menm si nou annan gran mazorite poursantaz ek *housing estate*, nou napa sitan bokou bann pye dibwa ki menase kot bann lakour.

Me plito i bann pye dibwa ki lo later Gouvernman dan bann *housing estate* me ki pe kre serten nwizans e petet pa pe ganny sitan *maintain* apropriye. Akoz sakenn i ris pou li swa LWMA i dir ou e i tonm en bout pou kontrakter lot *PMC* i dir ou non sa i pou tonm pou lot. So ou vwar parfwa i annan sa konfli antre Lazans lekel ki responsab pou *maintain* bann pye dibwa, ki petet zot brans oubyen sa i kre serten menas, ki i demann *trim* pou *maintain*,

pour ki i *avoid* koz en danze pou piblik oubyen motoris.

E nou osi annan parey mon koleg Onorab Cosgrow in fer resorti, tou dilon *highway* i annan bann gran, gran pye sed e mon koleg Onorab Bastienne osi in fer resorti. Letan ou vin la atraver Lasanble Ile Du Port pou al dan Perseverance ou rankontre parey.

E Roche Caiman a plizyer repriz osi Lotorite Distrik i met devan *SLTA*, pou vvar ki mannyer zot kapab bann ki lo later Leta pou zot kapab *trim*. Nou konpran wi ki i annan serten i lo later prive. E *SLTA* i annan mazorite fwa i pou rantre si sa pye dibwa in fini tonbe.

E nou konnen i annan serten bann morso later ki zis parey vizavi kot *Bird Sanctuary* nou sa bann pye sed i la e i lo en later prive. Fodre ler i tonbe ki *SLTA* pou li kapab antre pou li koupe. E bann ki lo kot Stad Linite ki lo later Leta menm si nou met konsern pou fer koupe, me ou pa war sa konsistans pou zot war ki mannyer pou zot kapab *maintain* sa bann pye sed, pou asire ki zot pa koz zis en danze pou *highway* bann transpor ki pas la lo *highway*, me osi pou bann lakaz bann rezidan Roche Caiman ki balizaz avek sa *highway*.

Nou annan konsern kot ledikasyon kote kot lekol bokou fwa bann rezidan i dir ou i annan serten pye dibwa ki kot lekol ki koz en nwizans, oubyen en menas osi pou zot lakour. Me lekol i demann led avek distrik, me distrik napa Bidze pou li ede.

E Minis in fer resorti dan son repons ki i annan lo kote ledikasyon i bezwen *Maintain*. So si sak Minister ki konnen poudir i annan serten Bidze pou swa proze oubyen *maintenance*, i bezwen, oubyen si dan zot kontra ki zot donnen avek bann dimoun ki *Maintain* lakour lekol, i bezwen *state* kler pou ki sak Lazans i pran zot responsabilite.

Pou zot kapab fer sir ki sa bann pye dibwa i ganny byen *Maintained* e si fodre koupe ki nou war poudir i enposib pou zot kapab tou-le-z-an *you learn* met larzan pou okip zis en pyre dibwa zot retir li.

E i bezwen osi annan bon relasyon travay antre parey bann Lazans parey *LWMA* letan zot *contract* bann kontra *Beautification* kot bann dimoun i plante. Zot bezwen asire osi pour ki bann kalite pye dibwa ki zot plante i pa vin osi en menas pou pyeton, oubyen bann motoris.

Akoz bokou fwa nou vwar kot osi sa bann pye dibwa sa ban kalite pye dibwa ki ganny pakte dan serten landrwa rasin i monte, semen i kase i in en lot kou kot Gouvernman in war li pe depans plis ankor pou li war li kapab aranz bann lenfrastriktir ki ganny andomaze, akoz petet son bi *planning* ki mannyer i pou plant e *Maintain* bann kalite plant - pye dibwa ki zot mete dan bann serten landrwa.

Lot kontribisyon ki mon oule met lanfaz lo la, se i bezwen annan en striktir *at least* omwen *one-stop shop* nou kapab dir. Mon dir sa koz wi in annan bann diferan Lotorite ki ganny Bidze pou zot kapab mentenir bann pye dibwa ki i danzere, ki swa lo tou bann landrwa ki zot *Maintain*.

Parey in ganny fer sorti *PUC* i responsab pou li kot i konsern son bann laliny koneksyon, son bann poto elektrik. *SPTC* i get lo son bout balizaz pou li ki i normal, mon pa krwar i responsabilite *SPTC* pou li al koup pye dibwa kot i pe ganny difikilte pou son bis pase, sa i pou tonm anba *SLTA*.

SLTA i responsab pouli kapab fer sir ki bann pye dibwa ki en menas pou semen, i bezwen ou annan en striktir ki dan son Lalwa i permet li kapab

- *be it* i lo Gouvernman oubyen en later prive, si i en menas pou motoris ek pyeton, i bezwen annan sa pouwvar pou li kapab koup sa bann pye dibwa, oubyen *trim* sa bann pye dibwa.

E i bezwen osi annan en striktir ki si nou pe koz lo baz kominoter. Si nou war poudir i enportan pou nou revwar sa striktir ki ti la an plas kot Gouvernman Lokal ti antre, me i bezwen byen pli byen striktire pou asire poudir ki i ganny marse byen normal e i ganny fer byen zis.

Mon donn legzanp mon rapel koman en ansyen Administrater Distrik, letan i annan bann ka kot nou ganny rapor bann pye dibwa danzere lo later Gouvernman, si nou konnen poudir *MLUH* ki ti annan Bidze pou fer koupe, nou ofer rapor avek *MLUH* nou enform li nou ensiste ki i vini pou fer koupe.

In annan leka kot zot in neglize, e ler in neglize kot letan in andomaz propriete en dimoun prive nou'n vwar Gouvernman in bezwen antre pou li al pey domaz. So nou pe seye pou anpese ki sa bann kalite pratik i arive. I annan de la kot nou ti demann avek sa dimoun endividé li si i prive, ki nou war poudir i pa pe kapab *afford* pou li peye.

Nou bezwen fer sir ki nou prouv avek Gouvernman poudir regarde vwala bann dokimantasyon ki *means test* sa dimoun, ki montre poudir wi son mwayen pa permet li pou li kapab pey en dimoun, pou li kapab fer koup sa pye dibwa. E la Gouvernman i antre i *tender*, neseser pou li kapab *allocate* pou fer koup sa pye dibwa.

E i konnen poudir nou bezwen osi adrese bann *issues* ki nou'n rankontre osi e pase an term peyman pou asire ki keksoz i al drwat, bann rikord i annord, e ki sa dimoun i ganny peye dan son dele letan ki i merite pou adres bann konsern ki annan dan bann distrik lo size koup pye dibwa.

Mr Speaker parey bann Manm Koleg Onorab in fer resorti, sa Mosyon i annan son gran lenportans. Me Gouvernman i bezwen vwar zeneralman lo tou laspe kot i konsern koup pye dibwa dan pei. *Be it lo later prive, be it lo later Gouvernman*, i bezwen annan en bon striktir e bon fason ki nou konnen poudir osi nou kapab edik popilasyon lo zot rol e responsabilite.

Ti annan en programm en letan kot *PMC* ti fer bann pti *videos* kot zot ti enform dimoun letan ou'n antre dan en lakaz dan en *housing estate* kwa ki

mannyer la fason letan ou pe okip ou lakour, kalite plant pye dibwa ki ou plante, ou bezwen *Maintain*, ou pa le li bon en serten oter ki ou pa kapab *Maintain* ou tousel.

E konsern ki osi annan dan mon distrik ozordi dan sa size se ki, i annan en kantite dimoun ki pe aste bann lakaz Roche Caiman prive kot zot pe espesyalman pe lwe li avek etranze, oubyen pe met etranze reste ladan. Me sa etranze pa pe *Maintain* sa lakour. I pa pe *Maintain* zot bann propriete e i vin en menas pou bann lezot lakaz ki aziste obor.

Zot pa pe okip zot propriete. So i enportan ki Gouvernman letan i pe analiz sa size ki nou pe koz lo la ozordi, i fer li dan en fason ki i an global tou sa bann pwen ki nou bann Manm Onorab nou'n fer resorti, ki nou ti ava voudre ganny adrese e ki i ganny dil avek.

E menm si nou'n ganny dir lo kote lafore, kot i dir ou i annan bann zot donn permi, me i ankor annan konsern. Parfwa ler zot ganny permision pou koup en pye dibwa, me ou war ou *still* dan sa proze pou tap tou sa laport ki ou pa konnen pou rode, ki mannyer pou ou rod en fason koman Lotorite Distrik pou ou kapab omwen posib fer

rezourd sa problem fer sa pye dibwa ganny koupe, menm si ou'n ganny permi pou koupe. Me ou ede pou war lekel ki dil avek, ou pa pe gannyen.

So mon santi poudir dan tou laliny apard ki wi, Lalwa i merit ganny revwar me striktir aktyel ozordi i bezwen drwat e enformativ pour ki piblik i konnen kote i ale pou li kapab adres sa konsern pye dibwa danzere, ki swa en menas pou son lakour, propriete prive enkli pou bann endividé.

Vwala mon kontribisyon anver sa Mosyon Mr Speaker. Mersi.

MR DEPUTY SPEAKER

Mersi Onorab. Prosen entervenan lo lalis se Onorab Michel Roucou.

HON MICHEL ROUCOU

Mersi Mr Speaker. Bonn apre midi a tous. Mr Speaker sa Mosyon anmennen par Onorab Anse Royale. Onorab Lemiel i vreman enportan pou tou distrik.

Mon osi tou mon pou donn en pti pe mon kontribisyon lo la. Be selman mon pa pou tro long.

Mr Speaker, nou tou la anndan nou konnen poudir se ki demen zour nou anvi fer en proze dizon nou pe fer en proze

semen, ki baliz avek en propriete prive, nou bezwen pas kot son met sa later pou siny en dokiman ki apel *wayleave*.

E si ou pa siny sa dokiman ou napa dwa pou ou antre lo propriete sa dimoun. E souvandfwa i bokou traka ki vin avek akoz souvan fwa ou bezwen fer serten negosyasyon avek serten dimoun. Be selman par kont ki nou war, dimoun ki annan zot later prive zot pa le pran zot responsabilite ler i arriv lo kote en keksoz ki pou menas petet serten lenfrastriktir. Oubyen lakour ki pre o bor zot.

E la kot problem i konmanse Mr Speaker. Mwan mon panse poudir se ki nou, nou bezwen komans edik nou pep. Edik nou pep deor ki fer zot ganny en konpran poudir pa toultan ki Gouvernman pou la pou vini pou fer tou keksoz pou nou.

Nou, nou bezwen komans vin en pep kot nou pran nou responsabilite. E fer sir poudir ki nou lakour i vin en landrwa ki an sekirite pou nou menm nou. Pou nou vwazen. E oubyen pou okenn dimoun ki petet ki deservi kek semen lanmenm la o bor.

Akoz mon dir sa Mr Speaker? Mon pe dir sa akoz nou'n war plizyer fwa poudir en

dimoun i konnen poudir i annan en pye dibwa, ouswa in aste en propriete ki annan en pye dibwa ki petet pou vin en danze pou nenport endividé, li i reste anndan se li, li. I fer konmsi i pa war sa pye dibwa ditou li. Ki i espekte, i espekte poudir demen Gouvernman i vini i vin koupe pou li.

Nou, nou bezwen edik nou pep. Edik Seselwa poudir se ki sa larzan ki nou pou servi pou fer sa louvraz avek, i larzan tax *payers money*. E zour ou neglize. Ou pa pran ou responsabilite. Ou les en pye dibwa ki ou'n war la, i vin sitan gran ki si ou dil avek sitan boner pa pou kout ou bokou.

I pa pou kout ou bokou. I pou kout ou pli bon marse. Pou ou kapab anpese ki demen i vin en problem.

Ozordi dan laplipar distrik Mr Speaker. Laplipar problem pye dibwa i pa toulstan lo propriete Gouvernman li. I lo bann propriete prive. Ki sa ozordi nou war nou *otorite distrik* nou bezwen rod en mannyer. Swa nou pou bezwen al rod son met, demann li pou koup son pye dibwa. Ouswa li menm li demen i pou dir ou li i napa larzan i pa pe koupe.

Nou ganny en konpran poudir se ki nou pas kot Madanm Tinel anler Rochon. Li

i en trwazyenm az i demann sa lasistans i pa pe kapab akoz nou konnen, konmela pou dir ek bann kontrakter ki koup pye dibwa zot sarz vreman ser. E selman si ou, ou en dimoun ki travay. Ou annan ou lakour, ou annan ou fammir, ou bezwen mazin ou sekirite osi tou. Pa toulstan ki ou pou bezwen asize esper Gouvernman vini vin fer tou keksoz.

Mr Speaker, mwan dan mon distrik mwan osi mon annan serten problem koup pye dibwa. Mon'n fer vizit ek plizyer Lazans. Mon'n fer vizit avek *forestry, PMC*, avek *SLTA*. *Name it* bann larestan Lazans. Be selman ki nou war. Souvan fwa nou war poudir pou en senp koup pye dibwa, nou pe tay sitan bokou landrwa.

I annan sitan bokou Lazans ki dil avek sa. Sanmenm sa ozordi avan sa Mosyon i vini mon'n pran en kontak avek Minister *Local Government*. In eksplik mwan byen li. I annan en diskisyon ki Gouvernman pe anmennen akoz zot war poudir se ki sak Departman i annan en bout ki zot fer.

SPTC ti fer en bout lo kote semen. Si an ka pe andomaz son bis, in dir i pa pou fer ankor. *SLTA* si pye dibwa i sorti lo nenport ki propriete Gouvernman, prive, *SLTA* i

monte. Akoz pou li anpeste kot i annan blokaz trafik. Apre nou annan Lazans *LWMA*. Li i pa dil avek bann gro pye dibwa. I dil avek bann pti pye dibwa si petet sa i vin en problem ki zot annan en serten met ki zot annan avek semen li osi.

Apre osi Mr Speaker, ki nou ti annan. Nou annan *PUC* ki fer *line cleaning*. Mon'n fer vizit ek *PUC* mon osi. Zot in eksplik mon ki mannyer zot travay i marse. Be selman nou, nou bezwen endik nou pep la deor ki zot bezwen pran zot responsabilite zot osi. pa toulstan ki tousala. La ek problem lekonomi pli move ankor Mr Speaker, i fer li vin en pti pe pli difisil.

E souvandfwa ki nou'n war dan lepase? I annan bokou bann dimoun ki annan bann propriete isi ki zot pa Sesel zot. Kantmenm zot ganny *call* ki i annan serten pye dibwa ki kapab pe menas. Sey pran kontak ek zot pou dir zot i annan serten pye dibwa ki lo zot propriete. Ki kapab koz en danze pou petet serten lenfrastruktir. Ki nou war? Zot pa enterese.

Selman demen si en dimoun i mont lo zot propriete pou en keksoz, zot in kapab pey en tiket avyon po desann. Nou, nou bezwen edik sa pep la deor.

Nou bezwen annan serten *enforcement* la deor, ki kapab dil avek bann sityasyon koumsa.

Mr Speaker, apre osi, ozordi zour nou anvi pou dil avek en proze Gouvernman Lenfrastruktir, Ozordi nou konnen *straight forward* nou al kot Departman Lenfrastruktir. E sa mon mazinen sanmenm sa ki Gouvernman pe sey vvar la, avek bann diskisyon ki pe ganny deroule, pou gete lekel lazans ki zot kapab fer li pran sa responsabilite.

Ki si demen *overnight* i annan en maler kot en pye dibwa in tonbe, Lotorite Distrik i konnen poudir se ki i kapab al kot sa Lazans kot i bezwen, pa bezwen war lo kot i pe bezwen tay partou. Nou dan nou distrik annefe i annan en louvraz ki *DA* pe fer. Kot ansanm avek lekip Brigad. Kot zot pe pas en pti pe partou dan distrik pou get en pti pe bann pye dibwa ki pe petet i an danze.

Ki pou zot kapab fer en serten travay kot ou kapab note ki demen zot kapab alert son met sa later li menm li. Ouswa met Gouvernman okouran poudir i annan serten danze ki la ki kapab afekte.

Mr Speaker mon konnen poudir i annan bokou dimoun la - dan mon distrik mon'n vizit

apepre 3 fanmir. I annan ki bann pye dibwa ki i tonm lo propriete Gouvernman. I annan osi ki tonm prive. E nou, nou pe espere pou gete ki direksyon nou Gouvernman pou vin avek. Ki demen nou ava kapab bouze nou osi.

Be selman an menm tan mwan mon pe sipliy avek Gouvernman, ki nou bezwen rod en fason pou fer bann dimoun ki annan bann propriete prive, pou zot pran zot responsabilite. Ki demen nou konnen poudir nou pa toultan nek tay kot Gouvernman pou nenport ki keksoz ki nou, nou pa pran nou responsabilite Mr Speaker.

Mon ava dir ou mersi. Mon pou donn mon siper sa Mosyon ki Onorab Lemiel in anmennen. Akoz mon trouv son lenportans e osi nou bezwen rod en fason ki mannyer nou kapab *reinforce* lo bann ki pa pe respekte. Mersi.

MR DEPUTY SPEAKER

Mersi Onorab. Prosen entervenan lo lalis se Onorab Ernesta.

HON PAUL ERNESTA

Mersi Mr Speaker. Mr Speaker, mon bann koleg Onorab, e tou dimoun a lekout bonn apre midi.

Mr Speaker, mon santi mon neseser pou mwan entervenir lo sa Mosyon. E sa Mosyon ki annan son bokou sans. Bokou lenportans.

E letan mon get sa Mosyon, E i osi en Mosyon ki tre pratik ki pe demann en solisyon pou soulaz nou pep la deor. Pou soulaz nou bann dimoun ki pe fer fas avek sa bann difikilte.

Si letan mon'n ekout lentervansyon, si ou le prezantasyon mon koleg letan i ti pe *move* son Mosyon, in donn nou bokou bann leksperyans pratik. Ki li bann difikilte ki li in pas atraver. E mon osi mon pa kapab nye sa bann difikilte, akoz mon osi mon konnen kwa ki i pe pas atraver.

Par lefe ki mon'n eksperyanse mon osi dan moman ki letan mon ti en Manm Elekte pou distrik Takamaka.

Mr Speaker, si nou get Sesel ozordi. Sesel nou ava dakor ki dan lemonn antye touris lemonn pe get li koman sa paradi teres. En paradi lo later. Me an menm tan sa paradi ki nou pe zwir, i anmenn en lot problem avek li. Son laverdir, nou'n pase nou koze.

Si nou get dapre lo kote son proteksyon. Ozordi Sesel i plis menm 50 poursan, menm pa plis, poursantaz i ganny

proteze anba Lalwa. E sa i fer li le sel pei dan Was Losean Endyen ki annan sa tel proteksyon anba Lalwa.

49 ou a 50 poursan i pa vedir en pti gin poursantaz. I preski lanmwatye nou later i anba proteksyon. E lanmwatye sa i fer ki lanmwatye nou later i ranpli avek pye dibwa. Letan mon'n koze mon'n koz lo Takamaka ki mon pou servi koman en leksperyans. Sel distrik si nou le - annou get dan rezyon Sid Was an montan. I bann landrwa ki annan plis laverdir.

E letan nou al ankor. Takamaka i sel distrik kot tou sa bann keksoz ki nou pe koze lo later prive i sel distrik ki annan plis later prive. Ki *own by*, par bann endividé. Me problemm avek sa, i bokou sa bann endividé, bokou sa bann later i bann later zeritye.

Ouswa bokou sa bann later, sa bann *owner* pa reste Sesel. Sa konsern ki zot pe dir i tonm direkteman lo distrik. Mon ava donn en leksperyans, letan mon ti dan distrik ti annan en zabitan. I pe desann, tou sa ki zot pe koze zot pe koz bann fe - mwan mon pe koz bann leksperyans.

En zour i pe desann pou li al travay, en pye dibwa i sorti lo en later prive i tonm lo son

transpor. Son transpor, en transpor ki i servi pou li al debourye pou li al travay. I lo *third party*. E nou konnen lasirans pa antre dan sa bann zafer. Sirtou si ou lo *third party*. Son transpor i *write-off*.

Pov dyab i bezwen prezan sey debourye rod lot fason ki mannyer pou ki kapab ganny son lavi.

Plis ek sa ou vvar li i monte desann pov dyab. I monte desann pou li sey ganny rekour pou *at least* pou li ganny compensate son transpor ki in perdi. I pa ganny naryen. *Ok*. In perdi.

(Mr Speaker, *advice* Onorab Loizeau i annan distrik, dir li taler entervenir pou koz lo son distrik. I pe *disturb* mwan. I pe anpes mwan koze Mr Speaker!)

MR DEPUTY SPEAKER

Kontinyen.

HON PAUL ERNESTA

Ek sa i annan en ta pye dibwa. Mr Speaker, sa leksperyans ki nou'n pas atraver, i fer nou rekonnet apresye lenportans sa Mosyon ki l devan nou.

Bokou nou in koz premye anmennen mon koleg Onorab Cosgrow in koz lo lenportans ledikasyon. I annan de fakter ki arrive.

En pye dibwa parey entervenan ki'n koze avan mwan - en pye dibwa, nou pa parey *Jack and the Beanstalk* ki letan nou leve bomaten pye dibwa i grandi. I pran letan pou li kapab grandi. Me nou eski letan sa pye dibwa pe grandi. Nou pa kapab pran en kouto swa en pti lars koup sa pye dibwa?

Eski nou bezwen esper sa pye dibwa, petet mon ava konpran par ler nou annan en pei tropik, nou bezwen en pe lonbraz. Mon ava konpran nou bezwen les sa pye dibwa grandi pou nou ganny en pe lonbraz. Me menm i pe donn nou lonbraz, i pe kre en danze, en risk pou lezot propriyete. Pou lezot dimoun.

I sa bann refleksyon ki nou bezwen fer. Wi nou konpran ozordi avek sityasyon ekonomik - nou konnen i annan bokou nou bann dimoun i pa kapab fer. Pou zot kapab koup sa pye dibwa ki'n gran. Sa pye dibwa ki en menas pou zot. Non selman pou zot, osi pou lezot propriyete.

Me son pert letan sa pye dibwa i tonbe, i bokou plis ki pe donn nou sa lonbraz. Ki pe donn nou sa proteksyon. E se sa bann direksyon ki nou bezwen komans anmenn nou bann *thinking*.

E se sa ki direksyon ki sa Mosyon pe demann nou. E ozordi pe demann Gouvernman pou kapab anmenn en fason - nou konpran lo kote servis - lo kote servis piblik, sa i en pti pe pli fasil. Me problem i ariv lo sa bann kategori dimoun ki mon'n mansyonnen pli boner, ki lo later prive ki zeritye. E bann dimoun ki pa dan pei. E bann dimoun *cannot be reached*.

Ki *salvation* nou annan preznan pou sa dimoun ki la li pe ganny afekte? Mon'n tann pli boner nou'n koz pou kapab amann Lalwa pou fer sir ki nou obliz - nou met serten penalti lo sa bann propriyete prive.

E nou bezwen vin pli serye lo la. Vin pli for ki sa bann dimoun i kapab konpran. Pa akoz ou, ou asize deor, ou preznan ou dimoun pe soufer. Ou bezwen pran responsabilite ou propriyete. Ou pa kapab zis pye dibwa gran apre ou koleg anmas, swa ou *neighbor* anmas tou sa bann lepo kase.

Nou pa kapab *afford* sa bann kalite sityasyon. E osi letan nou'n koz bann antite ki annan ozordi e mon krwar mon tann nom 3 ou 4 antite, ki tousala i dil dan pye dibwa.

E in menm annan propozisyon pou nou kapab anmenn tousala anba en sel

twa. Ki nou konnen - Enn premyerman sa dimoun ki letan li i ganny afekte, i annan en rekour, i annan en landrwa kot i kapab ale pou li kapab ganny serten sipor.

E an menm tan i anmenn mwan lo sa pwen prevansyon. Zis pou fer paret SLTA i dir ou li. Son Polisi i dir ou, letan pye dibwa i tonm lo semen ki li i antre pou koupe. Me *what about* sa laspe prevansyon avan ler sa pye dibwa i tonm lo semen?

I sa bann refleksyon ki nou bezwen kapab komans anmennen. Me par kont letan tou sa bann keksoz i ansanm, tousala i anba menm twa, nou kapab fer sa bann refleksyon. E fer sa bann *assessment* apropriye. E ki nou fer sir nou dil avek *when the times come*.

E ki mon rekonforte letan mon tann entervenan avan mwan in dir ki deza zot pe, Gouvernman zot pe komans mazin dan sa direksyon.

E sa nou bezwen fer li o pli vit posib pou nou kapab egalman *attend lobzektif* ki sa Mosyon i anmenn nou.

E Mr Speaker, vwala mon kontribisyon ki mon, zis en de pwen refleksyon an sipor pou sa Mosyon. Premyerman nou pou bezwen anmenn ledikasyon nou pep.

E anmenn tou keksoz ansanm anba en sel twa, ki nou kapab dil avek tou sa bann pye dibwa ki enn fwa pou tou. E nou kapab bouz pli devan letan bann moman i arive. Mersi Mr Speaker.

MR DEPUTY SPEAKER

Mersi Onorab. I reste nou 5 minit avan ki nou pou pran *tea break* 3er edmi. I annan 7 Manm ankor ki'n edike zot le koze. 6 LDS avek en US.

Eski i annan enn parmi ki krwar son prezantasyon pou 5 minit i ava anmenn nou ziske? Onorab Gill. *Very well.* Mersi pou ou volonter. *Go ahead.*

HON CHURCHILL GILL

Thank you, Mr Speaker. Mersi Mr Speaker. Mr Speaker, rezon ki mon pa pou long se akoz i en size ki komen. Nou tou nou konnen. E menm dimoun ki pe ekout nou i konnen ki nou pe dir. E a en serten pwen, nou pe tant pe repet kanmarad. Alors mwan mon pou tre bref lo pou mwan.

Baze lo mon obzervasyon ki mon santi petet en direksyon ki nou devret pran, mon santi poudir tou regilasyon ki an plas swa i pa ase morde, oubyen bann dimoun ki sipoze *enforce* sa bann regilasyon, zot pa pe fer

li dan en fason ki i devret ganny fer.

Alors sa i en *area* ki petet nou devret revwar avek Lotorite konsernen. Apre petet pou bann dimoun ki annan pye dibwa swa prive, swa Gouvernman, mon santi ki sa osi i devret *compulsory* ki a okenn moman ki okenn pye dibwa pa devret pe koz en danze pou okenn lenfrastriktir.

Akoz parey nou konnen tou lenfrastriktir i koute, pou kapab met debout. E nou pa kapab pe toler sityasyon kot en dimoun pa pran son responsabilite.

Apre demen nou vwar kot sa pye dibwa i kraz sa lenfrastriktir. E apre sa prosedir pou kapab, pou ou fer, pou ou kapab remet sa lenfrastriktir debout, i sitan long.

Konpare avek en pye dibwa ki petet si Lalwa ti morde, oubyen bann Lazans ti morde, ti'n kapab evite. E vi ki nou tou nou'n tonm dakor ki tou distrik i fer fas ek menm keksoz, petet i devret apre ki sa Mosyon in fini pase, Minister konsernen i devret petet fer en evalyasyon dan tou distrik.

Vwar ki kantite danze ki nou pe koz lo la ozordi ki en *threat* pou nou distrik, si sa sityasyon pa ganny adrese. E

an menm tan pou bann konpannyen lasirans mon ti annan sa pou dir, petet en keksoz pou refleksyon.

Dan, ler zot santi zot kapab zot fer bokou donasyon. Petet en *area* ki zot devret gete se ler zot fer bann donasyon petet osi koz ek bann distrik e donn en pe donasyon dan sa direksyon.

Akoz sa i pou en legzersis oubyen en depans, ki i kontribye pou zot anmas bokou plis. Akoz sa dan li menm i vin koman en *mitigation measures*. Ler ou, ou pe donn sa larzan, endirekteman ou pe fer sa. E an menm tan i pou redwir *claim* si sa bann pye dibwa i ganny koupe. I pou tre rar kot ou pou ganny *claim* sorti dan distrik kot lakaz in kraze -Bann lakaz ki anba lasirans. Ki apre ou koman sa konpannyen lasirans, ou pou bezwen al pey bokou plis larzan pou sa *claim* ki sa dimoun pou fer.

Tousala i bann fason ki endirekteman nou kapab pe adres en problem, san ki nou realize an menm tan i pe amelyor zot *bottom line* akoz *claim* pou desann.

At least dan sa *area claim* ki konsern pye dibwa kraz lenfrastriktir. E sa dan li menm i pou otomatikman aranz zot *bottom line*. Mersi Mr Speaker.

MR DEPUTY SPEAKER

Mersi Onorab Gill. *True to your words, zis 3er edmi. That's the spirit.* Ler nou retournen koumsa fodre nou fer nou tou.

Alor nou ava break ziske 4er.

(BREAK)

MR DEPUTY SPEAKER

Welcome back tou dimoun. E parey mon ti'n dir avan nou al break. Ki i reste aprezan 6 entervenan prenon kont ki nou pou travay ziska 5er. Plus, Right of Reply.

Bokou in ganny dir son mon ti ava demann bann entervenan pou fer zot largiman *pointu and* reste lo pwen ki Mosyon pe demande.

Premye entervenan Onorab Francois Adelaide.

HON FRANCOIS ADELAIDE

Mersi Mr Speaker. Mon ava pran ou rekomandasyon. Akoz mon konnen poudir letan pa tro dan nou faver. Mr Speaker, sa Mosyon ki Onorab Lemiel in anmennen. en Mosyon ki annan son merit.

Be solman ki mannyer mon pe tann bann parol pe ale, mwan mon krwar poudir i annan enn de bann pti keksoz ki nou bezwen konpran.

Mon osi mon annan en distrik Baie Lazare, e nou gannyen problem parey i pe dir. Bann pye dibwa ki lo bann later. Be solman sa bann pye dibwa i for lo bann later prive ki nou ganny problem avek. Pa bann ki lo later Gouvernman.

Akoz mon pou dir sa. Bann pye dibwa ki lo later Gouvernman i deza annan en prosedir an plas. Enn, de fwa mwan mon'n fer. Mon DA in fer. Mon clerk in fer. E keksoz in rezourd. Savedir i annan striktir an plas. Me nou, nou bezwen konnen ki mannyer nou akse sa bann striktir.

Par egzanp Mr Speaker, ler ou pou *call* en Lazans, petet ki annan en problem pye dibwa, ou sa MNA, ou sa DA ou devret konnen lekel ki ou, ou pou *call*.

Akoz sa keksoz i koumsa? Se pa nou ki'n fer. Se Gouvernman avan ki'n met kontour dan semen drwat. E preznan ki i fer? I annan tro bokou Lazans pou ou *call*, pou ou kapab ganny en larepons. E se sa ki fer i vin problem.

Me solman sa ki mon kapab dir ou dan Gouvernman i annan sa striktir. E en lot pti keksoz ki mon'n remarke petet i kapab annan en problem. E nou sa Gouvernman ki'n vini la,

nou pe dir. Nou pe travay lo *results-based management*.

I annan keksoz ki tarde. Pa akoz napa striktir, me akoz senpleman se bann dimoun dan bann departman ki trenn en pe lipye. E prezant ki nou bezwen fer nou koman Gouvernman? Mwan mon konsey se ki nou re striktir tou sa bann keksoz. Nou fer li vin anba en sel parasol.

Prezan, fodre ki ler nou pe met lord dan sa dezord, fodre nou pa tann bann Manm laba lot kote latab pou dir nou pe fer viktimizasyon.

Akoz i pa kapab tou dimoun pe mars lo lipye kanmarad. E se sa ki'n arive dan lepase. In met tro bokou dimoun pou fer menm louvraz. Zis pou zot ganny vot. E la nou, nou bezwen sanze, nou bezwen arete sa. Nou bezwen fer keksoz drwat. Ki Seselwa i ava konnen kote i pou ale ler i annan en problem.

Mr Speaker, prosedir i senp. Si ou en dimoun dan ou distrik ou annan en problem, ou konnen poudir sa pye dibwa i lo later Gouvernman. Ou apres ou DA.

E ler ou apres ou DA e ler ou apres ou DA – ou DA i konnen egzakteman kote i pou call pou bann dimoun vin donn ou lasistans. E sa i annan. Mr

Speaker, mwan mon gro problem Baie Lazare parey mon'n dir lo later prive. Ki nou'n fer dan lepase?

Se bann etranze ki annan bokou larzan. Anba 5(1) nou'n donn zot nasyonalite. E prezant zot annan bann gran, gran propriete, e tanzantan dimoun pe dir mon be koup pye dibwa.

Mon pe dir ou sa propriete Anse La Mouche. Petet nou kapab konnen bann dimoun Baie Lazare ki reste laba. Bann ki'n ganny afekte. Zot konnen ki mon pe koz lo la. Me Gouvernman ki in fer dan lepase. Donn sa dimoun sitwayennte anba 5 (1). E prezant li sa boug i pa ni enterese pou li. I annan tro bokou larzan in aste propriete. So petet nou ti ava anmas en pe tax avek li. Lo *Immovable Property Tax*. Be nou pa pe kapab. So nou war nou dan bann sityasyon ki en pe en problem.

So Mr Speaker, sa i enportan pou nou dir dimoun. Pa konfiz dimoun. Pa fer krwar i napa, me sa prosedir i la. Mr Speaker, apre i annan bann pye dibwa ki parey Onorab Cosgrow ti dir. Ki ganny regilye anba bann Lalwa. Parey bann Pye Friyapen, bann lezot pye dibwa.

E sa osi par ler i kre en pe problem, akoz ou ganny en pe

problennm avek petet bann departman ler zot pou vini pou zot dil avek sa bann sityasyon.

Be solman i pa anpese si ou konn prosedir pou ou kapab dil avek sa, mon krwar nou pou kapab petet ed en pe bann dimoun dan kominate avek sa bann problennm.

Mr Speaker, problennm se parey mon pe dir, mon pa pou tarde. Problenm i senp. Gouvernman ki i merit fer la li, re organiz son bann striktir.

Byensir petet i kapab annan dimoun ki ava ganny *relocate* ouswa i ava bezwen ganny mete dan en lot travay. Sel keksoz mon demann Lopozisyon se pa dir nou pe viktimiz dimoun. Me nou bezwen parey mon pe dir re aranz keksoz pou keksoz kapab mars byen.

Mr Speaker sa i mon lenthervansyon. E mon pou siporte ou Mosyon Onorab Lemiel akoz i fer sans. Be solman nou bezwen remet keksoz dan don konteks. Mersi Mr Speaker.

MR DEPUTY SPEAKER

Mersi Onorab, sirtou pou ekonomiz letan. Mon pou kriy prosen entervenan Onorab William.

HON WAVEN WILLIAM

Mersi Mr Speaker. Mr Speaker mon pa pou tro long lo sa Mosyon. Me ki mon kapab dir se ki i annan en merit.

Me selman letan mon'n ekout loter Mosyon avek lafason ki son Mosyon in ganny fraze, mon krwar ki propriyeter prive pa'n antre dan son Mosyon. Me solman in koz lo la.

Me si nou pe anvoy en Mosyon serye kot Gouvernman, i bon ki nou met li kler ki petet mon pa konnen si i ava deside pou amande, ki nou ava anvoy en keksoz vreman kler.

E mwan ki mon ti ava kontan avans devan se ki koman Chairman IAC, semenn pase Mr Speaker, nou'n ganny sans zwenn avek lekip *DRDM*. Ki ti pe fer en travay, en *mid-term review* lo the *Sendai Framework, Disaster, Risk and Management*.

E Mr Speaker, nou ti ganny apepre 28 kestyon ti ganny mete devan nou. E mon santi poudir sa travay ki *DRDM* pe fer an relasyon avek sa size sa Mosyon avek lezot, mon krwar poudir i ava donn Gouvernman en sans pou analiz sa rapor. E bann propozisyon ki nou'n met devan.

Akoz letan nou'n ganny demande sa bann kestyon, mazorite sa bann kestyon nou'n

dir non, nou pa satisfe avek lafason ki keksoz pe ganny zere.

E parey lezot Manm in dir, i pa vedir napa striktir. Me i annan pti pe dezord ki i bezwen met lord.

E mon santi poudir sa travay ki pe ganny fer ozordi par Gouvernman, e sa travay la an traver *DRDM* mon krwar pou met en lord. E mon krwar poudir keksoz pou kapab ganny pli byen fer dan lavenir.

Avek sa de pti mo Mr Speaker mon pou donn mon sipor. Akoz mon santi poudir i annan merit. Akoz letan mon sorti Grand Anse Mahe pou desann anvil. Mr Speaker, bann pye dibwa danzere i osi lo later Gouvernman e en gran mazorite osi i lo later prive.

So, mon ti ava demann Onorab si i kapab enkli propriete prive. Akoz parey tou bann Manm pe dir i annan sa nesesite, ou'n koz lo la. Me Mosyon an ekrir pa reflekte sa. Me parey mon'n dir mon pou donn sipor akoz i annan merit. Mersi.

MR DEPUTY SPEAKER

Mersi Onorab. Prosen entervenan Onorab sorti dan en distrik kot ros ennler i grennen, Gro, gro pye dibwa i tonbe. Manm Elekte Distrik Bel Air. Onorab Loizeau.

HON NORBERT LOIZEAU

Mersi Mr Speaker. Mr Speaker, mon'n deside koz lo sa Mosyon akoz vreman Bel Air nou annan gran, gran pye dibwa. Nou annan lafore, parey Onorab Ernesta in dir. Me selman nou konnen kot pou pase pou dil avek sa bann keksoz.

Sa en keksoz ki nou fer byen. E Mr Speaker ler mon ekout Mosyon Onorab Lemiel, mon napa naryen kont son Mosyon. Me selman lafason ki zot pe prezant sa Mosyon. Sa Mosyon sa problemm letan mon pe gete i en vye problemm. I en problemm ki date en ta lannen pase. Si zot pou agree ek mwan.

En ta lannen pase. Me selman mannyer problemm pe ganny mete. Konmsi problemm fek arive la. Wi mon ava eksplik zot akoz Mr Speaker. Sa bann pye dibwa enn pa'n fek pouse 2an pase. E i pa'n fek pouse 2an pase i annan en ta lannen sa bann pye dibwa i la Mr Speaker.

Me Selman nou vini nou tann dir *ar* nou bezwen pas en masaz for ek Gouvernman. Nou bezwen fer evalyasyon. Be zot, zot pa ti fer evalyasyon? Nou fek vin la nou. Onorab Cosgrow ti Minis Lanvironnman Mr Speaker.

Ki evalyasyon zot in fer kot lanvironnman? Sa bann letan

ki zot in la ki sa problem in egziste Mr Speaker.

E la i vin en fardo lo nou Gouvernman ler nou'n vini Mr Speaker. Me pourtan i annan bann striktir an plas. I annan bann landrwa ki ou kapab al tape. E la mon ava dir zot. *Local Government* si mon byen i annan li R milyon. E ladan si mon byen i annan environ R500mil pou koup pye dibwa.

Me si i annan en problem, zot koman *MNA* - zot in *DA* zot. I annan 4 *DA* la anndan ki'n deza *DA*. Loter Mosyon ti *DA*. Nou pran sa problem nou anmenn kot Administrasyon Distrik. E *DA* i fer bann formalite. E bann keksoz i ganny arive.

E nou Bel Air se sa ki nou fer. E la Mr Speaker, si zot pou mont Bel Air o bor *bus stop* o bor Ladministrasyon Distrik, i annan en propriete prive.

Ki tou son bann brans dibwa ti pe de-koul lo Ladministrasyon Distrik. Yer zis mon'n war en kontrakter. Mon'n adres sa ek *DA*. Be yer mon'n war en kontrakter in vini in koupe netwaye, prop. Me selman Mr Speaker, i annan bann pli gro pye dibwa lo sa propriete ki li bann pye mang sirtou.

Ki li son problem li se ki i kraz *windscreen* dimoun.

Dernyen fwa mon ti monte, Barbara Pouponneau monte en gro mang Dofinen ti tonbe ti kraz son *windscreen* - sa fiy ki travay SBC.

Sa propriyeter i pa isi li. Me selman dapre ki nou'n konsilte avek Onorab Georges dan *Civil Code* i annan Lalwa pou sa. Si mon byen Onorab Georges i ava koriz mwan. I annan Lalwa pou dil ek sa. *SLTA*, *SLTA* i annan li R1.5milyon. Zot konnen. Ou dir manrman! Mon ava dir ou akoz zot konnen.

Akoz zot pa kontan sa apre. Nou Bel Air Mr Speaker koman en pye dibwa i tonbe Sans Souci *SLTA* i vin koupe, nou konnen kot nou pou ale. Zot, zot pa konnen pou ale. Nou, nou konnen kot pou ale. *SLTA* i vini i koupe.

L'environnement menm i annan li 1 milyon si mon byen. 1milyon. Tousala se bann landrwa ki nou bezwen ale. E nou koman *MNA* ler i annan sa problem nou vini nou vin kot nou *DA*. Pou bann ki ti *DA* zot konnen byen zot. Nou vin kot nou *DA* nou met sa problem. E *DA* i fer le neseser Mr Speaker.

I senp. I pli senp ki sa. E mwan mon konpran akoz serten i annan en pti pe ankoler akoz sa. Mr Speaker ti annan en R10 mil, ti annan en R100 mil

dapre ki mon konpran ti donnен kot DA bann letan avan.

DA ek MNA ti zwe ladan. Wi ti annan. Ti annan en R100mil Mr Speaker.

Ozordi ki'n arive ki zot pe ankoler? Ti annan en dezord. Ti annan en dezord preznan Gouvernman aktyel in trouv sa dezord. Prezan ki nou'n fer? Nou'n tire sa. Nou'n war sa labi kot ti pe arive. kot dan sa R100mil mon pou al koup dibwa kot mon dalon Onorab Bastienne. Li i ek nou li.

Aprezan Madanm Seraphine sepa ki kote li, li son pye dibwa i tonm lo son lakaz li. Pourtan Onorab Bastienne ki mon dalon li i kapab koup son pye dibwa li menm li. Selman dan sa R100mil nou ti pe zwe avek.

Aprezan petet Mr Speaker, zot pa pe ganny sans antre ladan. Sa R100mil. Aprezan i annan sa lakoler.

Mr Speaker, Gouvernman lontan ti annan bann kalite pratik ki pa ti gou. Ki pa ti zoli. Kot ti annan en ta lese fer. Kot nou, kot koman en Gouvernman avan. Nou ti soutir dimoun lese fer. Ozordi mwan mon pou plant mon pye mang. Mon'n byen manz mang, mon'n vann mang.

Laz 30an mon'n plant sa pye mang mwan Mr Speaker. Ler mon ganny 70an sa pye mang i annan apepre 40an li, mwan mon trwazyenm-az mwan.

Mon ti zenn ler mon ti pou, soz sa pye mang. Mon pa ti war pye mang pou gran ni tay li nou. Prezan nou vini pou fer koupe. Responsabilite, responsabilite. Zot pa'n donn sa sans responsabilite parmi nou bann dimoun kot nou bezwen konnen sa pye mang pou gran.

Koup son brans i pou tonm lo nou lakaz. Me nou, nou pa ti fer sa nou. Zis dimoun ti vini e nou, nou ti ale nou ti koupe. Olye dir ek dimoun, nou pou koupe ozordi, be pa plant sa pye zanmalak. Sa pti pye zanmalak ki nou war pe pouse la, la, la, fodre nou tir li la lo lateras akoz ler i pou gran ou pou dir mwan vin koupe.

Mr Speaker nou, nou pa'n fer sa. Zot pa'n fer sa zot. E nou Gouvernman, se sa ki nou pe dir ek nou bann dimoun nou. Pran ou responsabilite.

Ler ou plant en pye dibwa konnen kot ou plante, sansan i pou kraz ou lakaz ou pou vin kot Gouvernman.

Mr Speaker, konmela tou keksoz. Tou keksoz Gouvernman. Nou'n annan en latitud dan sa pei tou keksoz

fodre Gouvernman i fer. Ou manman i sonny ou. ler i ariv 60an ou met li deor ou dir li al reste dan *Home*. Gouvernman sonny ou manman aprezan. Selman ou manman in sonny ou li.

Pandan tou sa lannen in sonny ou in donn ou lafors, kouraz. Ler i ganny 60an i lo lalis pe esper en *Home*. Ti tann dir sa. Pa nou'n tann dir?

Tousala se bann keksoz ki nou bezwen sanze dan nou pei. Nou bezwen fer nou dimoun vin pli responsab. Annan sa responsabilite. Ki nou fer. Dernyen fwa dan Mosyon ankor nou ti koze. Nou'n dir dimoun nou pou soutir zot, soutenir zot *from cradle to the grave*.

En boug i fer piti Gouvernman ki bezwen sonnyen. Fer zanfan. Nou bezwen fer fwaye. Be mwan mon piti pa dan fwaye mwan. Soutir zot, donn zot *methadone* pou naryen. Fer piti, met dan fwaye. Gouvernman pou anmase. I bezwen annan en sans responsabilite dan sa pei.

Selman mon pa dir Mosyon Onorab Lemiel i mal. I annan en pe retar. Akoz Sesel i pou tou son zanfan. I annan serten move zanfan ki pe mal travay pe met en pe retar. Zis akoz Sesel i pou tou son zanfan

Mr Speaker, I annan en pe retar ki pe ganny mete par serten dimoun.

Mr Speaker mon krwar mon pou termin la. Mersi.

MR DEPUTY SPEAKER

Mersi Onorab. Prosen entervenan Onorab Woodcock. Nou pe fer tre byen lo letan.

HON WAVEL WOODCOCK

Mersi Mr Speaker. Mr Speaker Mosyon ki mon kapab dir i vreman enteresan, me selman mon krwar i enportan pou nou sitye vreman sityasyon lo sa bann problemkoupye dibwa ki non selman i en problemkoupye dibwa lo later Gouvernman me osi i lo later prive.

Entervenan pe met plis lanfaz lo bann pye dibwa ki lo bann later Gouvernman ki koz en menas pou komite prive me osi e lavi osi.

Me Mr Speaker mon bezwen fer resorti ki lot kote latab i annan en serten lenpresyon ki zot pe donne. Si ou pe ekout byen zot lenvansyon, lenpresyon ki zot pe donne se ki i napa bann prosedir an plas, bann bon prosedir an plas.

Me parey mon'n dir i enportan ki nou met keksoz an konteks, akoz deza annefe Mr Speaker i annan bann prosedir

an plas, kot i konsern bann pye dibwa ki trouve lo propriete Gouvernman. Onorab *ex-Minister* Cosgrow i bezwen konn sa koman *ex-Minister* pou lanvironnman dan lepase.

E nou annan 4 DA, well *ex-DA* lo kote latab ki ozordi zot MNA zot konn tre byen sa bann prosedir ki ti la pou plizyer lannen, e sa bann prosedir la zot ankor egzistan la e ki nou Gouvernman ozordi pe reviz sa bann prosedir.

Mr Speaker zot konn tre byen, mon pa pou mansyonn *ok si* zot oule akoz Onorab Lemiel in en DA, Onorab Vidot, Onorab Aglae, e osi Onorab Ernesta zot in bann DA, zot konnen sa bann prosedir ki ti annan avan e zot konn tre byen ki mannyer sa bann keksoz ti deroule dan lepase.

Mon ava eksplik ou ki mannyer sa bann keksoz ti deroule dan lepase, mon ava eksplike kot i konsern later Gouvernman tou le lannen i annan en Bidze ki ganny *allocate* pou detrwa bann Departman Gouvernman - annefe i annan *Department of Environment* ki ganny en alokasyon of R1milyon anba Departman Forestry pou koup bann pye dibwa lo later Gouvernman.

SLTA osi i ganny alokasyon 1.5milyon sa i pou bann pye dibwa obor semen ki poz en danze pou motoris ouswa bann pyeton. Mr Speaker mon bezwen dir annou pa fer krwar poudir nou pa konnen poudir i annan bann prosedir an plas.

Prosedir senp mwan menm mon mon'n fer mon devwar mon'n *call* dan mon distrik sa madanm ki responsab pou Departman Lanvironnman, *Forestry* osi i tonm anba li e Mahe osi i swiv menm prensip.

Okenn dimoun ki annan en konplent, okenn dimoun ki son propriete i ganny *threatened* par en pye dibwa ki lo later Gouvernman, zot kapab prosedir se ou al fer en konplent kot Ladministrasyon Distrik, ou kapab fer konplent verbal ouswa ou kapab al fer en konplent an ekrir.

E se DA ki enform Lanvironnman e Lanvironnman, ouswa Departman Forestry zot anvoy en dimoun en Zofisyen ale o fer en vizit lo sa sit pou gete vreman si sa pye dibwa poz en danze.

E prosedir ki'n toulstan leka me selman menm si i in ganny swiv se ki apre ki en *assessment* in ganny fer, e zot

in vwar poudir vreman sa pye dibwa i poz en danze, Lalwa Prokirman i ganny swiv kot zot rod met lo *tender* i annan 3 kontrakter i met kotasyon zot, zot *bid* pou zot koup sa pye dibwa. E normalman i pa sot plis ki R50mil e en kontrakter i ganny swazir pou koup sa pye dibwa.

E i menm al pli lwen Mr Speaker ki si mwan mon annan en propriete e obor mwan i annan en later ki pou Gouvernman en pye dibwa lo la, mwan koman en endividé mon kapab demann Lanvironnman permisyon pou mon koup sa pye dibwa si mon annan le mwayen pou fer.

So de fason, mwan menm mon kapab koup sa pye dibwa avek permisyon Lanvironnman, ouswa or fer en konplent avek DA ouswa menm ou kapab fer konplent Praslin ou kapab fer konplent direk avek sa dimoun ki responsab pou Lanvironnman, zot a vini zot a gete zot a fer *assessment*, i annan alokasyon bidzeter pou koupe.

I enportan Mr Speaker pou mon osi fer sorti poudir i annan en alokasyon anba Gouvernman Lokal, pou bann propriete prive e sa i santralize ozordi. I nepli parey avan kot ti annan en alokasyon bidzeter ki

ti ganny donneen kot Ladministrasyon Distrik en sonm si mon pa tronpe R100mil ki ti ganny donneen avek bann DA pou koup pye dibwa lo later prive.

E pye dibwa lo later prive anba sa alokasyon R3milyon, i selman ganny koupe pou bann rezyon, parey mon'n dir bann rezyon pou bann ka parey bann dimoun pli vilnerab. I annan en sosyoekonomik *analysis* ki ganny fer pou determinen si vre sa dimoun kekfwa i napa mwayen, kekfwa en tantin a laz ki pe ganny pansyon, i napa larzan, fodre koup sa pye dibwa.

La DA pa i annan en *internal - parey mon dir en audit*, en *assessment* ki ganny fer pou determinen vreman sa dimoun i pa pe kapab koup en pye dibwa. Alor la DA ansanm an partenarya avek Minister Lanvironnman dan Departman Lanvironnman - *Forestry* zot organize. E zot koupe akoz *obviously* ou pou bezwen permisyon lanvironnman pou koupe e sa lokasyon R3milyon i la pou DA, Gouvernman Lokal dil avek bann sityasyon parey mon'n dir sosyoekonomik.

Mr Speaker nou bezwen admet poudir dan lepase in annan bokou konfizyon. In annan bokou konfizyon akoz sa

i fason ki zot in fer. Ou konnen sanmenm sa rezon ozordi ki nou Gouvernman pe *repeal* bokou bann Lazans, akoz nou santi i annan tro bokou *duplication*, dan lepase ki nou'n war setaki i fer en bout.

LWMA i annan son bout, *SLTA* i annan son bout, *PUC* i koup pye dibwa ki pa lo laliny, *SPTC* i annan son bout Lanvironnman i annan son bout, prezan i kre en konfizyon ki lepep Seselwa deor pa vreman konnen kote zot pou ale ler zot fer fason avek en problemm parey en pye dibwa ki pe menas zot propriyete, *ok?*

Nou bezwen fer keksoz dan en fason pli kler, pli byen pou nou dil avek sa bann *issues once and for all*, e mon krwar i annan en, si mon pa tronpe - Lanvironnman byento pou komans en lendikasyon pou enform bann dimoun bann ka kot en pye dibwa lo propriyete Gouvernman pe menas zot propriyete, zot kapab al kot *DA*, ouswa kote zot pou ale pou zot dil avek sa bann sityasyon li ki annan tou sa bann *overlapping* setaki pe fer en pti bout nou fer li dan en fason byen annord.

Mr Speaker ankor enn fwa bann Manm lot kote latab pa pe admet anba Gouvernman avan ti annan en bann labi ti arive dan lepase, kot i konsern koup

pye dibwa. Sa alokasyon ki ti ganny donnen kot Biro Distrik la ti annan politik ladan, pye dibwa zis bann dalon ek bann zanmi ki ti ganny koupe! Larzan ti ganny donnen – *ok?*

Olye rod 3 kotasyon mon swazir enn mon zwer la vini koupe, apre mon ganny tou kasaz. Ti annan labi, be sa bann keksoz ki nou Gouvernman i dir fodre nou arete, nou tir enn fwa pour tou nou fer keksoz dan en fason pli annord, pli armonize.

Ler mon get sa Mosyon Mr Speaker petet en keksoz ki mon santi Onorab William osi in fer mansyon lo la, se mon pli gro problemm i pa neseserman kot Gouvernman, wi i annan en serten retard kekfwa bann prosedir, me pli gro problemm se lo later prive.

E ozordi en dimoun pa kapab in *cross* lo later en lot dimoun pa koup pye dibwa, akoz ou kapab war ou devan Lakour ou kapab ganny pouse pou koup pye dibwa lo later dimoun. E Lanvironnman li pour le moman ki i fer li, si en dimoun i vin fer konplent kot li, i kapab ekrir sa dimoun pou dir zot be koup sa pye dibwa akoz i en danze.

Me selman i pa kapab obliz sa dimoun, fors sa dimoun. Fodre sa dimoun ou

menm ou si ou santi poudir i annan en propriyete obor ou pou ou vwazen, si ou santi poudir i annan en propriyete obor ou pou ou vwazen ki pe menas ou lakaz, pe menas ou loto, ou transpor *whatever asset* ki ou annan, pran ou responsabilite ou, koz ek sa dimoun, si i pa tande met en *case devan Lakour*.

Ou pa kapab fer Gouvernman vin lager ou lager. Ou bezwen pran ou responsabilite ou koman en imen. Mr Speaker, sanmenm sa mon pe dir ozordi fodre nou fer keksoz dan en fason ki byen. Mon krwar en keksoz osi Mr Speaker i mon bezwen fer resorti ozordi en gro defayans, se ki i annan bokou ban later prive ki son propriyeter pa dan pei.

I menm annan bann ka parey mon dir kot i annan dimoun ki refize koup sa bann pye dibwa, ouswa sa dimoun sa propriyete later i pa isi i deor, ouswa i annan bann later osi ki nou pa konnen pour ki sa ban later.

Oli son propriyeter sa later in la en kantite pye dibwa lo la ki poz en danze, e mwan mon krwar *going forward* petet ou pou bezwen reget bann Lezislasyon pou nou kapab dil avek bann ka kot parey bann

propriyete, nou pa konnen lekel propriyeter ouswa propriyeter pa dan pei i napa en *next of kin*, ouswa en fanmir dan pei.

E alor sa i en keksoz ki petet kekfwa Gouvernman pou bezwen konsidere dan le fitir pou sa bann ka spesifik Mr Speaker. E parey mon'n dir Mr Speaker i enportan ki nou Seselwa nou pran nou responsabilite. Mon a servi mwan koman en legzanp, en pe letan pase lo mon propriyete pou mwan Praslin en pye sed ti tonbe, ti tonm lo miray enn mon vwazen.

E ler sa pye sed in tonbe mon'n regarde mon'n vvar poudir i annan lezot pye sed ki pou en menas i kapab menas sa propriyete, e mon lot vwazen lot kote lo mon propriyete. Ki mon'n fer? Mon'n rod en dimoun, mon'n negosye ek sa dimoun pou mon kantmenm pey par *instalment* akoz i pou koup, nou konnen i kout en pti kou pou mon koup sa bann pye dibwa.

Mon'n pran mon responsabilite, i nou propriyete fodre nou prezan nou responsabilite nou. Me nou'n fer provizyon pou bann ka sosyoekonomik, kot bann dimoun petet i napa sa mwayen zot kapab fer en aplikasyon atraver Biro Ladministrasyon

Distrik, Biro Gouvernman Lokal kot bann zofisyen i ava vini ava gete ava analize si zot bezwen lasistans zot ava gannyen.

Me apard sa nou tou nou bezwen zwe nou rol pran nou responsabilite e sa i la fason ki nou merit viv koman Seselwa. Si nou santi i nou lobligasyon si nou santi poudir nou an en keksoz ki pou poz en, en pye dibwa ki pou poz en danze lo vwazen i enportan pou nou pran konsiderasyon nou bann vwazen osi ki reste obor nou.

Avek sa 2 mo, Mr Speaker i annan serten merit sa Mosyon parey mon'n dir i annan serten konsern.

Me an mezir nou ale sa bann keksoz pou ganny rezourd pou nepli annan tou sa bann *duplication*. Keksoz pou ganny fer dan en fason pli senp, *one-stop shop* kot ou ale ou ganny ou servis pou ganny, kot ou ale sa bann zafer koup pye dibwa lo later Gouvernman i ganny dil avek. Avek sa 2 mo, mon dir ou mersi Mr Speaker.

MR DEPUTY SPEAKER

Mersi Onorab Woodcock. Lo lalis ki nou ti annan i annan en Manm in dir retir son non, savedir dernyen entervenan mon pou annan lo sa size se Onorab Georges. Avan i pran

mon asire napa personn ki mon'n manke. Wi napa personn. Onorab Georges.

HON BERNARD GEORGES

Mersi bokou Mr Speaker. Bonn apre midi tou bann Manm. Mr Speaker sa detrwa dernyen entervenan in plizoumwen fer le pwen lo landrwa kot mon ti anvi sitye mon lentervansyon apre midi.

E mon krwar ki malgre nou konpran konsern Onorab ki'n anmenn sa Mosyon apre midi, e i en konsern ki dan bokou distrik akoz pou tou bann rezon ki'n ganny dir apre midi pye dibwa lo later Gouvernman ek lo later prive i kapab en menas, e in en menas dan lepase.

Mon ava donn 2 legzanp ki mwan mon konnen personnelman. I annan en msye ki reste dan distrik Onorab Wavel Woodcock Grand Anse Praslin ki annan en *car hire*. Plizyer lannen pase enn son loto ti pe mont semen Vallée De Mai, sorti Grand Anse pe al Baie Ste Anne e en pye dibwa sorti lo later Gouvernman in tonm lo son loto in kraz son loto.

1, 2 an pli tar menm dimoun, menm *car hire* menm semen loto pe fer direksyon Baie Ste Anne lo menm *stretch*

semen en pye dibwa sorti la later en lot dimoun prive lo lot kote semen i tonm lo son loto i kraz son loto ankor.

Vwala 2 legzanp ki nou pa pe *make up* se keksoz ki'n arive dan la realite. Alor wi i annan pye dibwa ki menas propriyete prive e ki andomaz propriyete prive.

Dezyenm legzanp ki mon ti anvi donnen apre midi se en gro pye lawet ki ti pe menas en lakaz dan mon distrik i en bon pe letan pase, e sa set en *warning* annan de fwa pou pa tro enterfer avek keksoz ki pa en menas reel.

Sa pye dibwa ti pe menas sa lakaz, me i ti annan drwa pa tonbe, sa propriyeter lakaz ti en pe per ki sa pye dibwa ti pou tonm lo sa lakaz en zour, alor in fer laranzman avek DA pou koup (avek Ladministrasyon Distrik eskiz mwan) pou koup pye dibwa. Ler zot pe koup pye dibwa, pye dibwa in tonbe in koup son lakaz an 2. Donk sa menas ki ti la in vin en realite par lentervansyon imen.

E mon dir sa Mr Speaker akoz Lalwa ki nou annan dan nou Kod Sivil, in ganny site en pe pli boner par Onorab Aglae i kouver sa bann lenstans e dan tou le trwa sa bann keksoz ki'n arive, sa bann dimoun ki'n soufer in ganny rekour anba

Lalwa, donk Lalwa i egziste. Me i annan plis ki Lalwa ki egziste. Nou menm nou dan sa Lasanble, non, eskiz mwan pa dan sa Lasanble dan Lasanble presedan.

Ler nou ti pas Kod Sivil nou i pas en Lalwa spesifik ki apel troup dan vwazinaz. Kot nou ti fer sa ekspreseman pou sa bann troup vwazinaz parey nou fek koz lo la ozordi. Ki permet en rezulta rapid atraver Lakour. Donk nou'n konsyan sa e nou'n fer li.

Alor Mr Speaker san al dan gran detay lo *jurisprudence* eksetera, mon kapab reasir sa Lasanble apre midi ki i annan enn kad legal, ki permet tou dimoun ki santi ki annan en pye dibwa ki swa andomaz li oubyen akoz pe menase pou andomaz li, pou annan en rekour legal. E pou bann propriyeter prive e Gouvernman, Kod Sivil i kouver tou lede.

E pou bann propriyeter prive ki pa kapab ganny idantifye, Onorab Cosgrow in fer nou rapel ki i annan *Curatelle Act* e ki ou kapab demann *Curator of Vacant Estates* pou defann lentere sa dimoun ki ou pe demann li koup sa pye dibwa, ler ou pa kapab trouv li. Donk rekour i annan, alor annou pa re envant

larou, solisyon i la. Epi nou vin alor donk lo prosedir ki nou devret swiv dan bann ka kot nou annan sa bann problemm. Sa ankor Mr Speaker apre midi prosedir in ganny detaye byen kler, ‘responsabilite’ sa mo ki en mo kle dan sa Gouvernman dan sa ladministrasyon ki la pou 2an, responsabilite, se la kot nou devret komanse.

Mon pa kapab asiz kot mwan e mazin tou bann pye dibwa ki kapab menas en zabitan dan mon distrik, e krwaz mon lebra e ekspekte ki Gouvernman pou antre dan mon lespri apre al lo teren e fer sa travay ki mon pe mazinen ler mon pe ariv kot mwan. Pa koumsa ki keksoz i marse.

Ler i annan en problemm dan distrik i responsabilite en dimoun pou idantifye sa problemm. E nou tou nou fer li, nou idantifye parey Onorab Vidot apre midi in donn nou en lalis bann pye dibwa ki dan son distrik selon li i en menas. Nou konnen me nou bezwen fer keksoz Mr Speaker. Se la mon krwar kot i annan en diverzans ant la fason ki zot, zot vwar keksoz e lafason ki nou, nou vwar keksoz.

Pandan lontan dan bann ladministrasyon presedan, tou sa bann keksoz ti problemm Gouvernman; Gouvernman ki ti

bezwen fer sa, Gouvernman ti bezwen fer isi, Gouvernman ti bezwen fer. E se Gouvernman ki'n donn zot sa lespri. Sa Gouvernman in vini in dir zot pa bezwen fatig zot pou naryen depi zour zot me, ziska zour zot mor Gouvernman pou *take care* avek zot.

Ler zot ne nou pou met R1000 lo zot kont e ler zot mor nou pou donn zot en serkey, ler zot vye nou pou donn zot en *carer*, ler zot ariv laz sekirite nou pou donn zot en pansyon, ler zot malad nou pou donn zot Dokter. *Obviously* zot dan sa *mindset*, e mon pa pe kritik sa *mindset*, mon pe zis dir ki i pa byen. E la nou bezwen antre dan en *mindset* responsabilite.

Pou tou bann rezon ki nou'n deza evoke dan lepase mank mwayen, servi sa ki nou annan dan meyer fason, fer en dimoun pran langazman pou zot prop desten, pa fye lo personn, tousala se bann filozofi sa nouveau ladministrasyon e koup pye dibwa i enn sa bann filozofi.

I annan Mr Speaker parey in ganny dir, plizyer Lazans Gouvernman ki antreprann sa keksoz me fodre en dimoun i fer sa letensel pou fer sa pye dibwa ganny koupe. Akoz san sa nou pa pou zanmen kapab bouz devan parey en Nasyon. Alor

responsabilite i retourn lo sa endividé.

Mon pe reste dan en lakaz Gouvernman lo dezyenm letaz an blok, e i annan en brans bodanmyen ki pe sekwe obor mon lafnet e ki pe anmenn senir plim anndan ki mon fer? Mon al kot mon *DA* mon dir li *DA* silvouple okip sa, se koumsa keksoz i marse. Oubyen mon pe reste dan mon lakaz endividylel e i annan en pye lawet ki pe menas mon lakaz ki mon fer? Mon al kot mon *DA* mon dir.

E *DA* se son responsabilite pou fer en *assessment* e pou rod sa Lazans ki pou vin antreprann sa travay atraver, Bidze ki Gouvernman i met a zot dispozisyon ek ki nou, nou vot lo la isi dan sa Lasanble. Donk striktir i senp, i la i egziste. Sel keksoz ki fodre nou fer se alim sa zalimet pou kree sa letensel ki pou komans sa prosesis.

I byen ki nou pe koz lo la ozordi, e i byen ki sa Mosyon in vin devan nou, akoz i permet nou Mr Speaker fer zoli deba apre midi lo distensyon ant la fason ki nou vwar keksoz, e pour permet nou lo sa kote latab annan en platform pou met filozofi politik nou Gouvernman devan.

E pou ankor enn fwa ankouraz tou dimoun dan tou

distrik, pou pran zot responsabilite personnel, e pou ankouraz nou lekor koman MNA ki responsab dan distrik. Akoz en parti sa i nou responsabilite ler nou, nou vwar pye dibwa ki annan en problemm avek, se nou responsabilite pou anmenn sa devan. Me pou osi asire ki nou bann *district administrators* ki nou travay tre pres avek zot osi zot angaze pou zot fer bouze bann problemm endividé ki vin devan zot.

Alor Mr Speaker pou rezimen sa dimoun ki krwar ki i annan en pye dibwa lo later Gouvernman ki pe menas son propriete, tel parey Mosyon i dir i bezwen pran son responsabilite. I bezwen li idantifye son problemm e i bezwen anmenn son problemm la kot i devret e sa se dan son Ladministrasyon Distrik.

Dezyenmman se responsabilite Administrater Distrik pou pran sa problemm sa dimoun pou fer en *assessment*, e si i vwar ki i neseser pou anmenn sa kot en Lazans Gouvernman pou sa Lazans Gouvernman azir.

E trwazyenmman se sa Lazans Gouvernman atraver en striktir legal ki mon fek mansyonnen, pou li aport en soutyen a sa endividé ki annan

sa problem. Mr Speaker tou bann keksoz ki neseser i la. Striktir legal i la, prosesis administrative i la, sel keksoz ki nou bezwen se responsabilite endividyle.

E set avek sa pledwari, avek sakenn nou sitwayen ki mon termin mon lantervansyon apre midi. Mon remersye ou Mr Speaker.

MR DEPUTY SPEAKER

Mersi Onorab Georges, e in ariv le moman alors pou mon donn *droit de réponse* loter Mosyon. Onorab Lemiel.

HON SYLVANNE LEMIEL

Mersi Mr Speaker. Mr Speaker mon oule remersye tou Manm ki'n anmenn en kontribisyon anver sa Mosyon. Zot tou zot in anmenn bann kontribisyon ki mwan mon konsider li tre valab, e ki mon swete ki Gouvernman i a pran an kont. Lefe ki Lasanble in donn sipor sa Mosyon, menm si nou konnen ki Mosyon pa *binding* lo Gouvernman.

Mr Speaker mon ti a kontan fer resorti ki wi, i annan bokou ki'n ganny dir par egzanp lo kote Lopozisyon, sirtou bann dernyen, dernyen entervenan ki'n koze. Wi striktir prosedir i annan an plas, e sa striktir re prosedir i pa fek ganny mete sa

in ganny mete depi ler nou Gouvernman ti la, me eski i pe marse ozordi sa striktir?

Sa ki nou problem la? I annan nesesite pou *streamline* sa bann prosedir e fer li vin efektiv, akoz si nou'n mon pa ti pou anmenn sa ozordi la dan Lasanble. Si mon pe anmenn sa Mosyon dan Lasanble la ozordi i vedir ki nou pe rankontre problem dan sa laliny, e se sa ki mon'n anmenn sa Mosyon pou nou diskite ansanm ozordi - pa pou fer politik parey serten in vin fer ki konmsi i pe envit sa dan nou figir.

I keksoz i ka reel ki menm i annan MNAs lo zot kote latab dan Gouvernman, in fer resorti ki i en problem. Nou'n koze dan koridor partou wi i en problem me annou pa fer konmsi nou pe vini pou nou vin fer politik, ouswa pou bat sa dan nou figir konmsi pou dir si preznan ki nou'n war. Nou tou nou konnen poudir sa problem lontan i egziste.

Minis li menm dan son larepons in dir mwan wi zot pe seye, napa en Minister ki'n di mwan ki responsab koup pye dibwa, me i ankor pe gete ki mannyer i pou fer savedir li osi i vwar poudir i en problem pou li. I pe seye pou met striktir

aranz son striktir aranz sa bann ki la, met li, fer li vin pli for.

E mwan mon'n dir letan mon'n anmenn sa Mosyon, mon panse ki nou pou ganny bokou nide, pou nou kapab prez an met sa bann rekomandasyon devan Minis, bann Lazans konsernen e ki prez an zot a dir poudir be Lasanble pe travay ansanm ek nou, nou ava kapab met en pe rekomandasyon Lasanble, ki nou ava kapab diskite e pran *onboard*.

Me selman Mr Speaker Mosyon nou konnen i annan deba, deba pour, deba kont, deba ki pou al dan diferan direksyon. Mon aksepte tousala, me avan mon fini mon pou dir ki i enportan ki Departman Lanvironnman i entansifye sa langazman.

Akoz Minis ti'n fer nou konpran ki i annan en langazman e diskisyon ki'n komanse avek Biro Attorney Zeneral e ki mon ti a kontan ki sa langazman oubyen diskisyon, ki pe fer avek Biro Attorney Zeneral, i sey ganny ranforsi. Zot donn li en pti pe plis lavi e zot travay lo la en pe pli vit e ki zot kapab *come up* avek en solisyon.

E an menm tan Mr Speaker Minis osi in fer resorti - e menm la zot in fer resorti zot osi, Minis in dir ou poudir son

Minister, son Departman Lanvironnman in donn perm li, e an menm tan i pe koup pye dibwa i dir ou ki i pa leka. Zot in dir poudir i annan prosedir an plas Minis in dir i pa leka i koup pye dibwa li i pa sipoze pe koup pye dibwa.

Me selman i dir i pe fer li, me i kont Lalwa. E se sa ki in dir i pe sey rod en solisyon li osi ki zot, zot pe vini bat dan nou figir ki ozordi i pe dir nou wi i annan sa prosedir nou konnen zot, zot ti deza DA - konmsi en bann keksoz ki pou mwan mon en pti pe dezapwente dan sa bann ki'n sey pran sa laliny.

I osi annan serten rekomandasyon Mr Speaker kot nou pe rekomande ki rol. Annou sey, nou'n koz lo rol Departman Risk e Dezas, petet ti a byen ki zon rol i ganny revwar. Olye ki i vin zis en *advisory body* mon'n tann Onorab William in dir ki in annan serten diskisyon ki mon pa konnen lekel sa group, ki'n ganny fer avek Departman Risk e Dezas kot zot in komans diskit serten keksoz e ki zot in met serten rekomandasyon devan Departman Risk ek Dezas.

Ki nou lo nou kote nou pa okouran sa bann keksoz. Nou, nou ti ganny dir la dan sa Lasanble ki i en *advisory body* petet nou rekemann ki i vin en

action body kot i a kapab fer *mitigation* li osi, i a ganny en Bidze i a ede avek sa bann problemm ki nou'n diskite ozordi.

Lalwa nou'n vwar ki tou Lalwa i annan pou fer avek later abandonnen, later prive ki i pa ankor devlope - Onorab Georges wi ou'n dir nou i annan sa bann Lalwa, be sa bann Lalwa la dimoun i ganny to bokou problemm ou pou al met en *case Ankour* pou pran ou 2an, 3an, pye dibwa dan later prive pou ganny letan tonbe, kraz i lakaz ou mor ou fini!

I demann annan seren mon pa konnen prosedir. I demann annan prosedir ki ganny revwar pour ki sa bann keksoz i ganny pase vit e ki en dimoun i kapab war solisyon, wi mon dakor i annan Lalwa nou tou nou konnen i annan Lalwa, me selman prosedir li menm i vreman dousman.

Departman ek Lazans konsernen li menm ki annan pou fer. Non, Mr Speaker in osi ganny fer resorti ki nou tou koman en endividé. Sa mon pou dakor ek tou Manm, tou Manm, nou tou koman en endividé nou devret pran nou responsabilite pou tir danze parey pye dibwa danzere, ki lo nou propriyete e ki i en menas pou nou menm e lezot dimoun.

Me la ler nou pe dir sa, nou tou nou dakor ek sa nou tou nou priy pou sa nou tou nou ti a kontan vwar sa. Me i annan dimoun ki napa sa mwayen, menm si i annan sa lanvi pou li fer li. Oli sa landrwa ki ed li? Napa. Ki tou Minister, Departman e Lazans ki annan later e ki lo zot later i annan pye dibwa danzere lo la, pou sakenn sa bann Minister, Departman ek Lazans pran zot responsabilite pou retir danze, ki kapab vin en menas pou piblik an zeneral e osi propriyete prive.

In annan osi propozisyon petet pou annan en *one-stop shop* petet sa i a kapab ganny diskite pli aprofondir par departman konsernen akoz mon santi kis i en bon propozisyon.

So Mr Speaker, *un instant*, mon'n tande avek Onorab Loizeau ler in fer son lentervansyon, ki Gouvernman Lokal i ganny en Bidze R500mil i donnen pou koup pye dibwa. Mon krwar mon'n tann ou tre byen Onorab.

Mr Speaker mon ti pou vreman kontan ki Minister Gouvernman Lokal i ekliersi sa *statement* ki Onorab in fer. Akoz in dir 3milyon, wi me i ganny 500mil in dir pou koup pye dibwa in spesifye 500mil

dan sa 3milyon pou koup pye dibwa. Nou pa okouran sa nou koman Lotorite Distrik, mwan MNA Anse Royale mon pa okouran sa mwan.

Onorab Egbert Aglae in *call* son *DA* in *text* son *DA* in demande si i annan si i annan sa in ganny dir non, napa. So mon ti a kontan ki Minister Departman Gouvernman Lokal laba i ekliersi sa *statement* ki'n ganny fer par Onorab Loizeau dan sa Lasanble ozordi.

Akoz si son distrik pe ganny sa lasistans pou koup pye dibwa li dan sa 500mil, mon krwar ki tou sa distrik lo *manage* Praslin, La Digue i devret gannyen! Nou tou distrik nou merit ganny menm tretman i pa kapab koz distrik *LDS* zot, zot pe gannyen ki lo kote distrik *MNA US* nou, nou pa okouran nou devret pe gannyen. Alors Mr Speaker mon ti pou kontan ki sa i ganny ekliersi akoz sa i tre serten sa en, tou distrik i devret ganny trete parey!

Mon'n koz lo kad legal ki Onorab Georges in anmenn e Mr Speaker mon krwar mon'n kapab kapte mazorite bann pwen relevan, bann pwen valab e bann rekomandasyon ki zot in kapab ganny fer sorti ozordi. E mon espere ki sa i ganny *summarize* en pti pe e i ganny, mon rekomande ki petet i

ganny met devan Minister konsernen, e ki nou ava kapab regarde e vvar ansanm ki travay ki kapab ganny fer.

Akoz mwan mon ti pou kontan war en solisyon, en solisyon imedya, an sa ki konsern problem ki nou, nou pe rankontre avek sa bann *issue* pye dibwa dan nou distrik. Mersi Mr Speaker.

MR DEPUTY SPEAKER

Mersi Onorab. Donk in arriv ler aprezan pou nou pran vot lo Mosyon table par Manm Elekte po distrik Anse Royale Onorab Lemiel ki lir koumsa;

Lasanble i demann Gouvernman pou imedyatman adres sa sityasyon pye dibwa danzere lo propriete Gouvernman, ki pe poz menas a lavi e propriete prive dan bann kominote lo Mahe, Praslin ek La Digue.

Tou Manm ki an faver endike silvouple? Mersi. Okenn Manm, anr, i annan ki'n met lanmen anba tro vitman, so nou pe reoran *count* pou fer sir ki Madam Clerk pa mank personn. Wi bann ki pour, bann ki pour. Mersi. Okenn Manm ki kont? Mersi. Alor vot lo sa Mosyon i annan 25 Manm ki'n vot an faver e 3 Manm in absténir. Alor sa Mosyon in pase.

E avan ki nou *adjourn* ozordi, i annan zis 2 pti komunikasyon ki mon ti oule fer avek Lasanble e bann dimoun ki pe swiv nou.

Lo en premye not mon ti oule prezant kondoleans Lasanble Nasyonal lo lapar Speaker Roger Mancienne tou bann MNAs e bann *staff* Lasanble Nasyonal pou Ansyen Speaker Mr Patrick Pillay swivan lensidan tris kot in perdi son pti zanfan. Nou prezant nou senser kondoleans pour la fanmir sirtou son fiy Ziz Pillay. E nou reasir zot ki nou pe mazin zot dan nou lapriyer dan sa moman tris e difisil ki zot pe pas atraver.

Lo en dezyenm not, sa wikkenn ki pe vini, nou pe fer sa lanons la akoz i dernyen sesyon Lasanble avan sa dat, le 30 Zilyet i normalman *International Day of Parliamentarism* ki komemor dat ki IPU ouswa *Inter Parliamentary Union* ti fonde an 1889.

Tenm ki'n ganny swazir pou lannen 2022, i langazman sitwayen e partisipasyon piblik dan travay Parlman. E donk ki nou oule dir se ankouraz tou sitwayen bann dimoun ki mou, nou reprezante isi anndan pou angaze avek travay Lasanble Nasyonal. Sirtou pa ezite pou

felisit nou bann MNAs pou rol ki zot zwe pou ranforsi la demokrasi e dyalog Parlmanter, eksprim dezir e volonte lepep Seselwa protez drwa imen e leta de dwa.

Savedir sa langazman, mon ti ava ankouraz zot pou konn rol bann MNAs e sirtou pa konfiz li avek rol DA. Konnen kot biro zot MNA i ete, kan zot vwar dimoun, lekel zot *Constituency Clerk*, limero telefonn, e *email* adres ,akoz a *mon avis* napa leskiz ki dimoun i dir zot pa vwar MNA menm si i pa ariv devan ou laport.

E alor mon oule osi profite poi remersye tou *Staff Sekretarya* Lasanble Nasyonal, ki ed nou koman Manm toulezour e sak zour koman en lenstitisyon.

Nou osi rekonnet ou ansyen MNA avek *staff* sirtou depi retour miltiparti an 1993 ki'n travay avek sa lenstitisyon, nou remersi zot pou zot devouman ver nou lenstitisyon ki osi enportan anba nou Konstitisyon e nou swete ki zot reste touzour bann zanmi Lasanble Nasyonal.

E bonn fet tou Manm menm si sa lannen i lo en *small scale* mon kapab dir, lakoz nou pou profite pou nou fer en pipili lannen prosen letan nou ava mark 30an Lasanble Nasyonal

an 2023. Alor sa ki mon ti oule dir, sa dat i le 31 Zilyet ouswa i le 30. *Ok.*

Donk sa ki osi enportan i Lasanble Nasyonal osi i pou selebre son Lanniverser le 31 Zilyet, so i *double celebration*. Alor mon ava dir zot mersi pou zot latansyon. Nou pou *adjourn* la ozordi nou pou repran travay Mardi 9er bomaten. Mersi.

(ADJOURNMENT)